

Ago buni Luke

yaku bura reyo

Ago di ini adina

Ago buni Luke yaku bura reyo bi Iesu di sina: Ina bi Israel di vegu moi rina amiye ma kono tora noibanu di amiye di vegu moi rina amiye. *Luke* di sina yaku bura reyo bi Sei yaku Iesu raka niyo ma “ina yaku ago buni amiye fore nufa de rofu ni ogau rego” (4.18). Mina ago buni amiye tau gade rofu bura reyo. Ada rena bi *Luke* di bura rena bi tau gade; ouresi nanakari bi Iesu di okina, ma metona agori bi Iesu di omari dina. Gabi Luke yaku ekalesia amiye di uka vari gira mana di ago *Acts* ri bura reyo.

Ago remanuri (nanaka 1—2 ma 9—19) bi ago be mina ago buni ideri amedo, idu ago buni idana ide. Mina bi naivo naivo amiye di yauta di ago, ma mamoe nari rena vene yaku Iesu di vata nina oto reyadi di ago, ma Iesu goduari Sei ni vakena yavari, ma Samaria amiye buni ma rumana mida rerevaida di mokena ago. Ago buniri ago tau gade gade bi usa usa nina di ago, ma Vima Kikifa di ago, ma rema vene Iesu di moimai nari rena di ago, ma Sei yaku vegu no koite makuna di ago.

Beika sina ideri

Ago di ini adina *1.1-4*

John Baptist ma Iesu di mida ariri *1.5-2.52*

John Baptist di moimai *3.1-20*

Iesu rofu babatiso reyo ma uka maina reyo *3.21-4.13*

Iesu di moimai amiye rofu Galilee ri *4.14-9.50*

Galilee gutuna Jerusalem rofu *9.51-19.27*

Fura metonari Jerusalem ideri ma ini adinari *19.28-23.56*

Varika Amiye di dadi rae rena, ogau nina ma omari dina di ago *24.1-53*

1 ¹⁻³Theophilus amiye tora, amiye tau tora ya beika vegu una rofu Sei yaku moi ogau reyo bi sena bura riyadi. Mina vegu vata ni baiyo

rofu, mina ni feidena vene ini ouresi ini ne yaku mina vegu veyadi ma ina ka mina ago di ini moimai rededi vene. Kamini ini sina ni odoro reyadi, resi nidedi mini, una rofu. Mina dada, Theophilus e, nai mokena bi mina sina dubusa, bura rei mona regida, resi moi feidegida ya rofu, adina mina vata niyo vegu bi, sena baku rei mona reyaka, ini vata ni baiyo gutuna. ⁴Makai reyaka dada, yi adari ae mona regiya, ya rofu beika vegu ya oteimaradi bi, rama vata niyadi.

John Baptist ini vata niyo di ago ogau niyadi

⁵Herod yaku Judea gaganiri^a kini niyo ri, Sei ma amiye utari naivo amiye yokoi roka Zechariah amegamo; ina bi Abijah di vene amiye yokoi. Ini rema di roka bi Elizabeth. Iniye ka, Sei ma amiye utari naivo amiye roka Aaron di ini tutubena rema.^b ⁶Ina remanu mokena rorobo nufa Sei di nemokori, Sei di ini ago vava tau vakoi ma Varika Amiye di ago gira ma mokena sina tau vakoi ka moi gira regamadi. ⁷Ina remanu bi mida de, adina Elizabeth bi natu, ma ina ini maruka sa ka ugava iniye niyadi.

⁸Yokaru Zechariah Sei ni vakena yavari Sei di ini nemokori Sei ma amiye utari naivo amiye di ini moimai regasa amedo, adina mina meda bi ini vene bedakai di moimai ari. ⁹Kamini Sei ma amiye utari naivo vene di rededi kana, ina vene ya laki isirari gutuna Zechariah moyadi ma bi Varika Amiye ni vakena yava ideri orina vata fafau sisika buni muramura origi. ¹⁰Ma amiye tau tora iniye bi etofaro are regamadi, usa usa nigamadi ri, bi sisika buni muramura oriyo.

¹¹Mina medari Zechariah yaku Varika Amiye di ini naivo naivo vima yokoi veyo, sisika buni muramura ori sisika rena fore vata vana rama rofu are reyo. ¹²Zechariah ya veyo ri, bi tururu resi ini uka ideri gutuna ori ya no iniye niyo. ¹³Idu naivo naivo vima yaku niyo, “Zechariah ori ga re, Sei yaku yi usa neideyo. Yi rema Elizabeth yaku yi mida yokoi evata rego, ini roka nigiya bi John. ¹⁴Ada yaku no iniye nigedi, ma amiye tau gade ka ada regedi John vata nigo dada! ¹⁵Adina bi Varika Amiye di nemokori bi amiye tora yokoi. Ina bi koru gira o waini de irigo; ina bi ini nono di ukari Vima Kikifa ya sena vata baiyo.^c ¹⁶Ina yaku Israel vene tau gade ini Varika Amiye Sei rofu moi dairigo. ¹⁷Ina bi Varika Amiye di ini naivo naivo amiye, kaere ourei bi bobigo, Sei di ago nido amiye Elijah di vima ma vava nufa. Ina yaku baba vene di uka moi kero rego ri, bi ini mida sa uka yokoi maka dudu ameibigedi. Ina yaku vegu no vene moi kero rego ri, bi mokena rorobo vene di mokena ameibigedi. Adina Varika Amiye di ini vene moi egogo resi Varika Amiye di ini dego meda nari rebigedi.”^d

^a 1.5 Judea gagani: Mina bi Palestine gagani noibanu. ^b 1.5 1 Chr 24.10 ^c 1.15 Num 6.3
^d 1.17 Mal 4.5-6

¹⁸Zechariah yaku mina naivo naivo vima rofu ni kabai resi niyo, “Sina nisa bi gokai moi rama rego diba nigida? Na bi amiye ugava, ma nai rema ka rema ugava.”

¹⁹Naivo naivo vima yaku ni kabai resi niyo, “Na bi Gabriel, na bi Sei di ini nemokori are reida. Sei yaku ya rofu na ni feideyo mina sina buni ya nigida.^e ²⁰Idu ya bi nai sina buni rofu uka vari gira de maro. Mina dada ya bi babo nisi ago de nigiya; nai niyaka kana ogau nigo mammo ago nigiya. Nai sina tau niyaka bi ini meda iniyeri vata nigo.”

²¹Zechariah bi Sei ni vakena yava ideri amei doba regamo dada, amiye tau bi mokena tau moigamadi ina nari regamadi ri. ²²Etofaro yakuyo ri, bi amiye ni kabai de reyo, dada mokeyadi ina bi Sei ni vakena yava ideri rebe yokoi veyo. Ini vena babo niyo dudu maka amiye oteimaro ina bi rama iniye rebe yokoi veyo. Ina babo nisi bi toga toga ina vene rofu rebe reyo.

²³Zechariah ini moimai ari koina niyo ri, bi ini rautu rofu dairiyo. ²⁴Mina ari koina niyo ri, bi ini rema Elizabeth rivo niyo. Mina rivo niyo ri, bi eo vana berou autu ini yavari maka amegamo. Elizabeth yaku makai niyo, ²⁵“Gua Varika Amiye yaku na rofu ada reyo. Ina yaku nai maena amiye nemokori erufuyo!”

Iesu di vata nina ni ogau reyo

²⁶Elizabeth ini rivo niyo eo koru idari bi, Sei yaku naivo naivo vima roka Gabriel Galilee di ini taoni yokoi roka Nazareth rofu ni feideyo. ²⁷Rema ofi yokoi bi amiye yokoi sa varena kode mironari amegamo, iniye bi amiye roka Joseph ni kake reyadi, megedi vo nisi. Joseph bi kini David di ini tutubena amiye yokoi. Mina rema di roka bi Mary.^f ²⁸Mina naivo naivo vima bi Mary rofu bosu niyo, “Rema mida e, Sei ya rofu sena ada reyo, ma Varika Amiye bi ya sa amedo.”

²⁹Mary yaku mina sina neideyo ri, bi ori tora gade resi mokegamo mina ago di ini rama adina iniye bi beika. ³⁰Naivo naivo vima yaku niyo, “Mary, ori ga re, adina Sei ya rofu sena ada reyo. ³¹Ya bi rivo nisi rumana mida yokoi moi vata resi ini roka bi Iesu vo nigiya.^g ³²Ina bi amiye tora gade iniye nigo, ma ini roka Sei Odoro Iniye di ini Mida nigedi. Varika Amiye Sei yaku ini tutubena David di ini vava moi mago.^h ³³Ma ina bi Jacob ini tutubena fafau toga toga ourefeidebobigo. Ini ourefeidenana amena sana bi koina de nigo!”

³⁴Mary yaku naivo naivo vima ni kaitesi niyo, “Na bi amiye yokoi sa varena kode. Mina nisa bi gokai vata nigo?”

³⁵Naivo naivo vima yaku ni kabai resi niyo, “Vima Kikifa bi ya rofu dego, ma Sei Odoro Iniye di vava ya fafau ameinu rego, mina dada

^e 1.19 Dan 8.16; 9.21 ^f 1.27 Mt 1.18 ^g 1.31 Mt 1.21 ^h 1.32-33 2 Sam 7.12, 13, 16; Is 9.7

mina mida kikifa bi Sei di ini Mida vo nigedi. ³⁶Ma va moke, yi rasini Elizabeth, ina bi ugava nufari sena rivo niyo; amiye ya nigamadi bi mida de moigo vo niyadi, idu ini eo koru ida bi mini, ³⁷adina bi vegu yokoi de Sei yaku moi rama de rigo.”ⁱ

³⁸Mary yaku niyo, “Na bi Varika Amiye di ini naivo rema amiye. Yi sina niyo kana na rofu vata nigo bi buni.” Kamini mina naivo naivo vima ina feresi diyo.

Mary yaku Elizabeth rofu oto reyo

³⁹Mina medari, Mary dadisi evade omuna ikari taoni yokoi Judea gaganiri boi neyo. ⁴⁰Zechariah di yava ideri dui resi Elizabeth rofu ini ago buni niyo. ⁴¹Elizabeth yaku Mary di ini buni ago neideyo ri, bi ini mida ini rivo ideri kita reyo, ma Vima Kikifa yaku Elizabeth ini rovaitari vata baiyo. ⁴²Kamini dadisi ni goroka tora resi niyo, “Rema tau di ini fogori bi ya maka bi buni tora gade! Ya yaku evata regiya mida ka buni tora iniye nigo! ⁴³Nai buni bi beika, dada ma nai Varika Amiye di nono bi na rofu oto reyo mini? ⁴⁴Adina bi yi ago buni neideyaka ri, bi nai mida bi nai rivo ideri ada resi kita reyo. ⁴⁵Varika Amiye di ini ago ya rofu niyo ma ya bi mina rofu mokena vari gira aiyo. Ina bi buni tora gade ya mago dada!”

Mary Sei di roka moi odoro resi nina di yauta

⁴⁶Kamini, Mary yaku niyo,^j

“Nai vima yaku Varika Amiye di roka moi odoro resi nido;

⁴⁷ Nai vima yaku ka Sei na moi vegu rido amiye rofu ada tora redo,

⁴⁸ Adina bi na, ini naivo rema, na mokeyo mini!^k

Ma mina dada gua ameibonari, amiye tau yaku nigedi Sei yaku buni tora gade na rofu maro.

⁴⁹ Adina bi Vava Iniye Amiye yokoi maka yaku vegu tora iniye na fafau moi vata riyo,

ini roka bi kikifa.

⁵⁰ Ini iriyeduka bi kaere ina rofu kikifa iniye rededi vene fafau ameibigo.

Mina vene kaere bi ini tutubena vene fafau ka ameibigo.

⁵¹ Ini vana yaku ini yeiva bi sena moi ogau riyo, ma matuka vene ini mokena sa ina yaku meki reyo.

⁵² Ina yaku ourefeidenana vene di amena vava sanari eyarei vau reyo,^l resi matuka de vene bi ina yaku moi odorori vau reyo.

⁵³ Rauna amededi vene bi ina yaku buni ini ukari moi vata baiyo.

Resi gugura tau amiye bi ina yaku vana koina moi feidei diyo.

ⁱ 1.37 Gen 18.14 ^j 1.46-55 1 Sam 2.1-10 ^k 1.48 1 Sam 1.11 ^l 1.52 Job 5.11; 12.19

54 Ini naivo vene Israel aedeyo,
ini iriyeduka mokeyo dada.

55 Ma uni tutubena vene toga toga ago niyo,^m
Abraham ma ini tutubena rofu!”

56 Kamini Mary bi Elizabeth sa eo regode amesi ini rautu rofu dairiyo.

Elizabeth yaku John moi vata reyo

57 Elizabeth di mida moina aru okiyo ri, rumana mida moiyo. 58 Kamini ina atafu amededi vene ma ini usika ourena yaku Varika Amiye di ini iriyeduka tora ina rofu vata niyo sina neideyadi ri, bi ina sa ada no iniye niyadi.

59 Meda vana berou autu regoderi, bi rumana mida di rovaita nugagedi vo nisi, egogo resi ini roka bi Zechariah vo nigatedi, ini baba di roka.ⁿ

60 Idu ini nono niyo, “Ide, ini roka bi John.”

61 Ina vene ya niyadi, “Idu ya yi usika ourenari bi mina roka bi koina!” 62 Kamini ina vene yaku vana dudu rumana mida di baba rofu ni kaiteyadi rumana mida di roka bi beika nisi mago.

63 Zechariah yaku bura rina buka yokoi ni kaitesi yomakai bura reyo, “Ini roka bi John.” Ina tau noibanu vakoi tururu reyadi! 64 Mina medari, Zechariah dubusa ago nigamo. Resi Sei rofu moi odoro rena ago buni niyo. 65 Mina dada, ina adina vene tau ori yaku ini uka vata baiyo, ma mina vegu di sina bi Judea omuna gagani tau rofu ni nega bogasa reyadi.

66 Mina sina neideyadi vene tau yaku mokesi niyadi, “Mina mida yaku beika vegu moi ogau rigo?” Adina Varika Amiye di vava bi mina mida fafau amedo mini.

Zechariah di ada reyo yauta Sei rofu

67 Vima Kikifa yaku John ini baba di uka vata baiyo dada, Sei di ini ago niyo:

68 “Varika Amiye ni moi odoro renadi, kaere bi Israel di ini Sei!
Idu ina bi una oto reyo, adina ina yaku ini vene moi vegu riyo.

69 Moi vegu rina amiye una maro.

Ina bi ini naivo amiye David di ini tutubena gutuna deyo.

70 Sei di ago nidedi vene kikifa yaku mina amiye sena niyadi,

71 una rofu uni tuma vene iya resi una moi vegu rego,
ma una rofu gubuyo rededi vene ka moi vegu rego.

72 Sei yaku uni tutubena vene rofu ini iriyeduka moi ogau rigo ina rofu niyo,

ma ini uka ago kikifa toto de nigo.

73 Uni tutubena Abraham rofu ni tore reyo,

^m 1.55 Gen 17.7 ⁿ 1.59 Lev 12.3

74 ina yaku uni tuma vene rofu una moi vegu rigo.
Ina rofu naivo renadi ma ori ga rena di ida riyo.
75 Kikifa dudu, mokena rorobo dudu ini nemokori dinadi,
uni vegu ameibobina meda tauri.

76 Ma ya, nai mida, bi Sei Oodoro Iniye di ago nido amiye vo nibigedi,^o
adina ya bi Varika Amiye ouresi dibigiya,
resi ini ida dogo regiya.

77 Ini vene oteimagiya ma Varika Amiye yaku moi vegu rigo bi diba
nigedi,
ini vegu no koite makugo di.

78 Adina Sei di iriyeduka una rofu bi ini ukari vata baiyo,
ina yaku uruyaku meda vabara kana omari gutuna una rofu ni
feidego.

79 Mukuna ideri ma muyena tumu sa vene rofu mina vabara mago,^p
resi ina yaku uka amuta di ida dudu una ourefeidebogo.”

⁸⁰Mina mida kamini tora niyo, ma ini vima ka yeiva niyo. Ina bi
gagani autu sanari amegamo, baiyo Israel vene rofu ini ogau niyo medari
mamo.

Iesu vata niyo
(Mt 1.18-25)

2 ¹Mirona ariri, Caesar Augustus yaku ago ni feideyo gagani tau vakoi
rofu, amiye tau roka moigedi di. ²Ouresi roka moyadi ini medari
bi, Quirinius yaku Syria ri gavana niyo ariri. ³Mina ago dada, amiye
tau vakoi ini roka magedi vo nisi, yokoi yokoi iniye di taoni iniye rofu
dairiyadi.

⁴Joseph Nazareth, Galilee di taoni yokoi rofu boyo, kini David di vata
nina di taoni Bethlehem, Judea gagani rofu boi okiyo, adina ina bi David
di tutubena. ⁵Bethlehem taoniri, Joseph ini roka mago di, Mary kaere bi
ina ni maradi mego vo nisi ka afesi, gogo boyadi. Mary niyo. ⁶Mironari
amegamadi ri, bi Mary ini mida moina meda okiyo. ⁷Mary yaku ini
ourena rumana mida odisi varuka dudu kumu risi, kamini boromakau di
iruku iridedi mauari moi aiyo, adina bi oto vene di amena varena yava bi
vata baiyo.

Naivonaivo vima ma mamoe nari rededi vene

⁸Mamoe nari rededi vene be bi nomu tora gaganiri amegamadi. Urusa
niyo ma ini mamoe tau nari regamadi. ⁹Kamini, Varika Amiye di naivo
naivo vima yokoi bosu mina vene adinari ogau niyo, ma Varika Amiye di

^o 1.76 Mal 3.1 ^p 1.79 Is 9.2

vabara yaku ina vene buru riyo ma ori yaku no iniye niyadi. ¹⁰Resi naivo naivo vima yaku mina vene rofu niyo, “Ori ga refa, sina buni moi baiyaka dada. Mina sina yaku amiye tau ada regedi. ¹¹Adina gua mina mida, David di taoniri, ya vene di moi vegu rina amiye sena vata niyo. Mina bi Keriso Varika Amiye! ¹²Gokai vei mama rigedi di ida bi yomakai: Rumana mida keika baku regedi, boromakau di iruku irina maua ideri varedo, varuka dudu fafa riyadi.”

¹³Kamini, minari maka, omari naivo naivo vima tau gade gade ogau nisi mina naivo naivo vima sa, Sei rofu ni vakena resi yauta nigamadi:

¹⁴“Oma Odoro Iniye Sei di roka moi odoro renadi,

kaere mina konori Sei yaku ada redo bi uka amuta ya rofu mago!”

¹⁵Mina koina niyo ri, mina naivo naivo vima tau gade omari dairiyadi, ma mamoe nari rededi vene iniye iniye rofu niyadi, “Bethlehem ri bonadi, beika bi vata niyo, Varika Amiye yaku una oteimaro kana venadi.”

¹⁶Evade kamini boyadi ri, Mary, Joseph sa baku reyadi. Ma rumana mida keika bi boromakau di iruku iridedi mauari varegamo. ¹⁷Mina veyadi ri, mamoe nari rededi vene yaku dadisi naivo naivo vima yaku beika ni oteimaro mina mida rofu ni negau reyadi. ¹⁸Kamini mina ago neideyadi vene tau mamoe nari rededi vene di sina neidesi tururu reyadi. ¹⁹Ma Mary yaku mina ago ma vegu tau ini ukari mokei tora iniye reyo. ²⁰Kamini mamoe nari rededi vene dairiyadi, Sei rofu yauta nigasa ini roka moi odoro reyadi, adina neidegasa veyadi vegu bi rama iniye, naivo naivo vima yaku ni oteimaro kana.

Iesu di roka aiyadi

²¹Meda vana berou autu regode moiyo ri, rumana mida di ini rovaita nugana medari, Iesu ini roka aiyadi, ini nono di uka ideri varena koderi; naivo naivo vima yaku niyo kana mina roka niyadi.^q

Iesu Sei ni vakena yava ideri afei boyadi

²²Nono ini kino nufa meda koina niyadi ruaka nigi Moses di ago gira kana, Joseph ini rema Mary sa Jerusalem rofu ini mida Iesu moi boyadi, Varika Amiye rofu magedi vo nisi.^r ²³Varika Amiye di ini ago girari bura rei niyo kana, “Vata ni oureyadi rumana mida tau bi Varika Amiye rofu nigedi.”^s ²⁴Ina boyadi, Varika Amiye di ago gira kana, koena erena remanu ba kefuta di mida remanu ori sisika rena ma Sei rofu kana magedi.

²⁵Mina ariri, amiye yokoi roka Simeon Jerusalem ri amegamo. Ina bi mokena rorobo amiye ma Sei ori regamo amiye. Ina bi Israel di moi

^q 2.21 Lev 12.3; Lk 1.31 ^r 2.22-24 Lev 12.6-8 ^s 2.23 Ex 13.2, 12

vegu rina amiye nari amegamo, ma ina bi Vima Kikifa yaku vata baiyo. ²⁶Vima Kikifa yaku ka ina rofu niyo, ina bi de muyego Varika Amiye ini Keriso vego mamō. ²⁷Vima Kikifa yaku Sei vakena yava ideri Simeon afei dui reyo. Mida keika Iesu bi ini nono baba yaku moi dui reyadi, Moses di ago gira di vegu regedi vo nisi. ²⁸Kamini Simeon yaku mida keika moisi buda aisi Sei rofu ni buni resi niyo:

²⁹“Varika Amiye e, yi moimai rei tavoi reida amiye gua muyena sanari uka amuta dudu digida,
yi ago niyo kana.

³⁰Adina bi nai nemoko yaku yi moi vegu rena ida veyaka mini.

³¹Ya sena amiye tau vakoi di ini neri mina vegu dogo reyo:

³²Vabara ruaka yokoi tutubena idana vene bedakai rofu moi evata reyo,^t
ma vabara yi vene Israel mago.”

³³Rumana mida di nono baba yaku Simeon di ago ina rofu neideyadi ri, bi tururu reyadi. ³⁴Kamini Simeon yaku ina remanu rofu buni nisi mida di nono Mary rofu nisi niyo, “Mina mida yaku Israel vene tau gade moi keto rego, ma tau gade tora ka moi vegu rigo. Ina bi Sei di ini rebe kana bogo, ma amiye tau tora yaku mokena no dudu ni vabi regedi.

³⁵Mina rofu dudu, ina yaku ini mokena no moi sui ridedi moi negau rigo. Ma mina mokena iriyeduka yaku yi vima ora kana vaga imigo.”

³⁶Sei di ago nido rema yokoi ka minari amegamo, ini roka bi Anna, kaere bi Panuel di ini vefa, Asher di ini rubu rema. Ina ka bi rema ugava; meyo, idu lagani viro vara maka ini maruka sa vakoi ameyadi. ³⁷Ini maruka muyeyo ma lagani 84 obu ni amegamo.^u Ina bi Sei vakena yava de ferei tavoi regamo, uru ari Sei ni vakena regamo rofu iruku irina de di ago gira, moi gira regamo ma usa usa vegu. ³⁸Mina ariri ina okiyo ri, Sei rofu buni tora gade masi Jerusalem moi vegu rigo vo nisi nari rededi vene tau vakoi ni oteimaro mina rumana mida di ini sina bi.

Nazareth ri dairiyadi

³⁹Iesu ini nono baba yaku Varika Amiye di ago gira di ini vegu tau vakoi rei vau reyadi ri, bi kamini Galilee ri dairiyadi, ini taoni iniye Nazareth ri boyadi.^v ⁴⁰Mina mida bi kamini tora nibogamo yeiva nufa ma mokena tora iniye dudu. Sei di ini buni tora iniye ina rofu magamo.

Rumana mida Iesu Sei ni vakena yava ideri

⁴¹Lagani neinei Iesu ini nono baba sa Jerusalem bogamadi, Passover Irakuna regedi vo nisi.^w ⁴²Kamini Iesu ini lagani tuerori, ina regode,

^t 2.32 Is 42.6; 49.6; 52.10 ^u 2.36-37 lagani 84 obu ni amegamo; o ini vata nisi amegamo lagani bi 84. ^v 2.39 Mt 2.23 ^w 2.41 Ex 12.1-27; Deut 16.1-8

ini tutubena yarededi kana vegu, vakoi bi mina irakuna regedi vo nisi Jerusalem boyadi. ⁴³Irakuna meda koina niyo ri, dairigamadi, idu rumana mida Iesu maka bi Jerusalem ri ameyo. Ini nono baba diba de. ⁴⁴Ini mokenari bi ina bi ini amiye fogori dido mironi. Meda yokoi maka koina niyo fufutari mamu, ini usika ourena vene rofu ma asiyaka vene rofu, Iesu kamini maina reyadi. ⁴⁵Baku rena de reyadi dada, Jerusalem ri maina regi dairiyadi. ⁴⁶Meda regode koina niyo ri, ina vene yaku Sei vakena yava ideri baku reyadi, oteimana vene di utari amegasa ini sina neidegasa ina rofu ni kaitegamo. ⁴⁷Ini ago neidegamadi vene tau bi ini moke moke rofu ma ini ago dairi ni kabai regamo rofu tururu iniye reyadi. ⁴⁸Ini nono baba ka tururu reyadi mina veyadi ri, kamini ini nono yaku ni kabai resi niyo, “Nai mida, beika resi una rofu makai reyo? Na yi baba sa bi uka esika dudu ya maina reyafa.”

⁴⁹Ni kabai resi niyo, “Beika resi na maina rededi? Na nai Baba di yavari ameida bi, ya diba ba ide?” ⁵⁰Ini ago bi neideyadi, idu sina rama diba de.

⁵¹Kamini Iesu ini nono baba sa Nazareth ri dairiyadi, ma ini nono baba di ago neidegamo. Ini nono yaku mina vegu tau ini uka ideri moi gira regamo. ⁵²Kamini Iesu tora nigamo, rovaitari, ma moke moke ri. Sei di uka ma amiye di uka ka ada regamadi ini mina vegu dudu.^x

John Baptist yaku ago ni rausi reyo

(Mt 3.1-12; Mk 1.1-8; Jn 1.19-28)

3 ¹Tiberius Caesar bi lagani 15 varika amiye ni amegamo ri, Pontius Pilate bi Judea di gavana, ma Herod bi Galilee di gavana. Herod di ourena Philip bi Iturea ma Tranchonitis di gavana, ma Lysanias bi Abilene di gavana. ²Annas ma Caiaphas bi Sei ma amiye utari naivo naivo vene tora. Mina ariri, Sei yaku John, Zechariah di mida, rofu ini ago maro, gagani autu sanari. ³Kamini, John yaku Jordan Koru seri gagani tau rofuri digasa vegu no feresi moi etagae rina ma Sei yaku ini vegu no koite makuna di babatiso di ago ni rausi regamo.

⁴Sei di ago niyo amiye Isaiah di bukari bura resi niyo kana:^y

“Amiye yokoi di goroka bi gagani autu sanari raka nido,
‘Varika Amiye di ida dogo resi
ini dibo ida moi rorobo rifa.

⁵Soku tau moi vata baigedi,
omuna tora tora ma omuna keika keika tau bi nomu nigo.
Ida kevo sana moi rorobo risi
giyo ida bi amuta nigedi.

⁶Amiye tau yaku vegedi Sei di vava gokai amiye moi vegu rego
mina!’ ”

^x 2.52 1 Sam 2.26; Prov 3.4 ^y 3.4-6 Is 40.3-5 (LXX)

⁷Amiye tau gade John rofu babatISO reyainedi baigamadi ri, ina vene rofu niyo, “Ya bi aruma di mida mida kana, kaere yaku ya niyo, ‘Sei di gubuyo baigo, mina rofu ori diyainedi?’”⁸ Mina dada vegu no feresi moi etagae rina vegu di vegu iniye yabo meko rama rena kana moi ogau rifa. Ma ya kaya nigI ga kora refa, ‘Abraham bi uni tutubena.’ Adina ya vene rofu nida, Sei ina diba mina fore dudu Abraham di tutubena rigo!”⁹ Viro bi yabo daruri sena ka aiyadi ma yabo neinei meko buni de varededi bi nu makusi ita fafau you bogedi.”^b

¹⁰Amiye tau gade yaku ni kaitesi niyadi, “Ma una bi beika regifa?”

¹¹John yaku ni kabai resi niyo, “Kaere ini varuka remanu amiye bi varuka de amiye rofu bi yokoi mago. Ma kaere iruku nufa bi, rau re.”

¹²Fore butu rededi vene be ka babatISO moigedi vo nisi boyadi yaku ni kaiteyadi, “Oteimana amiye, ma una bi gokai regifa?”^c

¹³Ina yaku ni kabai resi niyo, “Ago gira yaku niyo kana maka moifa, moi tau tora bi ga refa.”

¹⁴Iya rededi vene be ka ina rofu ni kaitesi niyadi, “Una bi gokai regifa?”

Ina yaku niyo, “Amiye rofu fore moi tavoi ga refa, ma ofa sina dudu ina rofu ago ga nifa. Ma yi moimai dudu, gokaisanu moisa bi, kaini ada refa.”

¹⁵Gua amiye tau di uka mokena vau reyadi, dada mokena deda moisi niyadi, “John bi Keriso mini ba?”¹⁶ Kamini ina yaku mina amiye tau rofu ni kabai resi niyo, “Na yaku koru dudu ya babatISO reida, idu baigo amiye ini vava yaku nai vava etei riyo, ye na bi rorobo de ini yuka ro di maena younegida. Mina amiye bi Vima Kikifa ma ita dudu ya babatISO rego.

¹⁷Ini witi fotaka utei resi koka rena di gadi bi ini vanari moi gira resi witi ada di fotaka dobeka gutuna makusi ini yavari aigika, idu ini sanika bi kafena de itari ori kamu rego.”

¹⁸Ina yaku ago tauri amiye rofu Sina Buni ni oteimaro. ¹⁹Idu John yaku, Herod kaere bi Galilee di ourefeidenana amiye, di no moi negau regamo. Ini adina bi ini dubuini di rema Herodias meyo. Berou bi ini vegu no tau tora reyo mina ni negau reyo.^d ²⁰Mina vegu reyo ri, bi ini no dubusa moi tora risi John dibura yavari ayo.

Iesu babatISO reyo (Mt 3.13-17; Mk 1.9-11)

²¹Amiye tau babatISO maro ri, bi Iesu ka babatISO reyo. Usa usa nigamo ri, oma ekeyo ²²ma Vima Kikifa bi pune erena kana rovaita dudu desi ina fafau rou riyo. Ma goroka yokoi oma gutuna degasa niyo, “Ya bi nai uka maida mida; ada tora gade ya rofu reida.”^e

^z 3.7 Mt 12.34; 23.33 ^a 3.8 Jn 8.33 ^b 3.9 Mt 7.19 ^c 3.12 Lk 7.29

^d 3.19-20 Mt 14.3-4; Mk 6.17-18 ^e 3.22 Gen 22.2; Ps 2.7; Is 42.1; Mt 3.17; Mk 1.11; Lk 9.35

Iesu ini tutubena vene

(Mt 1.1-17)

²³Ini vata niyo vegu bi 30 kanari mamu ini moimai reyo. Amiye yaku mokegamadi bi Iesu bi Joseph di ini rumana mida. Joseph bi Heli di ini rumana mida. ²⁴Heli bi Matthat di ini rumana mida. Matthat bi Levi di ini rumana mida. Levi bi Melchi di ini rumana mida. Melchi bi Jannai di ini rumana mida. Jannai bi Joseph di ini rumana mida. ²⁵Joseph bi Mattathias di ini rumana mida. Mattathias bi Amos di ini rumana mida. Amos bi Nahum di ini rumana mida. Nahum bi Esli di ini rumana mida. Esli bi Naggai di ini rumana mida. ²⁶Naggai bi Maath di ini rumana mida. Maath bi Mattathias di ini rumana mida. Mattathias bi Semein di ini rumana mida. Semein bi Josech di ini rumana mida. Josech bi Joda di ini rumana mida. ²⁷Joda bi Joanan di ini rumana mida. Joanan bi Rhesa di ini rumana mida. Rhesa bi Zerubbabel di ini rumana mida. Zerubbabel bi Shealtiel di ini rumana mida. Shealtiel bi Neri di ini rumana mida. ²⁸Neri bi Melchi di ini rumana mida. Melchi bi Addi di ini rumana mida. Addi bi Cosam di ini rumana mida. Cosam bi Elmadam di ini rumana mida. Elmadam bi Er di ini rumana mida. ²⁹Er bi Joshua di ini rumana mida. Joshua bi Eliezer di ini rumana mida. Eliezer bi Jorim di ini rumana mida. Jorim bi Matthat di ini rumana mida. Matthat bi Levi di ini rumana mida. ³⁰Levi bi Simeon di ini rumana mida. Simeon bi Judah di ini rumana mida. Judah bi Joseph di ini rumana mida. Joseph bi Jonam di ini rumana mida. Jonam bi Eliakim di ini rumana mida. ³¹Eliakim bi Melea di ini rumana mida. Melea bi Menna di ini rumana mida. Menna bi Mattatha di ini rumana mida. Mattatha bi Nathan di ini rumana mida. Nathan bi David di ini rumana mida. ³²David bi Jesse di ini rumana mida. Jesse be Obed di ini rumana mida. Obed bi Boaz di ini rumana mida. Boaz bi Salmon di ini rumana mida. Salmon bi Nahshon di ini rumana mida. ³³Nahshon bi Amminadab di ini rumana mida. Amminadab bi Admin di ini rumana mida. Admin bi Arni di ini rumana mida. Arni bi Hezron di ini rumana mida. Hezron bi Perez di ini rumana mida. Perez bi Judah di ini rumana mida. ³⁴Judah bi Jacob di ini rumana mida. Jacob bi Issac di ini rumana mida. Issac bi Abraham di ini rumana mida. Abraham bi Terah di ini rumana mida. Terah bi Nahor di ini rumana mida. ³⁵Nahor bi Serug di ini rumana mida. Serug bi Reu di ini rumana mida. Reu bi Peleg di ini rumana mida. Peleg bi Eber di ini rumana mida. Eber bi Shelah di ini rumana mida. ³⁶Shelah bi Cainan di ini rumana mida. Cainan bi Arphaxad di ini rumana mida. Arphaxad bi Shem di ini rumana mida. Shem bi Noah di ini rumana mida. Noah bi Lamech di ini rumana mida. ³⁷Lamech bi Methuselah di ini rumana mida. Methuselah bi Enoch di ini rumana mida. Enoch bi Jared di ini rumana mida. Jared bi Mahalaleel di ini rumana mida. Mahalaleel bi Kenan di ini rumana mida.

³⁸Kenan bi Enosh di ini rumana mida. Enosh bi Seth di ini rumana mida. Seth bi Adam di ini rumana mida ma Adam bi Sei di ini rumana mida.

Iesu no reyaine vo nisi ini uka maina reyo
(Mt 4.1-11; Mk 1.12-13)

4 ¹Iesu Jordan koruri gutuna dairiyo ri, Vima Kikifa bi ina vata baiyo. Kamini Vima Kikifa yaku gagani autu sanari afei boyo ²ma mironari meda 40 ideri Bodaka yaku no reyainedi vo nisi ini uka maina reyo. Mina meda tauri Iesu iruku irina de, ye meda koina niyo ri rauna reyo dada.

³Kamini Bodaka yaku ina rofu niyo, “Ya bi Sei di Mida vo nisi, bi yomina fore ni kumo iruku niyaine.”

⁴Iesu yaku ni kabai resi niyo, “Sei di agori yaku bura reyo bi, ‘Amiye bi iruku dudu maka de amegedi.’”^f

⁵Kamini Bodaka yaku afei bosu minari maka ourefeidenana amena sana tau mina kono tora noibanuri oteimasi ⁶niyo, “Mina tau di vava ma buni vayavaya ya magida, adina mina tau bi na rofu maro, ma kaere uka mokesi magida bi magida. ⁷Mina dada, nai adinari na ni vakegi efuka meimigiya vo nisi, bi mina tau vakoi ya magida.”

⁸Iesu yaku ni kabai resi niyo, “Yomakai bura reyo, ‘Varika Amiye yi Sei ni vakesi ina rofu maka naivo re!’”^g

⁹Kamini Satani yaku Jerusalem ri afei bosu Sei vakena yava tebori moi are resi niyo, “Ya bi Sei di Mida vo nisi minari gutuna ya kaya maku ne.

¹⁰Adina Sei di agori yaku bura reyo bi, ‘Sei yaku ini naivo naivo vima ago gira mago ya dada ma ya nari regedi.’^h ¹¹Ma, ‘Ini vana dudu ya moi odoro regedi, yi yuka foreri de tagi magiya.’”ⁱ

¹²Iesu yaku ni kabai resi niyo, “Yomakai niyo, ‘Varika Amiye yi Sei bi ini uka maina ga re.’”^j

¹³Bodaka yaku Iesu vegu no reyainedi vo nisi ini uka maina koina niyo ri, bi ferei diyo kumo meda buni yokoiri.

Iesu ini moimai ouresi reyo Galilee ri
(Mt 4.12-17; Mk 1.14-15)

¹⁴Iesu bi Vima Kikifa di vava dudu Galilee ri dairiyo, ma iniye di ini sina bi mina gagani tau vakoiri ni nega bogasa reyadi. ¹⁵Ini usa usa yavari amiye oteimago ma ina tau vakoi yaku ini roka moi odoro regamadi.

Nazareth ri Iesu etofa reyadi
(Mt 13.53-58; Mk 6.1-6)

¹⁶Kamini ini tora niyo taoni Nazareth ri dairiyo. Ini rei baiyo kana, Sabati medari usa usa yavari bosu buka kikifa bura vegi dadisi boyo.

^f 4.4 Deut 8.3 ^g 4.8 Deut 6.13 ^h 4.10 Ps 91.11 ⁱ 4.11 Ps 91.12 ^j 4.12 Deut 6.16

17Ina vene yaku Isaiah Sei di ago nido amiye di ini buka maradi. Kamini buka uforo resi bura reyadi sana baku resi vesi niyo:

18 “Varika Amiye di Vima bi na sa,^k

na vo niyo dada, sina buni irava vene rofu ni rausi regida.

Ina yaku na ni feideyo bi, dibura tavoi rededi vene nigida ina bi moi younegida,

ma ne taufa vene rofu bi ini ne buni regida, ma dubusa nene reyagane;

ma kaere moke itu vene younegida.

19 Resi ni rausi regida, ‘Varika Amiye di ini mokei vava redo lagani bi mini,

ma Varika Amiye yaku ini vene moi vegu rego.’ ”

20Kamini Iesu yaku buka firo risi nari redo amiye dairi masi ameinu reyo. Amiye tau usa usa yavari Iesu maka vei mama reyadi. 21Ma ina vene rofu nigida kora reyo, “Mina neideyadi Sei di ago bi gua meda rama aiyo.”

22Kamini amiye tau yaku ina bi amiye buni vo niyadi, sina buni buni niyo dada tururu resi niyadi, “Mina bi Joseph di mida, ba?”

23Kamini Iesu yaku ina vene rofu niyo, “Rama bi mina mokena ago na rofu yomakai nigedi, ‘Gauka dogo amiye, ya kaya moi buni ri kumo.’ Ka nigedi, ‘Beika Capernaum ri reyo bi neideyafa, dada minari yi rautu iniyeri ka re.’ ” 24Ma Iesu yaku niyo, “Rama ya vene rofu nida, Sei di ago nido amiye ini rautu vene yaku ini ago de neidededi.^l

25“Idu rama iniye ya nida, Elijah ini ariri, obu tau gade Israel ri amegamadi bi lagani regode ma eo koru ida miya de deyo ma adabo tora gade Israel gagani fono reyo.^m 26Sei yaku ini vene nokoi rofu Elijah de ni feideyo, idu bi taoni yokoi roka Zarephath Sidon gagani atafu obu yokoi rofu maka ni feideyo.ⁿ 27Ma Elisha Sei di ago nido amiye di ini ariri bi, refera nufa vene tau tora Israel ri amegamadi, idu yokoi kava moi ruaka de riyo, mina bi Syria amiye, Naaman maka.”^o

28Usa usa yavari egogo reyadi vene tau yaku mina sina neideyadi ri, bi gubuyo tora reyadi. 29Mina vene dadisi Iesu vanau risi taoniri moi yaku boyadi ini taoni are redo omuna ika yokoiri raravari maku negedi vo nisi.

30Idu mina vene tobo yaku bae boyo.

Amiye yokoi vima no nufa

(Mk 1.21-28)

31Iesu Capernaum, Galilee taoni yokoiri bosi Sabati medari amiye oteimagamo. 32Ye ini oteimana ago rofu tururu reyadi, adina ini ago bi

^k 4.18-19 Is 61.1-2 (LXX) ^l 4.24 Jn 4.44 ^m 4.25 1 Kgs 17.1 ⁿ 4.26 1 Kgs 17.8-16
^o 4.27 2 Kgs 5.1-14

vava nufa.^p ³³Usa usa yavari, amiye yokoi vima no ini rovaitari amegamo kaere bi goroka torari imuna nigasa niyo, ³⁴“Aee, Iesu Nazareth amiye, una rofu bi beika ura reisa? Ya bi una ukero vau regika okiyo ba? Na na diba ya bi kaere: ya bi Sei di Kikifa Amiye!”

³⁵Iesu yaku ni kaka reyo, “Babo ni. Mina amiye rofu yakusi di!” Kamini mina vima no yaku mina amiye ina vene atafu moisi konori maku nesi ini rovaitari yakusi ferei diyo. Idu mina vima yaku esika yokoi de maro.

³⁶Amiye tau bi tururu resi iniye iniye ni kaiteyadi, “Mina sina bi beika? Ina bi vava ma yeiva nufa vima no rofu ago gira nido ri feregasa yakudedi!” ³⁷Kamini Iesu yaku beika reyo sina gagani tora noibanuri urafo rei diyo.

Iesu yaku amiye tau moi buni riyo

(Mt 8.14-17; Mk 1.29-34)

³⁸Usa usa yava feresi Simon di yavari dui reyo. Simon di imokai rema bi gauka resi rovaita vakivaki reyo, ye ina vene yaku Iesu ina fafau usa usa niyadi. ³⁹Ye mina rema atafu are resi mina gauka besenai ago maro ri, rovaita vakivaki bi fereyo. Minari maka dadisi iruku dabara resi nari regamo.

⁴⁰Meda nei tomu niyo ma uru baiyo ri, ini vene gauka nufa vene tau tora Iesu rofu afei baiyadi; ini vana ina yokoi yokoi fafau aiyo ri, moi buni riyo. ⁴¹Ma vima no ka amiye tau rofu yakusi ababa nigasa, “Ya bi Sei di Mida mini!”

Idu Iesu yaku besenai ago nisi ago ga niyaganedi ni maro, adina ina vene bi ina diba ina bi Keriso.

Iesu usa usa yavari ini sina ni rausi reyo

(Mk 1.35-39)

⁴²Aru veyo ri, Iesu dadisi gagani autu sanari diyo, idu amiye tau gade yaku maina regamadi. Baku reyadi ri, bi moi gira reyadi ga diyaine vo nisi. ⁴³Idu ni kabai resi niyo, “Na bi Sei di ourefeidenana amena sana di sina buni taoni yokoi yokoiri ka ni rausi regasa digida, adina Sei yaku na moi feideyo dada.”

⁴⁴Ye Judea gagani di usa usa yavari ago ni rausi regamo.

Iesu yaku ini ourena usi dina vene raka niyo

(Mt 4.18-22; Mk 1.16-20)

5 ¹Meda yokoiri, Gennesaret^q koru moka tora seriri, Iesu are regamo ri, amiye tau tora iniye ina adinari, are rei desi Sei di ago neidegi

^p 4.32 Mt 7.28-29 ^q 5.1 Gennesaret Ini roka idana bi Galilee.

reyadi.^r ²Bouti remanu veyo koru seri adinari amededi ma oyena moidedi vene bi bouti feresi koru seriri ini oyena fate koitegamadi. ³Kamini Iesu yaku bouti yokoi, Simon di boutiri keu risi niyo keika maka beku rego ma koruri neyaine. Resi bouti odorori ameinu resi amiye tau gade oteimagi kora rego vo nisi.

⁴Ago ni vau reyo ri Simon rofu niyo, “Yi bouti koru mokari besa karoa rei bosu yi fate maku ne oyena moyainedi.”

⁵Idu Simon yaku ni kabai resi niyo, “Varika Amiye, urusa dobari moimai tora rei baiyafa idu be de uyafa. Idu ya yaku nisa dada dubusa fate younegida.”^s

⁶Makai reyadi ri, bi oyena tau tora iniye moyadi. Ini fate ka uesi regi reyo,^t ⁷dada ma asiyaka be bouti yokoiri rofu mina vana maragane vo nisi raka ni boyadi. Baiyadi rofu bouti remanu moi vata baiyadi ma kamini tomu negi regamo. ⁸Idu Simon Peter ya mina veyo ri, Iesu di efukari yuka odesi niyo, “Varika Amiye e, na rofu etagae ri! Na bi vegu no reida amiye!”

⁹Ye ina ini asiyaka tau sa tururu reyadi mina oyena tau moyadi rofu, ¹⁰Zebedee di mida remanu, James ma John, kaere bi Simon di asiyaka ka tururu reyadi. Ma Iesu yaku Simon rofu niyo, “Ori ga re, gua ari gutuna bi oyena koda rena kana amiye ni rutu regiya.”

¹¹Ini bouti vasari rutu rei baiyadi fufutari bi, ini beika baika feresi Iesu usi diyadi.

Iesu yaku refera amiye yokoi moi buni riyo

(Mt 8.1-4; Mk 1.40-45)

¹²Taoni yokoiri amegamo ri, bi refera amiye yokoi baiyo. Iesu veyo ri, bi ini efuka ini ne uruma konori odesi Iesu guyaguya niyo, “Varika Amiye e, ya ura reisa vo nisi, ya yaku na moi ruaka rigiya!”^u

¹³Iesu yaku ini vana moi roto risi mina amiye avaka moisi niyo, “Na yaku ura reida; ruaka ni!” Minari maka ini rovaitari refera gauka ferei diyo. ¹⁴Iesu yaku ago gira ina rofu niyo, “Amiye yokoi ga ni oteima, idu nesi Sei ma amiye utari naivo amiye oteimasi yi rovaita buni niyo kana ori sisika re. Ye amiye vegedi ya bi buni niyo Moses yaku ago girari niyo kana Sei rofu moi ori sisika regiya.”^v

¹⁵Idu Iesu yaku ini mina regamo, sina bi urafo rei tora iniye reyo. Mina dada, amiye tau gade egogo regamadi, sina neidegi ma gauka ita moi buni riyainedi vo nisi. ¹⁶Idu Iesu bi gagani autu sanari usa usa nigi etagae rigamo.

Iesu dibo anua yuka kevo amiye moi buni riyo

(Mt 9.1-8; Mk 2.1-12)

¹⁷Meda yokoiri, amiye ni oteimagamo ri, Pharisee vene ma ago gira oteimana vene be Iesu atafu amegamadi. Ina vene bi Galilee ma Judea rautu

^r 5.1-3 Mt 13.1-2; Mk 3.9-10; 4.1 ^s 5.5 Jn 21.3 ^t 5.6 Jn 21.6 ^u 5.12 *moi ruaka ri*: Mina gauka bi amiye moi kino rido. ^v 5.14 Lev 14.1-32

tauri ma Jerusalem gutuna baiyadi. Iesu bi Varika Amiye di vava bi ina sa amiye moi buni regika. ¹⁸Amiye be dibo anua yuka kevo amiye yokoi, madunari uakaisi afei baiyadi Iesu di ini neri aigedi vo nisi. Yava ideri gokai moi dui regedi mina maina regamadi. ¹⁹Amiye tau gade dada, moi dui rena bi anua reyadi. Dada yava tebori moi bosu ruba reyadi rofu maina dudu ini ekama sa Iesu di neri, amiye tau fogori moi neyadi. ²⁰Ye Iesu mina vene di mokena vari gira aina veifategasa niyo, “Ya amiye, yi vegu no bi koite makuyaka.”

²¹Ago gira oteimana vene ma Pharisee vene iniye ni kaitegasa niyadi, “Mina Sei di roka moi no rido amiye bi kaere? Vegu no koite makuna bi Sei yaku maka rego!”

²²Idu Iesu ini mokena veifatesi niyo, “Beika resi makai yi ukari mokededi? ²³Goina ago nigida bi rena gira dei, ‘Yi vegu no bi koite makuyo,’ o ‘Dadisi nana re?’ ²⁴Idu, ya vei mama regedi Amiye di Mida bi vava nufa konori vegu no koite makugo.” Kamini Iesu yaku dibo anua yuka kevo amiye rofu niyo, “Ya nida dadisi yi ekama vanau moisi rautu di!”

²⁵Ye minari maka amiye tau di nemokori dadisi ini varegamo ekama moisi Sei di roka moi odoro regasa ini yavari diyo. ²⁶Amiye tau noibanu tururu reyadi. Ori yaku vata baisi Sei di roka moi odoro resi nigamadi, “Gua medari mina asini vegu de vesifa mina veyafa!”

Iesu yaku Levi raka niyo
(Mt 9.9-13; Mk 2.13-17)

²⁷Mina reyo fufutari bi yakusi nesi fore butu redo amiye roka Levi ini fore butu rena ofesiri amedo mina veyo. Ina rofu niyo, “Na usi bae.” ²⁸Ma dadisi ini gugura tau feresi usi diyo.

²⁹Kamini Levi ini yavari yaku Iesu di iruku tora reyo ma fore butu rededi vene tau gade ma bouna vene ka mina iruku sanari ameinu regamadi mini. ³⁰Idu Pharisee vene ma ini ago gira oteimana vene bi ago tau nisi Iesu ini usi dina vene ni kaiteyadi, “Beika resi ya bi fore butu rededi vene ma vegu no rededi vene sa iruku iridedi?”^w

³¹Ye Iesu ni kabai resi niyo, “Gauka de amiye bi gauka dogo amiye de mokegedi, idu gauka vene maka. ³²Na bi mokena rorobo vene rofu disi raka nigi de okiyaka, idu vegu no rededi vene rofu okiyaka ina yaku ini vegu no feresi moi etagae riyaine.”

Oyo rena di sina
(Mt 9.14-17; Mk 2.18-22)

³³Amiye be yaku Iesu niyadi, “John di usi dina vene bi ariu Sei rofu usa usa nigasa oyo rededi, ma Pharisee di usi dina vene makai ka rededi, idu yi usi dina vene bi iruku iri tavoi rededi.”

^w 5.30 Lk 15.1-2

³⁴Idu Iesu yaku ni kabai reyo, “Rema mego amiye yaku ini asiyaka vene sa ameibigo ri, iruku oyo regedi ba ide? Ide mada!^x ³⁵Idu mina meda baigo ri rema mego amiye moi digedi, mirona medari mamu iruku oyo regedi.”

³⁶Iesu yaku ina vene rofu mina mokena ago ka niyo, “Amiye yokoi de varuka ruaka tu yokoi de uesi resi varuka kori di ruba fafa rigi de rego. Makai rego ri, bi varuka ruaka uesi rego ma ini tu kori sa de rorobo nigo. ³⁷Ma amiye yokoi de waini ruaka moisi waini kori di ro ideri ago. Makai rego ri, bi waini ruaka di ro ufategedi ma waini rausi rego ma ro bi no nigedi. ³⁸Mina dada waini ruaka bi waini di ro ruaka ideri rausi regiya!^y ³⁹Waini iriyo amiye bi ruaka bi de irigo, adina bi nigo, ‘Waini kori bi buni iniye.’”

Sabati meda di ni kaitena ago

(Mt 12.1-8; Mk 2.23-28)

6 ¹Kamini Sabati medari Iesu ma ini usi dina vene sa witi muro idari nana diyadi. Ini usi dina vene yaku witi di ada koma resi ini vanari fufuta resi irigamadi.^z ²Idu Pharisee vene ina rofu niyadi, “Beika resi beika Sabati meda una rofu bi tabu mina rededi?”

³Ma ni kabai resi niyo, “Ya bi bura de veyadi beika David ini amiye sa yaku reyadi mirona medari rauna reyadi ri?^a ⁴Sei di yava ideri dui resi Sei rofu mana beredi moisi irisi ini vene ka maro. Ago gira yaku nido bi tabu Sei ma amiye utari naivo vene maka bi mina beredi irigedi.”^b

⁵Resi ina vene rofu niyo, “Amiye di Mida bi Sabati meda di Varika Amiye.”

Vana kevo amiye

(Mt 12.9-14; Mk 3.1-6)

⁶Kamini Sabati meda yokoiri, usa usa yavari dui resi amiye oteimaro ri, mironari bi vana rama kevo amiye amegamo. ⁷Ago gira oteimana vene ma Pharisee vene vegamadi Sabati medari mina amiye moi buni rigo vo nisi bi ini no dada nisi tourage regika. ⁸Idu mina vene di mokena bi sena vesi mina vana kevo amiye rofu niyo, “Dadisi mina vene di nemokori are re.” Dadisi are reyo ri, bi ⁹ina vene rofu ni kaiteyo, “Ya usa nida, beika vegu bi buni ago gira dudu Sabati medari regiya? Vegu buni regiya o vegu no regiya ba? Amiye di vegu moi rigiya o umuyegiya ba?” ¹⁰Resi ina vene tau gade nene resi mina amiye rofu niyo^c, “Yi vana ae roto ri.” Ma reyo ri, bi ini vana dubusa dairi buni niyo.

^x 5.34-35 Jn 3.29 ^y 5.38 Iesu yaku senagi vegu rena ma ruaka vegu rena sa de moi tanu reyo. Jn 1.17, Rom 10.4, 2 Cor 3.6 baku re. ^z 6.1 Deut 23.25 ^a 6.3-4 1 Sam 21.1-6
^b 6.4 Lev 24.9 ^c 6.10 niyo; bura bedakai gubuyo resi niyo nufa.

¹¹Idu mina vene di mokena gubuyo yaku vata baiyo ma Iesu rofu beika regedi iniye ni dodi regamadi.

Iesu ini ni feidena vene tuero moiyo
(Mt 10.1-4; Mk 3.13-19)

¹²Mina ariri bi, Iesu omuna yokoiri usa usa nigi boyo, urusa doba Sei rofu usa usa nigamo. ¹³Aru uveyo ri, ini usi dina vene raka nisi tuero moisi ini roka maro bi ni feidena vene: ¹⁴Simon (ini roka yokoi Iesu yaku ka niyo bi Peter) ma ini usika Andrew; James ma John, Philip ma Bartholomew, ¹⁵Matthew ma Thomas, Alphaeus di mida James, ma Simon Zealot,^d ¹⁶James di mida Judas ma Judas Iscariot, kaere bi Iesu tautore riyo amiye niyo.

Iesu amiye oteimasi gauka moi buni riyo
(Mt 4.23-25)

¹⁷Kamini ina vene sa deyadi ma nomuri ini usi dina vene tau gade sa are reyadi. Ma Judea gagani vene ma Jerusalem vene tau gade, ma Tyre ma Sidon kone vene tau gade ka minari; ¹⁸ini okiyadi bi Iesu di ini sina neidegi ma ini gauka moi buni riyainedi. Ma kaere vima no ini rovaitari ka Iesu negau deyadi ina yaku moi buni rigamo. ¹⁹Amiye tau Iesu avaka moigika vo nisi regamadi adina vava ina rofu yakugamo ri, bi amiye tau gade moi buni rigamo.

Ada rena ma iriyeduka rena
(Mt 5.1-12)

²⁰Iesu yaku ini usi dina vene rofu vesi niyo,
“Ya kaere ina diba ini vimari Sei di gugura buni nokoi de bi ada regedi,

adina Sei di ourefeidenana amena sana bi yi!

²¹Gua, ya rauna rededi vene bi ada regedi;
adina Sei yaku yi iruku ya mago mironi ma yi uka bere nigedi!
Gua, ya isaka nidedi vene bi ada regedi;
adina yoga nigedi mironi!

²²“Amiye yaku ya rofu gubuyo resi fufuta masi ya rofu ni fafana resi yi roka moi no regedi ri, Amiye di Mida usi dina dada, bi ada regedi!^e
²³Mirona medari, ada resi adena ufa, adina yi obini omari moigedi bi tora, adina mina vegu makai dudu ini tutubena yaku Sei di ago niyadi vene rofu reyadi.^f

²⁴“Idu no baigo mironi ya kaere gua bi gugura tau vene,

^d 6.15 Zealot Mina bi Rome vene meki regamo amiye yokoi. *Auna rena ago di ini oteimana ago ideri baku re.* ^e 6.22 1 Pet 4.14 ^f 6.23 2 Chr 36.16; Acts 7.52

yi vegu moi buni rena bi gua moigedi mini!

²⁵ No baigo mironi, ya gua kaere iruku tau iridedi;
rauna regedi mironi!

No baigo mironi ya kaere gua yoga nidedi bi;
isaka nigasa guruo amegedi mironi!

²⁶ “Amiye tau yaku ya ni buni regedi ri, bi no baigo ya rofu; yi tutubena vene yaku mina ago yokoi maka Sei di ago nidedi ofa vene rofu nigamadi.

Uka mana tuma vene rofu

(Mt 5.38-48; 7.12a)

²⁷ “Idu na neidededi vene ya rofu nida: yi tuma vene rofu uka masi ya rofu gubuyo rededi vene rofu buni refa. ²⁸ Ya karaini rededi vene rofu bi buni tora gade masi ya no rededi vene rofu bi Sei rofu usa usa nifa. ²⁹ Amiye yokoi yaku yi ragena famago ri, bi berou ka ma kumo famaraine. Ma amiye yokoi yaku yi serti moigo ri, bi ferei kaini yi fafau varuka ka ma. ³⁰ Amiye neinei ya rofu ya usa nigo ri, bi mina ma; ma kaere ya rofu yi beika be moigo ri, dairi ya marainedi bi ga ni. ³¹ Ya ura rededi amiye yaku ya rofu rebigedi kana, ina rofu makai refa.^g

³² “Ye ya uka madedi vene maka uka magedi vo nisi bi gokai resi Sei buni tora gade ya mago? Vegu no rededi vene ka ina rofu uka madedi vene maka rofu uka madedi! ³³ Ma ya rofu buni rededi vene maka rofu buni regedi vo nisi bi gokai resi Sei buni tora gade ya mago? Vegu no rededi vene ka makai rededi! ³⁴ Ya ya diba ina dairisi ya magedi vo nisi maisa ri, bi gokai resi Sei buni tora gade ya mago? Vegu no rededi vene ka vegu no rededi vene rofu madedi, maradi kana dairi moigi maka! ³⁵ Idu yi tuma vene rofu uka ma. Vegu buni ina rofu resi masi ya rofu dairi moigiya di mokena bi ga moke. Makai dudu bi yi buni tora gade moigiya resi ya bi Sei Odoro Iniye di ini mida vene. Adina ina kaya kaere amiye ina rofu ni buni de rededi vene ma vegu no rededi vene rofu ka mokei tora redo. ³⁶ Amiye rofu iriyeduka refa, yi Baba ka bi iriyeduka ya rofu redo kana.

Amiye be rofu kota rena

(Mt 7.1-5)

³⁷ “Amiye di no rofu ga mokei no refa, ma Sei yaku ka yi no rofu mokei no de rego. Amiye be di nori emana ga refa, ma Sei ka yi nori de ya emago. Amiye di vegu no mokei toto nifa, ma Sei yaku yi vegu no mokei koina nigo. ³⁸ Amiye be rofu mafa, ma Sei yaku ya rofu mago. Yi dura moi vata baigo ri moi varaka varaka resi besa ma vata baibigo regasa

^g 6.31 Mt 7.12

rausi rebigo, kamini ya bi ya rofu beika rau resi bi uka bere nigedi. Adina ya amiye gokai toe madedi kana, Sei yaku mina toe dairi ya mago.”

³⁹Ma mokena ago ina vene rofu niyo, “Ne taufa amiye yaku ne taufa amiye bi de ourefeidego. Makai ina remanu sokuri gogo keto regedi.^h

⁴⁰Usi dina amiye yaku bi oteimana amiye ebu de rego, idu oteimado mokena tau mina ina tau noibanu yaku moigedi ri, bi ina oteimana amiye kana nigedi.ⁱ

⁴¹“Beika resi bubudo yi usika ourena di nemokori bi veisa, idu yabo rata yi nemokori bi de ni dodi reisa? ⁴²Gokai ida dudu yi usika ourena rofu nigiya, ‘Dubu na ferei kumo yi nemokori bubudo amedo mina moigida,’ ma ya kaya yi nemokori yabo rata amedo bi de veisa? Ofarosi amiye, yi nemokori yabo rata amedo mina siko moi etagae rigiya, mamu vei mona resi yi usika ourena di nemokori bubudo amedo mina moi etagae ri.

Yabo ma ini meko
(Mt 7.16-20; 12.33-35)

⁴³“Adina yabo buni yaku meko no de varededi, ma yabo no yaku ka meko buni de varededi. ⁴⁴Ye yabo yokoi yokoi bi ini meko dudu vei mama regiya. Imiye tafari fuka meko butu de regiya. Waini di meko ka imiye yabo rofu butu de regiya.^j ⁴⁵Amiye buni yaku ini ukari beika mokedo bi buni dada, vegu buni moi baido ma amiye no yaku ini ukari beika mokedo bi no dada, vegu no moi baido, adina beika uka ideri makudo bi ini vena yaku nido mini.^k

Yava rina amiye remanu
(Mt 7.24-27)

⁴⁶“Ya vene bi na rofu nidedi, ‘Varika Amiye e’ idu beika resi na yaku nida kana bi de rededi? ⁴⁷Amiye tau na rofu baisi nai ago neidesi regedi bi gokai kana amiye ya oteimagida. ⁴⁸Ina bi amiye yokoi yava akugamo kana, kono goesi guri iniye resi fore fafau ini yava moi are reyo. Kamini abata deyo ri, koru yaku nesi ini yava uyo ri de moi kita reyo, adina bi mina yava bi aku mona reyo dada. ⁴⁹Amiye kaere yaku nai ago neidesi de rego bi amiye yokoi kana kaere bi ini yava vasa fafau akuyo; abata yaku ini yava uyo ri, bi minari maka yareyo — ini mina yareyo bi no iniye!”

Iesu yaku Rome di iya rededi vene di ourefeidenana amiye di naivo amiye buni riyo
(Mt 8.5-13)

7 ¹Amiye rofu ini sina tau ni vau reyo ri, bi Capernaum ri okiyo.
²Rome di iya rededi vene di ourefeidenana amiye yokoi di moimai rei

^h 6.39 Mt 15.14 ⁱ 6.40 Mt 10.24-25; Jn 13.16; 15.20 ^j 6.44 Mt 12.33 ^k 6.45 Mt 12.34

tavoi redo amiye yokoi bi gauka reyo; ina bi muyena gauka moiyo. ³Mina iya rededi vene di ourefeidenana amiye yaku neideyo bi Iesu bi Capernaum ri, bi ago ni feideyo Jew tora vene be rofu, buni baisi ini moimai rei tavoi reyo amiye moi buni riyainedi ba ide. ⁴Iesu rofu baisi ni guba regasa niyadi, “Mina amiye vana magiya bi buni. ⁵Adina uni vene rofu uka mado dada, una rofu uni usa usa yava bi ina yaku riyo.”

⁶Kamini Iesu ina vene sa boyadi. Yava adina okiyadi ri, bi mina iya rededi vene di ourefeidenana amiye yaku ini asiyaka vene rofu ini ago ni feideyo Iesu rofu niyadi, “Varika amiye e, gokai mokegiya ri, bi ga devo adina na bi roboro de ya yaku nai yavari bogiya. ⁷Mina dada na ka ya rofu baigida bi buni de, idu sina nigiya ma nai naivo amiye buni nigo. ⁸Na ka bi amiye be gabireri aiyo ma ameida dada; iya rededi vene be bi nai gabireri amededi. Na yaku yokoi rofu nida, ‘Bo!’ vo nida ri bodo; ma yokoi rofu nida, ‘Bae!’ vo nida ri baido; ma nai moimai rei tavoi redo amiye rofu nida, ‘Mina re!’ vo nida ri redo.”

⁹Iesu mina ago neidesi bi tururu resi kero resi amiye tau gade kaere ina rofu usi diyadi niyo, “Ya nida, Israel ri ka mokena vari gira aina makai de baku reyaka!”

¹⁰Mina ni feideyo vene yavari dairiyadi ri, bi ini moimai rei tavoi reyo amiye bi buni niyo.

Iesu yaku obu di mida moi dadiyo

¹¹Meda doba de,¹ Iesu yaku taoni yokoi roka Nain ri ini usi dina vene ma amiye tau gade sa boyadi. ¹²Taoni ida venau okiyo ri, bi muyena amiye yokoi, guri aigi, uakai yakuyadi. Mina muyena amiye bi obu yokoi di ini mida yokoi maka ma taoni di amiye tau gade gade ka mina obu sa. ¹³Varika Amiye yaku veyo ri, iriyeduka resi ina rofu niyo, “Isaka ga ni.” ¹⁴Kamini, baisi muyena maua avaka moiyo ri, bi uakaidedi vene are reyadi. Iesu yaku niyo, “Mida godua, na yaku ya nida, dadi!” ¹⁵Kamini, mina muyena godua dadisi ameinu resi ago niyo ma Iesu yaku ini nono maro.

¹⁶Ma amiye tau noibanu ori no iniye resi Sei di roka moi odoro regasa niyadi, “Sei di ago nido amiye tora yokoi una fogori ogau niyo mini!” Resi ka niyadi, “Sei yaku ini vene rofu vana magi okiyo mini!”

¹⁷Kamini mina vegu di sina bi Judea gagani tau ma ina adina gagani negau tauri urafo reyo.

John Baptist ni feideyadi vene

(Mt 11.2-19)

¹⁸John Baptist di usi dina vene yaku mina sina tau ni oteimaradi. Kamini ini usi dina amiye remanu roka nisi ¹⁹ni feideyo Varika Amiye rofu bosi ni kaitegedi, “Ya bi baigo amiye ba, o amiye yokoi tua regifa?”

¹ 7.11 *Meda doba de*; bura bedakai *Ari uveyo ri* nufa.

²⁰Ina remanu ina rofu boyadi ri niyadi, “John Baptist yaku una ni feidesi usa usa nigi niyo, ‘Ya bi baigo amiye ba, o amiye yokoi tua regifa?’”

²¹Mina medari, Iesu yaku amiye tau gade moi buni riyo; gauka vene, esika vene, vima no yaku moiyo vene, ma ne taufa vene ka moi buni riyo ma dubusa nene reyadi. ²²Kamini ina vene rofu ni kabai resi niyo, “Bosi John rofu beika vegasa neideyadi nifa: ne taufa vene vededi, yuka no vene nana rededi, refera nufa vene bi moi ruaka niyadi,^m anema kora vene bi neidededi, muyena vene bi veguri edadiyo, ma ago buni bi irava vene rofu ni rausi reyo.ⁿ ²³Ma kaere na rofu mokei itu de rego bi buni tora gade ina rofu mago!”

²⁴John di ago moi raga rededi vene diyadi ri, bi amiye tau gade John fafau ago nigi kora reyo, “Ya bi beika vegi gagani autu sanari boyadi? Doi iye aura yaku moi raudai redo mina vegika ba? ²⁵Idu mironari beika vegika boyadi? Varuka burefe rido amiye ba? Mina kana varuka burefe ridedi ma beika baika burefe moiga irigasa amededi vene bi kini di yavari amededi! ²⁶Idu beika vegika boyadi? Sei di ago nido amiye yokoi ba? Yo, ya vene rofu nida, ina bi Sei di nido amiye, idu ina bi isivaga iniye. ²⁷Mina amiye bi kaere bi bura reyo: ‘Sei yaku makai niyo; nai ago moi raga redo amiye yi budari ni feidegida. Yi ida moi dogo rego.’^o ²⁸Ya vene rofu nida, amededi tau vakoiri bi yokoi yaku John ebu rena de redo. Idu Sei di ourefeidenana amena sanari bi kaere amiye roka de mina yaku bi John ebu redo.”

²⁹Amiye tau vakoi ma fore butu rededi vene ka mina sina neideyadi ri, bi Sei di vegu bi rama vo niyadi, adina bi John yaku babatiso reyo dada.^p ³⁰Idu Pharisee vene ma ago gira oteimana vene bi John di babatiso de moyyadi dada, Sei di mokena ina vene rofu bi makuyadi.

³¹Iesu yaku niyo, “Ye gua amededi vene bi gokai dudu ni rorotari regida? Ina bi gokai kana? ³²Ina bi mida keika keika kana, maketi sanari amegasa iniye iniye rofu raka nisi nidedi, ‘Una bi ya rofu bibo uyafa, idu ya bi adena de uyadi; muyena yauta niyafa, idu ya bi isaka de niyadi!’ ³³Adina John Baptist baisi beredi oyo regasa waini de irigamo ri, kamini niyadi, ‘Ina bi vima no nufa!’ ³⁴Amiye di Mida baisi iruku irisi waini irigamo ri, ya vene yaku niyadi, ‘Mina amiye vefa! Ina bi iruku ma waini irina kurakura amiye. Ina bi fore butu rededi vene ma vegu no vene di asini!’ ³⁵Idu Sei di mokena tora yaku vegu beika tau ini vene rededi dudu una oteimado bi rama mini.”

Iesu bi Pharisee amiye ini roka Simon di yavari ameinu reyo

³⁶Pharisee yokoi yaku Iesu niyo ini yavari vakoi iruku irigedi, dada Iesu ini yavari bosu iruku irina sana boi ameinu reyo. ³⁷Mina taoniri vegu

^m 7.22 *moi ruaka niyadi*: 5.12 baku re. ⁿ 7.22 Is 35.5-6; 61.1 ^o 7.27 Mal 3.1
^p 7.29-30 Mt 21.32; Lk 3.12

no redo rema yokoi yaku neideyo bi, Iesu bi Pharisee amiye di yavari amegasa iruku irigamo, dada fore roka alabaster dudu riyadi siua yokoi, ideri bi diga di sisika buni vata baiyo, mina moi boyo.^q ³⁸Bosi Iesu di yuka atafu fufuta are resi isaka niyo. Ini isaka ne koru dudu Iesu di yuka moi dou regi kora resi ini ada iye dudu moi ifi regamo, moi roko rego vo nisi. Ini yuka rafo fuka resi diga rausi reyo. ³⁹Kamini, Iesu raka niyo Pharisee amiye mina yaku veyo ri, ini uka ideri iniye niyo, “Mina amiye bi Sei di ago nido amiye vo nisi bi veyadu mina bi gokai kana rema yaku avaka moido. Adina mina rema bi vegu no redo rema!”

⁴⁰Kamini Iesu yaku ni kabai resi niyo, “Simon na bi sina yokoi ya rofu nigida.”

Ni kabai resi niyo, “Oteimana amiye, na rofu ni.”

⁴¹Iesu yaku niyo, “Amiye remanu yaku amiye yokoi rofu fore abitore reyadi; yokoi bi meda 500 di moimai di fore moi tavoi reyo, ma yokoi bi meda 50 di moimai di fore moi tavoi reyo. ⁴²Ina remanu bi mina fore dairi mana anua reyadi. Dada mina amiye ina remanu rofu fore dairi magedi mokena ga moyagane vo niyo. Goina yaku bi ina rofu uka tora gade mago?”

⁴³Simon yaku niyo, “Nai mokena bi ina rofu fore iniye moi toka reyo amiye yaku.”

Ma Iesu yaku niyo, “Ya bi rama nisa.” ⁴⁴Kero resi mina rema rofu resi Simon rofu niyo, “Mina rema veisa? Yi yava dui reyaka ri, nai yuka koitegi koru de na maro, idu ina bi nai yuka rafo bi ini ne koru dudu moi dou resi ini ada iye dudu moi roko reyo. ⁴⁵Ya bi de na fuka reyo, idu dui reyaka ri gutuna bi, nai yuka rafo fuka redo mina bi ferena de mini. ⁴⁶Nai adari diga rausi de reyo, idu ina bi nai yuka rafori diga di sisika buni erausi reyo. ⁴⁷Mina dada, ya nida, mina rema ini uka mana tora gade iniye dada, ini vegu no tau gade ka koite makuyo. Idu ini vegu no keika maka amiye bi koite makuyo, ini uka mana ka keika maka.”

⁴⁸Kamini Iesu yaku mina rema rofu niyo, “Yi vegu no bi koite makuyaka.”

⁴⁹Ina sa vakoi iruku iridedi vene yaku iniye ni kaitesi niyadi, “Mina bi kaere, vegu no ka koite makudo?”

⁵⁰Kamini Iesu yaku mina rema rofu niyo, “Yi mokena vari gira aina yaku ya moi vegu riyo; uka amuta dudu di.”

Rema be bi Iesu sa

8 ¹Mina fufutari Iesu yaku taoni ma rautu digasa ago buni ni rausi regamo; Sei di ourefeidenana amena sana di ago buni nigamo ri ini usi dina vene tuero ina sa boyadi ²ma rema be ka, kaere bi Iesu yaku vima

^q 7.37-38 Mt 26.7; Mk 14.3; Jn 12.3

no meki reyo, ma be bi ini gauka moi buni riyo: Mary, kaere ini roka bi Magdalene, ina rofu bi, Jesu yaku vima no viro vara meki rei ini rovaitari yakuyo.^r ³Ma yokoi bi Joanna, ini maruka Chuza bi Herod di ini yava nari redo amiye, ma Susanna ka bi rema yokoi, ma rema tau ka ina vene yaku ini gugura dudu Jesu ini usi dina vene sa nari regamadi.

Oga varina amiye di mokena ago

(Mt 13.1-9; Mk 4.1-9)

⁴Taoni neinei vene tau gade gade ina rofu baisi egogo reyadi ri, ina yaku mokena ago yokoi niyo:

⁵“Amiye yokoi ini yoyava varigi diyo. Ye yoyava vari vari reyo^s ri bedakai bi yuka rafo adina sanari yareyadi ma amiye yaku etei ri fufuta reyadi ma oma di erena yaku iri vau reyadi. ⁶Be bi abita fore odoro yareyadi. Dadiyadi ri, bi abiye niyadi, adina kono bi roko dada. ⁷Ma be bi imiye tafa fogori yaresi vakoi boi tora niyadi ma imiye yaku fafa risi fono reyadi. ⁸Ma be bi kono buniri yaresi imu resi rama 100 niyadi.”

Mina ago niyo ri, ni tora resi niyo, “Kaere neidego, bi neideyaine!”

Mokena ago di ida

(Mt 13.10-17; Mk 4.10-12)

⁹Kamini ini usi dina vene yaku ni kaiteyadi mina mokena ago ni rorotari reyaine. ¹⁰Kamini niyo, “Ya bi Sei di ourefeidenana amena sana di kiki ago diba nigika bi ya maro, idu idana vene rofu mokena ago maka nida; ye yomakai vededi, idu vei mama de rededi; ma neidededi, idu diba de nidedi.^t

Iesu oga varina amiye di mokena ago ni rorotari reyo

(Mt 13.18-23; Mk 4.13-20)

¹¹“Mina mokena ago di ini adina bi yomini: yoyava bi Sei di ago. ¹²Amiye bedakai bi yuka rafo ida sanari yoyava yareyadi kana. Ago neideyadi ma Bodaka yaku baigasa ini uka mekori mina ago moi diyo, mokena vari gira aigedi ma moi vegu rigo baebu. ¹³Ma bedakai bi ago neidesi ada dudu moiyadi bi yoyava abita foreri yareyadi kana. Idu ini daru bi de, ma mokena vari gira aina doba de regedi. Ye uka maina regi baigo ri, bi you feidegedi. ¹⁴Ma amiye be bi imiye tafa fogori yareyadi kana. Mina vene bi ago neideyadi, idu mina vegu di mokena toe ma gugura tau gade ma vegu buni buni bi moi forovai reyadi, ye ina bi meko varena de reyadi. ¹⁵Idu amiye be bi kono buniri yoyava yareyadi kana; ago neidesi ini uka buniri moi gira risi yavoi resi toro dudu rama nidedi.

^r 8.2-3 Mt 27.55-56; Mk 15.40-41; Lk 23.49 ^s 8.5 Mirona medari amiye yaku yoyava varigasa kono fafau makuyadi. ^t 8.10 Is 6.9-10 (LXX)

Ramefa takura ideri*(Mk 4.21-25)*

¹⁶“Amiye yokoi yaku ramefa orisi moi disi takura ideri o ekama gabireri de aigo. Idu, ina bi ini ikina sanari ikigo ye kaere yava dui rededi ka vabara vegedi.”¹⁷“Adina gokai beika sui niyadi bi yakusi ogau nigedi ma gokai beika bou riyadi bi bou uyounegedi.”

¹⁸“Ya beika neidededi bi mokei mona refa! Amiye kaere ini beika baika nufa bi moi tanu mago. Idu kaere ina bi de iniye iniye nufa, ka ina rofu ini mokena keika amedo, bi moi dairigo.”^w

Iesu ini nono ma ini dubuiyaka sa*(Mt 12.46-50; Mk 3.31-35)*

¹⁹Kamini Iesu ini nono ma ini dubuiyaka ina rofu vegi baisi bi anua reyadi adina bi amiye tau gade dada. ²⁰Resi ni oteimaradi, “Yi nono ma yi dubuiyaka bi etofaro are resi ini ura bi ya vegi rededi.”

²¹Idu ni kabai resi niyo, “Nai nono ma nai dubuiyaka bi Sei di ago neidesi rededi vene.”

Iesu yaku miya ma aura moi amuta riyu*(Mt 8.23-27; Mk 4.35-41)*

²²Meda yokoiri Iesu ini usi dina vene sa bouti yokoiri keu risi niyo, “Una koku moka tora berou eta rofu boi nenadi.” Dada boyadi. ²³Boyadi ri Iesu vareyo, kamini aura yeiva tora koku moka tora fafau fu reyo ye koku yaku boutiri vata baigamo, ina bi no baku reyadi dada. ²⁴Ini usi dina vene ina rofu bosu edadisi niyadi, “Ourefeidena amiye, una bi kamini muyegifa!”

Iesu dadisi aura ma ureure besenai ago maro ma aura bere niyo ma koku moka tora amuta niyo. ²⁵Resi ina vene rofu niyo, “Yi mokena vari gira Sei rofu aina bi goini?”

Idu ina vene bi ori resi tururu resi iniye iniye rofu niyadi, “Ye mina amiye bi gokai kana amiye? Aura ma koku tafo rofu besenai ago mado ri ka neidededi!”

Iesu yaku amiye vima no nufa moi buni riyu*(Mt 8.28-34; Mk 5.1-20)*

²⁶Iesu di usi dina vene sa Galilee koku moka tora berou eta rofu Gerasa^x gaganiri okiyadi. ²⁷Soka reyo ri, mina taoni amiye nokoi vima no ina sa amegamo baisi ina baku reyo. Ina bi senagi iniye varuka rina

^u 8.16 Mt 5.15; Lk 11.33 ^v 8.17 Mt 10.26; Lk 12.2 ^w 8.18 Mt 25.29; Lk 19.26

^x 8.26 *Gerasa*; bura bedakai *Gadara* nufa (Mt 8.28 baku re); idana *Gergesa* nufa.

de digamo. Ina bi yavari amena de idu ina bi amiye guri sana fore rubari amegamo. ²⁸Iesu veyo ri, ababa nisi ini yuka atafu keto resi raka ni tora reyo, “Iesu Oma Oodoro Sei di Mida, beika resi na rofu baisa? Ya ni guba reida, esika na mana ga re!” ²⁹Mina kana niyo ini adina bi Iesu yaku sena mina vima no niyo yakuyainedi vo nisi. Seini dudu yuka vana ukita risi nari regamadi, idu meda tau vima no yaku moiyo ma mina seini moi ubaki reyo ma gagani autu sanari moi afei bogamo.

³⁰Kamini Iesu yaku ni kaiteyo, “Yi roka bi beika?”

“Nai roka bi ‘Taugadegade’,” vo niyo — adina bi vima no tau gade bi ina ideri amegamadi. ³¹Vima no yaku Iesu ni guba reyadi kono ruba moka torari^y ga moi feideyaine.

³²Mironari bi dona tau gade atafu, omuna ikari ina vana irigamadi. Ye vima no yaku Iesu guyaguya niyadi mina dona tau rovaita ideri dui regedi. Ni feideyo ma ³³vima no mina amiye di rovaitari yakusi dona tauri dui reyadi. Mina dona tau raravari raga nesi koru moka torari yoyo resi koruri sofuri nisi muyeyadi.

³⁴Dona vana regamadi vene bi ori disi beika vata niyo ma veyadi mina taoniri ma gagani gaganiri sina ni digamadi. ³⁵Amiye diyadi beika vata niyo mina vegedi vo nisi. Iesu rofu okiyadi ri, bi mina amiye veyadi, kaere bi vima no tau gade gade ini rovaitari ideri yakuyo, bi mironari Iesu di yuka atafuri amegamo rovaita dogo resi mokena rorobo dudu, ma ina tau noibanu ori reyadi. ³⁶Mina vegu veyadi vene yaku amiye nigamadi gokai mina vima no yaku moidedi amiye buni niyo. ³⁷Kamini mina gagani tau vene yaku Iesu guyaguya niyadi, ina vene ferei diyainedi, adina ina vene bi ori yaku no iniye niyadi. Ye ina yaku boutiri keu risi diyo. ³⁸Mina vima no fereyadi amiye yaku Iesu usi digo vo nisi usa niyo.

Idu Iesu yaku ni feidegasa niyo, ³⁹“Rauturi dairisi Sei yaku beika vegu buni ya rofu reyo ni digiya.”

Dada dairi nesi taoni noibanuri Iesu yaku ina rofu beika reyo mina ni rausi regasa diyo.

Jairus di vefa ma rema yokoi kaere Iesu di varuka avaka moiyo
(Mt 9.18-26; Mk 5.21-43)

⁴⁰Iesu dairiyo ri, amiye tau yaku faiva niyadi, adina ina tau noibanu bi ina nari regamadi. ⁴¹Kamini amiye nokoi ini roka Jairus okiyo. Ina bi usa usa yava di ourefeidenana amiye yokoi. Iesu di yuka adinari you makusi guyaguya niyo ini yavari boyagane, ⁴²adina bi ini vefa yokoi maka ini lagani bi tuero kana bi muyena tumu sa.

^y **8.31** *kono rubari*: Jew vene di mokena bi vima no kono ruba ideri dibura aigedi, ini meda koina nigo ma ini kaunava meda okigo ri. Rev 20.3 baku re.

Mironari bodo ri, bi amiye tau yaku fafa riyadi. ⁴³Rema yokoi bi lagani tuero rema di gauka gura ugamo. Ini fore tau gade gauka dogo vene rofu makuyo,^z idu yokoi yaku moi buni de riyo. ⁴⁴Ina bi Iesu di fufutari baisi ini varuka tu avaka moiyo ri, evade bi ini dava degamo koina niyo. ⁴⁵Ma Iesu yaku niyo, “Kaere yaku na avaka moiyo?”

Yokoi yaku nina de reyadi ri, bi Peter yaku niyo, “Ourefeidena amiye, amiye tau gade ya sa didedi mini, mina tau yaku ya fafa ridedi.”

⁴⁶Idu Iesu yaku niyo, “Amiye yokoi yaku na avaka moiyo, adina na na diba bi vava nai rovaitari yakuyo.” ⁴⁷Mina rema yaku veyo bi ina bi baku reyo dada tururu resi Iesu di yuka rafo adinari iniye you makuyo. Minari amiye di nemokori niyo beika resi ina avaka moiyo ma gokai minari maka buni niyo. ⁴⁸Ma Iesu yaku ina rofu niyo, “Nai vefa, yi mokena vari gira aina yaku ya moi buni riyo. Uka amuta dudu digiya.”

⁴⁹Kamini Iesu mina nigamo ri, Jairus, kaere bi usa usa yava di amiye tora, bi naivo naivo amiye yokoi ini yava gutuna ina rofu okisi niyo, “Yi vefa bi muyeyo. Beika resi mina oteimana amiye rofu toga mokena moigasa ameisa?”

⁵⁰Idu Iesu yaku neidesi Jairus rofu niyo, “Ori ga re; mokena vari gira maka aigiya ri, bi buni nigo.”

⁵¹Iesu Jairus di yavari okiyo ri, bi amiye yokoi ina sa afena de reyo, idu Peter, John ma James, ma mina rema mida keika ini nono baba sa maka. ⁵²Amiye tau minari uka vorivori regasa isaka nigamadi mina mida keika dada. Iesu yaku niyo, “Isaka ga nifo; mida keika bi muyena de — idu bi neota varedo!”

⁵³Ina rofu yoga nigamadi adina ina diba bi muyeyo. ⁵⁴Idu Iesu yaku rema mida keika di vana moisi ina rofu raka nisi niyo, “Rema mida keika, dadi!” ⁵⁵Ini vegu dairiyo ri, bi minari maka dadiyo ma Iesu yaku iruku be magedi ma iriyainedi, vo niyo. ⁵⁶Ini nono baba bi tururu reyadi, idu Iesu yaku amiye yokoi mina vegu vata niyo ga niyaganedi vo niyo.

Iesu yaku ini usi dina vene tuero ni feideyo

(Mt 10.5-15; Mk 6.7-13)

9 ¹Kamini Iesu ini usi dina vene tuero raka ni egogo resi vima no tau meki regi ma gauka vene moi buni rigi vava maro. ²Resi ni feideyo, Sei di ourefeidena amena sana di sina ni rausi regasa digedi resi gauka vene moi buni riyaganedi. ³Ina vene rofu niyo, “Gugura bi yokoi de idari moigedi: yukana bi de, dura bi de, iruku bi de, ma fore bi de. Varuka yokoi maka akugedi.^a ⁴Goina yavari dui regedi bi minari amegedi mamo mina taoni ferei digedi. ⁵Ma amiye tau kaere de ya moi dui regedi ri, bi

^z 8.43 Bura bedakai *Ini fore tau gade gauka dogo vene rofu makuyo* nufa de.

^a 9.3-5 Lk 10.4-11; Acts 13.51

yi yuka di budoka usi eyarei feresi mina taoniri kamini digedi. Ye mina bi ini vegu makai regedi yaku bi vei mama regedi.”

⁶Rautu rautu kamini digasa ago buni ni digasa gauka vene moi buni rigamadi.

Herod rofu eva riyo
(Mt 14.1-12; Mk 6.14-29)

⁷Herod, kaere bi Galilee di ourefeidenamiye, yaku beika tau vata nigamadi bi neideyo ri, bi ini mokena forovai iniye reyo, adina bi amiye be yaku nigamadi bi John Baptist bi muyena gutuna rae reyo.^b ⁸Amiye be yaku nigamadi bi Elijah ogau niyo, ma be yaku nigamadi bi sena Sei di ago nido amiye yokoi vegu ni rou reyo. ⁹Kamini Herod yaku niyo, “John di ada bi niyaka dada, nugai feideyadi; idu mina bi goina amiye di ini sina mina neideida?” Ini mokena tora bi Iesu vego vo nisi.

Iesu yaku amiye tau gade gade ubua reyo
(Mt 14.13-21; Mk 6.30-44; Jn 6.1-14)

¹⁰Kamini ni feidenave vene ina rofu dairisi ini beika tau reyadi kana mina nigamadi. Ina sa taoni roka Bethsaida ri sui nisi boyadi. ¹¹Idu amiye tau gade mina vei mama reyadi ri, bi ina usi boyadi. Ina vene rofu faiva nisi Sei di ourefeidenamena sana di ago ni oteimagamo, ma kaere gauka nufave vene yaku buni maina regamadi bi moi buni rigamo.

¹²Uriyenau niyo ri, bi ini usi dina vene tuero yaku bosiniyadi, “Amiye ni feide kumo rauturi ma gagani sanari disi ini varena sana ma ini iruku maina reyaganedi, adina una bi autu sanari amesifa.”

¹³Idu ina rofu niyo, “Ya yaku iruku mafo kumo iriyaganedi.”

Idu ina vene ni kabai resi niyadi, “Una sa bi beredi vana berou autu ma oyena remanu maka. Yi mokenari bi mina amiye tau di iruku voi regifa ba?” ¹⁴(Adina rumana vene bi 5,000 kana.)

Ye ini usi dina vene rofu niyo, “Amiye nifa kumo tau neinei 50 dudu kana ameyaganedi.”

¹⁵Mina kana rei vau reyadi ri, ¹⁶bi Iesu yaku beredi vana berou autu ma oyena remanu moisi omari nesi bi buni tora gade Sei rofu masi bi beredi ma oyena moi okusi ini usi dina vene maro amiye tau gade rofu rau regi. ¹⁷Ye iriyadi ma ini uka bere niyadi. Ma ini fereyadi iruku tuta butu risi foroka tuero moi vata baiyadi.

Peter yaku ni okuyo Iesu bi Keriso
(Mt 16.13-19; Mk 8.27-29)

¹⁸Kamini Iesu inaike usa usa niyo ri, bi ini usi dina vene bi ina sa ameyadi. Kamini ina vene ni kaitesi niyo, “Amiye yaku nidedi na bi kaere vo nidedi?”

^b 9.7-8 Mt 16.14; Mk 8.28; Lk 9.19

¹⁹Ye ni kabai reyadi, “Be yaku nidedi ya bi John Baptist, be yaku nidedi bi Elijah, ma be yaku nidedi bi sena Sei di ago niyo amiye yokoi vegu nisi dairiyo.”^c

²⁰Ma ni kaiteyo, “Idu ya yaku nidedi na bi kaere?”^d
Ye Peter yaku ni kabai reyo, “Ya bi Sei di Keriso.”

Iesu ini esika ma muyena di ago niyo
(Mt 16.20-28; Mk 8.30–9.1)

²¹Kamini ni diba resi ago gira maro, “Mina amiye yokoi rofu ga ni oteimaraine.” ²²Ka niyo, “Amiye di Mida bi esika esika tau moiyaime ma tora vene, Sei ma amiye utari naivo vene di varika vene ma ago gira oteimana vene yaku fufuta masi umuyegedi ma gabi meda regodenuri dubusa dadi rae rego.”

²³Resi ina tau noibanu rofu niyo, “Kaere amiye ini ura bi na usi digo vo nisi, bi ina kaya ni de resi meda neinei ini satauro moisi na usi baiyaime.”^e
²⁴Adina kaere ini vegu moi rigi ura rego, bi de moigo, idu kaere na dada ini vegu you feidego, bi moi rigo.^f ²⁵Adina beika buni bi amiye yokoi mina kono tora noibanuri baku resi ini vegu eyarego? ²⁶Bema amiye yokoi na dada ma nai ago dada maena rego, Amiye di Mida ini Baba di vabarari ini akeke naivo naivo vima sa okigo ri, ina rofu ka maena rego. ²⁷Idu rama ya nida, ya bedakai minari bi de muyegedi idu ina bi Sei di ourefeidenana amena sana dego vegedi.”

Iesu veyadi ini rovaita bi idana
(Mt 17.1-8; Mk 9.2-8)

²⁸Kamini mina vegu meda vana berou autu regode koina niyo ri, Iesu yaku Peter, James ma John afesi omuna ikari usa usa Sei rofu nigi boyo.^g ²⁹Usa usa niyo ri, bi ini rovaita idana niyo, ma ini varuka bi feo kamanika iniye niyo. ³⁰Ma amiye remanu, bi ina vene sa sina nigamadi. Ina bi Moses ma Elijah, ³¹vabara iniye dudu ogau niyadi. Ini sina bi Jerusalem ri gokai muyesi Sei di ini sina moi rama aigo. ³²Peter ini asiyaka sa bi vare muyeyadi. Varena dudu dadisi nei reyadi ri, Iesu di ini vabara ma ina sa are regamadi amiye remanu veyadi. ³³Kamini ina rofu etagae rededi ri, Peter yaku Iesu rofu niyo, “Ourefeidenana amiye, bi buni una bi minari! Una bi karaga regode akunadi, nokoi bi yi, nokoi bi Moses di, ma nokoi bi Elijah di.” (Ina bi ina diba de beika ago nigamo bi.)

³⁴Mina niyo ri, bi seuya desi ina vene bou riyo; mina seuya ada gabireri ma ori reyadi. ³⁵Ma ago goroka mina seuya gutuna baisi niyo, “Mina bi nai Mida, nai vo niyaka amiye — ina bi neidefa!”^h

^c 9.19 Mt 14.1-2; Mk 6.14-15; Lk 9.7-8 ^d 9.20 Jn 6.68-69 ^e 9.23 Mt 10.38; Lk 14.27
^f 9.24 Mt 10.39; Lk 17.33; Jn 12.25 ^g 9.28-35 2 Pet 1.17-18 ^h 9.35 Is 42.1; Mt 3.17; 12.18; Mk 1.11; Lk 3.22

³⁶Mina goroka koina niyo ri, Iesu inaike are regamo. Ma babo nisi beika mina medari vata niyadi vesi bi amiye yokoi ni oteimana de reyadi.

Iesu yaku mida vima no sa moi buni riyo

(Mt 17.14-18; Mk 9.14-27)

³⁷Aru uveyo ri, bi mina omunari gutuna dairi neyadi ri, bi amiye tau gade gade ina baku reyadi. ³⁸Ma mina amiye tau gade fogori amiye yokoi raka niyo, “Oteimana amiye, ya rofu guyaguya nida, baisi nai mida — nai mida yokoi maka vegiya! ³⁹Be aruri, vima no yaku moisi raka ni tavoi resi moi tururu resi ini vena kabudo baido. Mina yaku toga toga esika masi vegu gira gira dudu maka ini rovaitari de feredo! ⁴⁰Yi usi dina vene rofu mina vima no umeki reyagane di guyaguya niyaka, idu anua reyadi.”

⁴¹Iesu yaku ni kabai reyo, “Ya gua mokena vari gira de aina ma mokena no vene, gokaisanu ari doba ya sa amegida? Meda gokaisanu ya sa moimai regida? Yi mida na rofu afei baifo.”

⁴²Mina mida ina rofu boyo ri, vima no yaku konori maku nesi moi tururu reyo. Idu Iesu yaku mina vima no rofu ni kaka resi mida moi buni resi ini baba dairi maro. ⁴³Amiye tau tururu resi Sei di vava veyadi ri.

Iesu dubusa ini muyena di sina niyo

(Mt 17.22-23; Mk 9.30-32)

Ina tau Iesu yaku beika reyo mina tururu reyadi ri, bi Iesu yaku ini usi dina vene rofu niyo, ⁴⁴“Toto ga nifo na beika ya nigi reida bi! Adina Amiye di Mida bi amiye di vanari siri rego.” ⁴⁵Idu ini usi dina vene bi ini adari de ufateyadi beika niyo. Mina sina bi ini adari de dui reyo, ini mokenari de negau niyo, dada ina diba de mina sina bi beika kaite rena mokena ka de moiyadi ori reyadi dada.

Kaere bi tora iniye?

(Mt 18.1-5; Mk 9.33-37)

⁴⁶Kamini iniye kayamo regi reyadi kaere bi tora iniye,ⁱ ⁴⁷ma Iesu ina diba beika mokegamadi ri, bi mida keika yokoi moisi ina atafu moi are resi ⁴⁸ina vene rofu niyo, “Kaere amiye yaku mina mida nai roka dudu moi dui rego, ina ka na moi dui rego. Ma kaere yaku na moi dui rego bi na ni feideyo amiye ka moi dui rego. Adina bi, kaere yi fogori, ini mokenari roka tora de bi, ina bi tora iniye.”^j

Kaere ya rofu no de nido bi yi

(Mk 9.38-40)

⁴⁹John yaku niyo, “Ourefeidena amiye, una bi amiye nokoi veyafa yi rokari vima no umeki regamo, ma una yaku niyafa ga reyagane, ini adina bi una sa usi dina de amiye.”

ⁱ 9.46 Lk 22.24 ^j 9.48 Mt 10.40; Lk 10.16; Jn 13.20

⁵⁰Iesu yaku niyo, “Ni vai ga refa, adina kaere ya rofu no de, ina bi yi.”

Samaria gagani rautu vene Iesu rofu gedu maradi

⁵¹Iesu omari moi bogedi meda negau nigamo dada uka gira dudu Jerusalem ri digi neyo. ⁵²Ina yaku ini ago moi raga rededi vene siko Samaria rautu yokoiri ni feideyo ma dui resi ini amena sana ni tore regi. ⁵³Minari amededi vene yaku bi gedu maradi, adina bi Jerusalem ri digi neyo dada. ⁵⁴Ini usi dina amiye remanu James ma John yaku mina vegu veyadi ri niyadi, “Varika Amiye, gokai mokeisa, ita omari nigifa ma desi vai vau rego ba?”^{k l}

⁵⁵Idu kero resi emaro.^m ⁵⁶Kamini rautu yokoiri boi neyadi.

Amiye kaere Iesu usi digi mokededi

(Mt 8.19-22)

⁵⁷Ida bodedi ri, amiye yokoi yaku ina rofu niyo, “Ya goina digiya na bi ya usi digida.”

⁵⁸Iesu yaku ina rofu niyo, “Sufa auna bi ini fore ruba nufa ma erena odoro didedi bi ini buri nufa, idu Amiye di Mida bi ini ada aisi raudai rena sana bi koina.”

⁵⁹Ma amiye nokoi rofu ka niyo, “Na usi bae.”

Idu niyo, “Varika Amiye e, na ferei kumo bosu nai baba kaere muyeyo siko moi guri aigida.”

⁶⁰Idu ina rofu niyo, “Muyena vene ferei kumo ini muyena iniye moi guri aiyagane. Idu ya bi bosu Sei di ourefeidenana amena sana di ago ni odoro re.”

⁶¹Yokoi yaku ka niyo, “Varika Amiye, ya usi baigida, idu nai yava vene kokora nigida kumo.”ⁿ

⁶²Idu Iesu yaku ina rofu niyo, “Amiye yokoi, ini vanari gadi moi gira resi muro di moimai kora resi nei kero rei fufuta rofu nei resi bi Sei di ourefeidenana amena sanari moimai rena bi buni de nigou.”

Iesu yaku amiye 72 ni feideyo

10 ¹Mina fufutari, Varika Amiye yaku amiye 72^o moiyo rofu remanu remanu dudu ina yaku digo taoni ma gagani neinei ni vene siko ni feideyo ma diyadi. ²Ma ina vene rofu niyo, “Iruku rama butu rena bi tora gade, idu moimai rededi vene bi tau de. Mina dada butu rena Varika Amiye rofu usa nifa kumo moimai rededi vene ni feidego

^k 9.54 Bura bedakai bi *Elijah reyo kana* ka nufa. ^l 9.54 2 Kgs 1.9-16 ^m 9.55 Bura bedakai resi niyo, “Ya ya diba de ya bi beika Vima di, adina Amiye di Mida amiye di vegu moi vegu rigi ogau niyo. Ina bi ini vegu moi no rigi ogau de niyo” ka nufa. ⁿ 9.61 1 Kgs 19.20 ^o 10.1 72; bura bedakai bi 70 nufa.

ma ini butu butu resi moi aiyaganedi.^p ³Diga mokefa; na yaku mamoe di mida kana suma auna di fogori ya ni feideida.^q ⁴Fore di pausi, o dura, o yuka ro moina ga refa. Idauri ka amiye sa sina ga nifa.^r ⁵Goina yavari dui regedi ri, bi yomakai siko nifa, ‘Sei di uka amuta bi mina yavari ameyaine.’ ⁶Mina yavari uka amuta nufa amiye yokoi amedo vo nisi bi yi uka amuta niyo bi ina sa ameyaine; de vo nisi, bi yi uka amuta maro bi dairi moi. ⁷Yava idana idana rofu di ga refa; mina yavari maka amesi beika ya mabigedi ina sa irigedi, adina moimai redo amiye bi ini moimai reyo obini kana moigo bi buni.^s ⁸Goina taoni okigedi ma ya moi dui regedi ri, ina yaku beika iruku ya magedi bi irifa. ⁹Ini gauka vene moi buni risi ina vene rofu nifa, ‘Sei di ourefeidenana amena sana bi ya atafu okiyo.’ ¹⁰Idu taoni yokoi dui regedi bi amiye yaku de ya moi dui regedi ri, bi taoni ida nefau are resi nifa,^t ¹¹‘Ye yi taoni di budoka, uni yuka rafori usi eyaresifa mini bi ya rofu gubuyo rena kana. Yomakai ya ya diba niyaine Sei di ourefeidenana amena sana bi atafu okiyo!’ ¹²Ya rofu nida, kota rego medari Sodom di esika esika moigo bi keika, idu mina taoni di esika esika moigo bi tora gade!^u

Taoni taoni vene kaere mokena vari gira Sei rofu de aiyadi
(Mt 11.20-24)

¹³“Chorazin vene ya rofu bi iriyeduka iniye ma Bethsaida vene ya rofu ka bi iriyeduka iniye! Adina bi, mokena vegu ya vene rofu reyaka kana, mina Tyre taoni ma Sidon taoniri reyagadu vo nisi bi mirona vene bi senagi ameinu resi varuka gabu akusi udo ini rovaita ifi rei bogasa dega reyagadu mina yaku oteimagadu ina bi ini vegu no feresi moi etagae riyadi!” ¹⁴Idu Sei di kota rego medari bi ya rofu esika esika tora gade mago, idu Tyre ma Sidon vene rofu esika esika moigedi bi keika. ¹⁵Ma ya Capernaum vene, ya bi omari moi odoro de rego! Idu, ya yaku muyena sanari negedi!”^w

¹⁶Iesu yaku ini usi dina vene rofu niyo, “Kaere ya neidego, bi na neidego; ma kaere ya rofu gedu mago, bi na rofu gedu mago; ma kaere na rofu gedu mago, bi na ni feideyo amiye rofu gedu mago.”^x

Amiye 72 di ini dairina

¹⁷Mina amiye 72^y dairisi ada dudu Iesu rofu niyadi, “Varika Amiye, vima no ka uni ago neideyadi, yi roka dudu nigamafa dada!”

^p 10.2 Mt 9.37-38 ^q 10.3 Mt 10.16 ^r 10.4-11 Mt 10.7-14; Mk 6.8-11; Lk 9.3-5 ^s 10.7 1 Cor 9.14; 1 Tim 5.18 ^t 10.10-11 Acts 13.51 ^u 10.12 Gen 19.24-28; Mt 11.24; 10.15
^v 10.13 Is 23.1-18; Ezek 26.1-28.26; Joel 3.4-8; Am 1.9-10; Zech 9.2-4 ^w 10.15 Is 14.13-15
^x 10.16 Mt 10.40; Mk 9.37; Lk 9.48; Jn 13.20 ^y 10.17 72; bura bedakai bi 70 nufa (nanaka 1 baku re).

¹⁸Iesu yaku niyo, “Omari gutuna Satani ayena kana yareyo ma veyaka. ¹⁹Neidefa, na yaku vava ya maraka, aruma ma kaikai fafau disi ya rofu ruda rena amiye di vava tau etei rigedi; ma beika no yaku esika de ya mago.^z ²⁰Idu vima no yaku yi ago neidededi vo nisi ada ga refa; yi ada regedi di adina bi yi roka bi omari bura riyo dada.”

Iesu ada reyo
(Mt 11.25-27; 13.16-17)

²¹Mina meda nemokori, Vima Kikifa^a yaku Iesu di uka ada dudu vata baiyo ma ina bi niyo, “Baba, oma ma kono di Varika Amiye, yi roka moi odoro reida, adina ya bi mina mokena tora vene rofu moi sui resi mokena keika keika vene kaere bi mida mida kana rofu oteimaro. Baba, yi ukari mokeyo kana, makai vata niyo.

²²“Nai Baba yaku beika baika tau na maro. Ma amiye yokoi ina toto ini Mida, idu ini Baba maka ina diba. Ma amiye yokoi ka ini Baba toto, ini Mida maka ina diba ma ini Mida yaku ka ini ura amiye oteimagi bi rama iniye vegedi, Sei bi kaere.”^b

²³Kamini ini usi dina vene rofu kero resi sui dudu niyo, “Yi nemoko bi buni tora gade maro, ya beika vededi dada! ²⁴Adina ya nida, Sei di ago niyadi vene ma kini tau ina ura bi ya beika vededi mina vegedi, idu bi de veyadi. Ma ya beika neidededi mina, ka neidegedi, idu bi de neideyadi.”

Samaria amiye buni di mokena ago

²⁵Ma ago gira oteimana amiye yokoi Iesu di uka maina regi are resi niyo, “Oteimana amiye, beika regida ma toga toga ameibobina vegu moigida?”^c

²⁶Ina rofu niyo, “Ago gira ideri bi gokai bura reyadi? Ya yaku bi gokai veisa?”

²⁷Ye ni kabai reyo, “Yi uka meko noibanu dudu, yi vima noibanu dudu, yi yeiva tora noibanu dudu ma yi mokena noibanu dudu Varika Amiye yi Sei uka magiya; ma ‘Ya atafu amedo amiye uka magiya, ya kaya uka maisa kana.’”^d

²⁸Kamini ina rofu niyo, “Ya rama niyo mini makai regiya ri, bi ameibobigiya.”^e

²⁹Idu mina amiye iniye moi rama regi Iesu dubusa ni kaitesi niyo, “Nai atafu amedo amiye bi kaere?”

³⁰Iesu yaku ni kabai resi niyo, “Amiye yokoi Jerusalem gutuna Jericho negamo ri, bi duma duma vene di vanari dui reyo. Ubobo resi muye

^z 10.19 Ps 91.13 ^a 10.21 *Vima Kikifa*; bura bedakai bi *Vima* nufa; fefa idana be bi *ini vima* nufa. ^b 10.22 Jn 3.35; 10.15 ^c 10.25-28 Mt 22.35-40; Mk 12.28-34 ^d 10.27 Lev 19.18; Deut 6.5 ^e 10.28 Lev 18.5

tamatama reyadi ri, bi ini varuka ita kutusi, moisi ferei diyadi. ³¹Minari bi Sei ma amiye utari naivo amiye yokoi bi mina idari negamo. Mina ubobo reyadi amiye veyo ri, bi ida berou eta rofu boi nesi bi kamini ebu rei diyo. ³²Levi amiye yokoi ka makai mina sanari baisi veyo ri, bi ida berou eta rofu boi nesi bi kamini ebu rei diyo. ³³Samaria amiye yokoi ka mina ida baiyo. Idu mina amiye rofu okisi veyo ri, bi iriyeduka ina rofu resi^f ³⁴bosi oira ma waini dudu uyadi sana mina koitesi fafa riyo. Ini donkey^g fafau aisi oto vene di amena varena yavari afei bosi resi nari reyo. ³⁵Uruyaku dadisi bi meda remanu di moimai di fore moisi yava di ini madini masi niyo, ‘Ina nari re. Beika baika ina fafau regiya bi dairi baigida ri ya magida.’ ”

³⁶Iesu yaku ini ago ni vau resi niyo, “Ya yaku mokeisa bi mina amiye regoderi kaere bi mina amiye rofu duma duma vene di vanari dui reyo bi ini atafu amedo amiye kana?”

³⁷Ma ago gira ni feidena amiye yaku niyo, “Kaere ina bi mina amiye rofu iriyeduka reyo.”

Ma Iesu yaku ina rofu niyo, “Disi ya ka mina kana vegu re.”

Iesu yaku Martha ma Mary sa egoru reyo

³⁸Kamini Iesu ini usi dina vene sa bosi rautu yokoiri okiyadi ri, bi rema yokoi roka Martha yaku ini yavari moi dui reyo.^h ³⁹Ina bi ini rasini nufa ini roka bi Mary. Mary bi Varika Amiye di yuka atafu amesi ini sina nigamo mina neidegamo. ⁴⁰Martha bi ini yavari amiye afei dui reyo dada, mina kero karo regamo. Dada bosi Iesu rofu niyo, “Varika Amiye, nai rasini bi beika baika bi fereyo dada na yaku maka reida, idu gokai mokeisa? Ni kumo na moi vana reyaine!”

⁴¹Idu Iesu yaku ni kabai resi niyo, “Martha e, ya bi beika baika tau resi yi ada moi esika resi mokena tau tora moisa, ⁴²idu yokoi maka bi tora iniye. Mary beika mokei redo bi buni mini. Ina rofu mina vegu redo bi una yaku de moi etagae regifa.”

Iesu di oteimana ago usa usa nina rofu

(Mt 6.9-13; 7.7-11)

11 ¹Meda yokoiri Iesu yaku gagani yokoiri usa usa nigamo. Ini usa usa ni vau reyo ri, ini usi dina amiye yokoi yaku niyo, “Varika Amiye, gokai usa usa nigifa mina una oteima, John yaku ini usi dina vene oteimagamo kana.”

²Iesu yaku ina vene rofu niyo, “Usa usa nigedi ri, bi yomakai nifa: ‘Baba:

^f 10.33-34 2 Chr 28.15 ^g 10.34 Mina bi hosi keika kana, anema doba nufa.

^h 10.38-39 Jn 11.1

Yi roka bi moi kikifa riyaine;
yi ourefeidenana amena sana bi deyaine.

3 Ari neinei di iruku una mai baisa una mavo.

4 Ma uni vegu no koite makuvo,
adina una ka amiye tau di vegu no una rofu rededi moi erufu
resifa.

Ma uka maina rena rofu ga una moi ourefeidevo.’”

⁵Resi Iesu yaku niyo, “Ya yokoi mina urusa tobo iniyeri bosi yi asini rofu usa nigiya vo nisi, ‘Nai asini, beredi regode na ma. ⁶Adina bi nai asini yokoi yaku yava ika oto disi nai yavari okiyo ma na sa bi iruku koina!’ ⁷Idu asini bi yava ideri ya ni kabai resi nigo, ‘Ada esika na mana ga re! Ida vena bi sena gana riyaka ma nai mida sa bi sena vareyafa. Dadisi beika baika ya mana ka gira iniye.’ ⁸Ya vene rofu yaku nida ina mina de dadigo, ini asini vana magi bi, idu besa besa usa nigo ri, bi dadigo rofu, yi beika usa niyo mina ya mago.

⁹“Dada ya vene rofu nida: Usa usa nifa kumo ya mago; maina refa kumo baku regedi; raka nifa kumo ya rofu iduara moi ekego. ¹⁰Adina kaere yaku usa usa nigo bi moigo, ma kaere maina rego bi baku rego, ma kaere raka nigo bi ina rofu iduara moi ekego. ¹¹Yi fogori kaere baba ini mida yaku oyena usa nigo ri, bi oyena de masi dadisi aruma mago ba? ¹²Ye unema vo nigo ri, bi kaikai magiya ba? ¹³Ma ya vene no bi yi mida mida rofu gugura buni magi diba nidedi vo nisi, bi Baba omari amedo amiye yaku Vima Kikifa usa nigedi vene bi besa besa mago!”

Iesu ma Beelzebul

(Mt 12.22-30; Mk 3.20-27)

¹⁴Iesu yaku babo vima no yokoi umeki regamo. Mina vima no yakuyo ri, bi mina amiye ago niyo ma amiye tau gade tururu reyadi. ¹⁵Idu amiye be yaku niyadi, “Mina bi vima no Beelzebul, vima no di ourefeidenana amiye kaere yaku vava mado ma vima no umeki redo.”ⁱ

¹⁶Ma be yaku omari rebe yokoi reyainedi kaiteyadi ebene regika bi rama ba ide ina bi Sei yaku vava maro.^j ¹⁷Idu mina vene di mokena vesi ina rofu niyo, “Gagani yokoi uta okusi iniye iniye berou berou are resi ruda rego vo nisi, bi berou berou keto rego. Ma rubu iniye iniye berou berou ruda rego vo nisi, bi berou berou keto rego. ¹⁸Ye Satani ini vene sa ka iniye iniye ruda resi utama okugedi vo nisi, gokai resi ini ourefeidenana amena sana bi are rego? Adina ya yaku nidedi bi, na bi Beelzebul di vava dudu vima no umeki reida. ¹⁹Idu na yaku vima no Beelzebul di vava dudu umeki reida vo nisi, bi yi vene bi kaere di vava dudu umeki rededi? Mina dada ini beika rededi yaku yi ago bi rama de vo nidedi! ²⁰Idu Sei di

ⁱ 11.15 Mt 9.34; 10.25 ^j 11.16 Mt 12.38; 16.1; Mk 8.11

vava dudu vima no umeki reida vo nisi, bi Sei di ourefeidenana amena sana bi ya vene rofu deyo.

²¹“Yeiva amiye ini mari moi gira resi ini yava nari rego ri, bi ini beika baika bi buni ameibigo. ²²Idu yeiva iniye amiye yokoi yaku ina sa ruda resi ugo ri, mina amiye ini moi gira regamo mari moigo. Makai mina amiye yeiva mokeyo bi ina kaya nari mona rego dada. Kamini mina yeiva iniye amiye beika tau yokoi yokoi rau rego.^k

²³“Amiye kaere na sa de bi na rofu de; ma kaere na sa butu de rido bi rerevaida nido.^l

Vima no dairigo

(Mt 12.43-45)

²⁴“Vima no yaku amiye yokoi ferei yakusi bi koru de gaganiri ameinu rena sana maina rego. Yokoi baku rena de resi iniye kamini nigo, ‘Nai yava ferei yakuyaka minari dairigida.’ ²⁵Dairisi mina yava baku rego ri, bi guda resi ae dogo reyadi. ²⁶Resi bi disi vima no viro vara iniye ini no ebu reyadi afei minari baisi amegedi. Ye mina amiye di amena gua bi no iniye sena kana de.”

Rama iniye ada rena

²⁷Iesu yaku mina sina niyo ri, amiye tau gade di ini fogori, rema yokoi yaku ina rofu raka nisi niyo, “Ya moi vata resi susu ya maro rema bi buni tora gade moido!”

²⁸Idu Iesu yaku ni kabai resi niyo, “Rama, idu kaere Sei di ago neidededi bi buni tora gade moidedi!”

Rebe di usa usa

(Mt 12.38-42)

²⁹Amiye tau gade Iesu atafu egoro reyadi ri, ina vene rofu nigi kora resi niyo, “Gua amededi vene bi vegu no rededi vene! Rebe ni kaitedededi; rebe nokoi de mago idu Jonah rofu vata niyo rebe bi kamini mina maka bi mago.^m ³⁰Adina Sei yaku Jonah moisi Ninevah di rebe reyo kana, ye ina yaku ka Amiye di Mida moisi gua amededi vene di rebe rego.ⁿ ³¹Meda baido rama eta rofu di kuini Sei di kota rena medari gua amededi vene sa edadigo ma beika reyadi vegu mina ni fafana rego, adina bi, gagani maikeri gutuna kini Solomon di mokena tora neidegi vo nisi baiyo. Ye vefa, amiye yokoi kaere Solomon ebu reyo bi mini.^o ³²Ninevah vene Sei di kota rena medari gua amededi vene sa are resi ini beika reyadi vegu ni fafana regedi, adina bi Jonah yaku Sei di ago

^k 11.22 Iesu bi mina yeiva iniye amiye. Acts 10.38; 1 Jn 3.8 baku re. ^l 11.23 Mk 9.40
^m 11.29 Mt 16.4; Mk 8.12 ⁿ 11.30 Jon 3.4 ^o 11.31 1 Kgs 10.1-10; 2 Chr 9.1-12

ni rausi reyo ri, vegu no feresi moi etagae riyadi. Ma vefa, amiye yokoi Jonah ebu reyo bi mini!^p

Uka di vabara
(Mt 5.15; 6.22-23)

³³“Amiye yokoi yaku ramefa orisi rubari moi sui o foroka gabireri de aigo;^q idu bi ini ikina sanari ikigo ye kaere yava dui rededi ka ini vabara vegedi.^r ³⁴Yi nemoko bi ramefa di vabara kana yi rovaitari. Ye yi nemoko buni vo nisi, bi yi uka tau noibanu bi vabara yaku vata baigo. Idu yi nemoko no vo nisi, bi yi uka tau noibanu bi mukuna yaku vata baigo. ³⁵Mina dada, yi ukari vabara nari rei mona re, ye mukuna ga niyainedi. ³⁶Yi uka tau noibanu vabara yaku vata baigo vo nisi, bi ma mukuna keika yi ukari ka ide amego vo nisi, bi yi uka tau noibanu vabara iniye nigo, ramefa di vabara yaku ya moi vabara rego kana.”

**Iesu yaku Pharisee vene ma ago gira oteimana vene
rofu ni tourage reyo**
(Mt 23.1-36; Mk 12.38-40)

³⁷Iesu sina ni koina reyo ri, bi Pharisee amiye yokoi yaku raka niyo ina sa iruku irigedi. Dada ini yava dui resi iruku irigi ameyo. ³⁸Ma Pharisee amiye yaku Iesu ini vana koitena siko de reyo mina veyo ri, bi tururu reyo. ³⁹Dada Varika Amiye yaku ina rofu niyo, “Ya Pharisee vene bi biyo ma siua bi etofaro maka koitededi, idu yi uka ideri bi dadaga ma vegu no vata baiyadi. ⁴⁰Ada de vene! Sei yaku etofaro riyo vo nisi, bi ideri ka riyo ba ide? ⁴¹Yi uka idounai dudu irava vene mafa; mina regedi ri, bi beika baika tau bi ya rofu ruaka nigo.

⁴²“Ye ya Pharisee vene iriyeduka no iniye iniye ya rofu bi! Adina bi iruku moi sisika rena roka mint ma rue ma bedakai tau vakoi di yuveita neinei moisi vana ufori bi yokoi maka Sei rofu madedi, idu ya bi Sei rofu vegu rorobo rena ma uka mana de rededi. Idu mina reyagane kumo ma mina vegu rededi bi ga ferefa.^s

⁴³“Ya Pharisee vene bi iriyeduka no iniye iniye ya rofu bi! Adina usa usa yavari amena sana ka buni torari ma maketiri amiye yaku ago buni dudu matagini reyagane ura rededi. ⁴⁴Iriyeduka no iniye iniye ya rofu bi! Adina ya bi amiye guri aiyadi sana sena tovo niyadi kana. Dada amiye guri de vesi fafau etei ri didedi, adina ina toto mina bi amiye guri aiyadi sana bi ini kino amedo.”^t

^p 11.32 Jon 3.5 ^q 11.33 Bura bedakai o biyo gabireri de aigo nufa de. ^r 11.33 Mt 5.15; Mk 4.21; Lk 8.16 ^s 11.42 Lev 27.30 ^t 11.44 Mina guri aiyadi sana di vena bi buni, idu ini ideri bi amiye muyena nena. Makai kana mina Pharisee vene ini vegu vena bi buni, idu ini ukari bi ini kino amedo. Mt 23.27-28 baku re.

⁴⁵Ago gira oteimana amiye yokoi yaku ina rofu niyo, “Oteimana amiye, ya makai sina nisa ri, bi ya ka una rofu ni no reisa mini!”

⁴⁶Idu ni kabai reyo, “Ya ago gira oteimana vene, ka iriyeduka no iniye iniye ya rofu bi! Adina toe kirokai rena anua rededi mina amiye fafau aidedi, idu yi vana ebuna yokoi dudu bi mina toe de erufugedi. ⁴⁷Iriyeduka no iniye iniye ya rofu bi! Adina bi yi tutubena vene yaku Sei di ago niyadi vene umuyeyadi, idu ya vene bi ini guri yava ikefata dudu moi buni buni rededi. ⁴⁸Mina dada ya iniye iniye nidedi yi tutubena yaku beika reyadi bi buni, ini adina ina vene yaku Sei di ago niyadi vene umuyeyadi ma ya bi ini guri yava akudedi. ⁴⁹Mina dada Sei yaku ini mokena tora dudu ka niyo, ‘Nai ago nidedi vene ma nai ni feidena vene ina rofu ni feidegida; be bi umuyesi be bi esika esika magedi.’ ⁵⁰Dada Sei yaku kono riyo medari gutuna kaere Sei di ago niyadi vene tau gade umuyeyadi, gua amededi vene bi ini kaunava baku regedi: ⁵¹Abel umuyeyo gutuna boyo Zechariah kaere bi ori sisika rena fore vata ma Sei di yava utari umuyeyadi. Mina bi rama, ya nida gua amededi vene bi mina kaunava baku regedi!”

⁵²“Ago gira oteimana vene iriyeduka no iniye iniye ya rofu bi! Adina bi diba nina di sana di ida vena ekena etagae reyadi mini. Ya bi de dui rei boyadi ma be yaku dui rena mokededi bi, ya yaku ini ida biri ridedi!”

⁵³Iesu yaku mina sana fereyo ri, bi Pharisee vene ma ago gira oteimana vene yaku ni fafana resi ago tau rofu ni kaitegi kora regamadi, ⁵⁴eru regedi ma ago rama de yokoi nigo ri, bi moi gira regedi vo nisi.

Ofarosi sina di ago gira

(Mt 10.26-27)

12 ¹Amiye tau gade gade okisi egogo resi iniye iniye mini itei regamadi duakau ri, Iesu yaku ini usi dina vene rofu nigi kora reyo, “Pharisee vene di yeast siko ya kaya nari rei mona refa — mina bi ini ofarosi vegu.” ²Gokai beika sui niyadi bi moi ogau nigedi ma gokai beika bou riyadi bi bou usase regedi,” ³mina dada beika sina mukunari niyadi bi vabara sanari neidegedi. Ma beika sina yava ideri kiya ka mumugu niyadi bi yava tebori are resi ni rausi regedi.

Sei rofu ori regedi

(Mt 10.28-31)

⁴“Nai asiyaka vene ya nida, rovaita maka umuyegedi vene ori ga refa, idu gabi vegu no yokoi ya rofu anua de regedi. ⁵Ya oteimagida kaere rofu ori regedi: Sei rofu ori refa, kaere bi ya umuyegi resi gabi ini vava dudu ya ita mokari maku negi rego, ina rofu maka ori refa!

^u 11.51 Gen 4.8; 2 Chr 24.20-21 ^v 12.1 Mt 16.6; Mk 8.15 ^w 12.2 Mk 4.22; Lk 8.17

6“Erena keika vana berou autu di davana bi fore keika remanu dudu ba? Ma Sei yaku ina tau noibanu bi toto de nigo. 7Ye yi ada iye tau vakoi ka gokaisanu amedo bi duaiya reyo. Ye ori ga refa. Yi davana bi tora gade, erena keika tau gade kana de!

Keriso ni ogau nina ma fufuta mana

(Mt 10.32-33; 12.32; 10.19-20)

8“Ye na yaku ya vene rofu nida, kaere yaku ariarari nigo ina bi nai, bi Amiye di Mida yaku ka Sei di naivo naivo vima tau di nemokori makai nigo. 9Idu kaere yaku amiye di nemokori na diba de ina vo nigo bi, Amiye di Mida yaku ka Sei di naivo naivo vima tau di nemokori makai nigo.

10“Ma kaere amiye yaku Amiye di Mida rofu ago no nigo Sei yaku ini vegu no koite makugo; idu kaere yaku Vima Kikifa rofu ini roka moi no rigo Sei yaku ini vegu no de koite makugo.^x

11“Usa usa yavari o gavana o ourefeidenana vene di nemokori kota regi ya afei bogedi ri, yi mokena toe ga moyaine, gokai sina nigiya ba gokai ni kabai regiya bi.^y 12Adina mina nigiya medari Vima Kikifa yaku ya oteimago mironi.”

Gugura nufa ada de amiye di ago

13Amiye tau gade di fogori amiye yokoi yaku ina rofu niyo, “Oteimana amiye, nai dubuini nigiya kumo beika baika uni baba fereyo na sa rau reyaine.”

14Iesu yaku ni kabai resi niyo, “Vava na mana kode ya remanu di sina sina neidegi yi beika baika rau regi.” 15Kamini ina vene tau rofu niyo, “Ya kaya nari rei mona regasa beika baika tau rofu yi mokena udu ga refa. Adina amiye di vegu iniye bi mina beika baika tau yaku de mago.”

16Kamini Iesu yaku mokena ago yokoi ina rofu niyo: “Beika baika tau amiye ini kono fafauri muro iruku tora gade iniye rama niyo. 17Dada iniye mokesi niyo, ‘Gokai kamini regida? Iruku aina sana bi koina.’ 18Resi niyo, ‘Yomakai regida: nai iruku aina sana ukero vau resi tora risi nai iruku ma sogona tau gade minari aigida. 19Resi bi na na kaya rofu nigida, lagani tauri mina beika tau bi yi. Nai veguri mina beika baika tau kiya kiya irigasa vaigasa ada regasa ameibigida!’ 20Idu Sei yaku ina rofu niyo, ‘Ya bi ada de amiye! Gua mina urusari umuyegiya ri, bi kaere yaku mina beika tau ya kaya moi tauri fereyo mina moigo?’”

21Resi Iesu yaku sina ni vau regi niyo, “Amiye bi makai kaere beika baika tau inaike moiyo, idu Sei di mokenari bi beika baika tau de moiyo.”

Uka vari gira Sei rofu mana

(Mt 6.25-34)

22Resi Iesu yaku ini usi dina vene rofu niyo, “Mina dada ya nida, vegu nigasa amesi beika irigedi o beika varuka yi rovaita yaku akugedi

^x 12.10 Mt 12.32; Mk 3.29 ^y 12.11-12 Mt 10.19-20; Mk 13.11; Lk 21.14-15

mokena toe ga moifa. ²³Adina vegu yaku iruku bi ebu redo ma rovaita yaku varuka ka ebu redo. ²⁴Yomina gayo bora erena vefa; ina bi iruku yo varina o iruku goena de rededi; dokena o iruku aina sana ka koina; idu Sei yaku vana redo. Ya bi mina erena ebu iniye reyadi! ²⁵Ye ya kaere yaku ini ukari mokena toe moigo ri, mina mokena yaku ini vegu moi doba rego ba? ²⁶Mina mokena dudu mina beika keika anua reisa, ye beika resi mokena toe tau moisa? ²⁷Sufari farofaro bi gokai bodedi mina vefa: ina bi moimai de rededi o varuka de ridedi. Idu ya nida kini Solomon di varuka burefe tau ka bi mina sufari farofaro kana de.^z ²⁸Sei yaku sufari farofaro imu mado. Mina farofaro bi gua vegu amedo mini, idu agiya bi kufusi makugedi roko nigedi ri, ita mokari origedi. Ye ina bi yi varuka dudu ya nari rei mona iniye rego, ya kaere bi mokena vari gira keika aidedi vene!

²⁹“Ye beika irigedi di, yi ukari mokena toe ga refa. ³⁰(Adina mina beika baika tau bi mina konori gagani gagani vene tau gade yaku maina rededi.) Idu yi Baba ina diba ya nufa de tau bi. ³¹Idu Sei di ourefeidenana amena sana rofu maina refa kumo mina beika baika ka ya mago.

Omari gugura tau
(Mt 6.19-21)

³²“Ya amiye tau ori ga refa, adina yi Baba bi ini ourefeidenana amena sana ya rofu magi ada redo. ³³Yi beika baika nufa bi sero resi fore bi irava vene mafa. Yi beika baika tau bi omari aifa: mironari fore dura de no nigedi ma duma amiye yaku ka moigi atafu moina de ma nurina yaku de moi no rigo. Ye toga koina de nigedi. ³⁴Adina yi gugura buni tau amededi sanari yi uka di ura ka ameibigo.

Naivonaivo vene kaere nari rei mona rededi

³⁵“Yi varuka mitai ri gira regedi rofu yi ramefa orisi toro dudu amefa.^a ³⁶Ini varika amiye, rema mena irakuna gutuna dairigo naivo naivo vene toro rededi kana ameibifa. Ini varika amiye bi rema mena irakuna gutuna dairisi fidi fidi rego ri, evade maka dadisi iduara moi boka regedi.^b ³⁷Mina kana vene rofu bi buni tora gade iniye, adina bi ini varika amiye dairigo ri, bi ina vene bi varena de, ina rofu toro regasa nari amededi dada! Ya vene rofu nida, ini varika yaku roka nisi moimai regi ini varuka mitai rigo ma iruku irina sanari amegedi ri, bi ina yaku dadisi ina rofu ini naivo rego. ³⁸Uru tobori baigo o uruyaku vabarari baigo rofu ina toro regasa nari rededi vene baku rego ri, bi buni iniye moigedi! ³⁹Idu ya ya diba nifa, yava biyaguna amiye bi siko diba nigo vo nisi duma amiye baigo meda nemoko bi, ina bi nigo dada ini yava ideri

^z 12.27 1 Kgs 10.4-7; 2 Chr 9.3-6 ^a 12.35 Mt 25.1-13 ^b 12.36 Mk 13.34-36

ga baiyainedi.^c ⁴⁰Ye toro dudu amefa, adina Amiye di Mida bi mokena de rededi meda nemokori baigo.”

Vegu rama redo naivo amiye o vegu rama de redo naivo amiye
(Mt 24.45-51)

⁴¹Peter yaku Iesu rofu ni kaitesi niyo, “Varika Amiye, mina mokena ago bi una rofu maka nisa ba amiye tau noibanu di nisa ba?”

⁴²Ye Varika Amiye yaku ni kabai resi niyo, “Kaere bi vegu rama redo mokena tora nufa naivo amiye ini varika amiye yaku vava mago, ini yava nari regi naivo vene be di iruku ini meda ramari rau rego. ⁴³Ini varika amiye yaku dairisi baku rego mina vegu regasa ameibigo ri, bi mina moimai rei tavoi redo amiye bi ada iniye rego! ⁴⁴Rama ya nida, bi vava mago, dada ini beika baika tau nari rego. ⁴⁵Idu mina moimai rei tavoi redo amiye yaku iniye rofu mokesi nigo, ‘Nai varika amiye bi ari dobari dairigo,’ kamini ini moimai rei tavoi rena rumana rema tau ugi kora resi iruku irigasa koru no moiga ameibigo ri ⁴⁶ini mokena de redo ariri ma meda nemokori ya ya toto, ini varika amiye dairisi mina moimai rei tavoi redo amiye di rovaita bado bado nugasi^d mokena vari gira de aina vene di sanari aigo.

⁴⁷“Ma mina moimai rei tavoi redo amiye, kaere bi ini varika amiye di mokena diba, idu yomakai kana dogo de resi de rego, bi ubobo tora gade rego. ⁴⁸Idu kaere naivo amiye, ini varika amiye di mokena ina toto resi de reyo ma ubobo keika rego. Ma kaere moimai tora gade ina rofu maro ina ka bi moimai tau gade reyaine; ma kaere besa moimai tora gade maro ka bi moimai besa reyaine.

Iesu bi amiye moi ututama okuyo amiye
(Mt 10.34-36)

⁴⁹“Na nai deyaka bi mina konori ita origi. Nai mokenari bi ori katugo kumo! ⁵⁰Nai babatiso^e mago; ma nai mokena toe evade moigida kumo!^f ⁵¹Ga mokefa na mina konori deyaka bi uka amuta moi soka reyaka. Ide, idu ya vene rofu nida na bi amiye iniye iniye ututama okugi deyaka. ⁵²Gua mina medari gutuna kaere ini rema mida sa bi vana berou autu amededi mina okugida; regode berou remanu sa utama ma remanu berou regode sa utama okugida. ⁵³Iniyeyiniye utama okuyaganedi: baba vene ini rumana mida sa, rumana mida ini baba vene sa; nono vene ini vefa vene sa, vefa vene ini nono vene sa; radiyaka tora vene ini radiyaka sa, radiyaka vene ini radiyaka tora vene sa.”^g

^c 12.39-40 Mt 24.43-44 ^d 12.46 di rovaita bado bado nugasi; o you makusi

^e 12.50 babatiso Mina ini adina bi ini esika esika moina. ^f 12.50 Mk 10.38 ^g 12.53 Mic 7.6

Meda di ari vei mama rena

(Mt 16.2-3)

⁵⁴Kamini Iesu yaku ka amiye tau gade rofu niyo, “Meda nedo eta rofu gutuna seuya yokoi dadi baigo ri vesi evade nigiya, ‘Mina bi miya regi redo,’ resi bi miya redo. ⁵⁵Ma meda baido rama eta gutuna aura rebigo ri, bi nigiya, ‘Meda sei regi redo,’ resi bi sei redo. ⁵⁶Ofarosi vene! Ya oma ma kono vesi bi beika ari gua una mago bi diba nigedi. Beika resi gua yomina meda di ari bi de vei mama rededi ba?”

Yi tuma amiye rofu uka amuta ni

(Mt 5.25-26)

⁵⁷“Beika resi ya kaya vegu bi rama ba ide mina de moidedi? ⁵⁸Ya sa uka yokoi maka de nido amiye kaere yaku ya kota aigi rego koderi, amiye sa evade vakoi yi mokena moi yokoi maka rifa idau gogo kota sanari bodedi ri, adina bi, makai de regiya ri, bi kota nido amiye di vanari ya aigo baebu. Ina yaku bi dibura yava nari redo amiye di vanari ya aigo ma bi dibura yavari ya aigo. ⁵⁹Na ya rofu nida, mina sanari de yakugiya bogo kota ai niyo kana fore keika keika mai vau regiya mamo.”

Vegu no feresi moi etagae rifa o muyegiya

13 ¹Mina ariri maka, amiye be yaku sina Iesu rofu ni oteimaradi, Galilee vene be yaku Sei rofu ori sisika regamadi ri, bi Pilate di ruda vene yaku umuyeyadi. ²Kamini Iesu yaku ina vene rofu ni kabai resi niyo, “Mina Galilee vene makai muyeyadi dada, ya yaku mokededi bi ina vene di no bi tora iniye Galilee vene tau rofu ba? ³Ide iniye! Idu ya nida ya vene yi vegu no de feresi etagae rigedi ri, bi ya tau noibanu makai muyegedi. ⁴Ma mirona amiye 18 Siloam ri yava doba ina fafau yaresi emuyeyo bi gokai? Ya yaku mokededi mina yaku nido bi ina vene di vegu no bi Jerusalem ri amedededi vene tau ebu reyo ba? ⁵Ide iniye! Idu ya nida ya vene yi vegu no de feresi etagae rigedi ri, bi ya tau noibanu makai muyegedi.”

Fuka yabo kana rama de aido di mokena ago

⁶Resi Iesu yaku mina mokena ago ina vene rofu nigi kora reyo: “Amiye yokoi ini waini murori fuka yabo kana yokoi varisi boyo mina yabori bi rama be aiyo vegi vo nisi. Idu be de baku reyo. ⁷Dada ini muro redo amiye rofu niyo, ‘Ve kumo, lagani regoderi rama mina fuka yabo kanari maina baigamaka, idu de baku reyaka. Nu! Beika resi mina kono moi no rigasa amedo?’ ⁸Idu muro nari redo amiye yaku ni kabai resi niyo, ‘Amiye tora, lagani yokoi maka ferei kumo adinari kono tanu masi fonuka aigida. ⁹Agiya laganiri mina fuka yabo kana rama aigo ri, bi buni tora gade, idu de vo nisi bi nu makugiya.’”

Iesu yaku rema yokoi Sabati medari moi buni riyo

¹⁰Sabati meda yokoiri Iesu usa usa yavari amiye oteimago. ¹¹Minari rema yokoi bi vima no ini rovaita ideri amegamo. Mina vima no yaku lagani 18 moi gauka reyo, ye ini uboma bi foki dada rorobo de nigamo. ¹²Iesu yaku ina veyo ri, bi raka nisi niyo, “Rema, mina gauka rofu koina niyo mini!” ¹³Ini vana ina fafau aiyo ri, bi minari maka uboma rorobo niyo ma bi Sei di roka moi odoro reyo.

¹⁴Usausa yava di amiye tora bi gubuyo iniye reyo, adina Iesu bi Sabati medari amiye moi buni riyo. Dada dadisi amiye rofu niyo, “Meda koru idari moimai regifa; dada buni nigika bi mina medari baifa, Sabati medari bi ide!”^h

¹⁵Idu Varika Amiye yaku ni kabai resi niyo, “Ya bi ofarosi vene! Ya yokoi yokoi yaku yi boromakau o donkey mina Sabati medari ini yavari moi etae risi koru usi maragadu. ¹⁶Gua mina bi Abraham di tutubena rema kaere bi Satani yaku lagani 18 moi gira regamo; Sabati medari moi torufuka de regiya, ba?” ¹⁷Makai niyo ri, bi Iesu rofu gubuyo rededi vene bi maena reyadi. Amiye tau tora iniye bi Iesu yaku beika vegu buni vayavaya reyo mina rofu ada no iniye niyadi.

Mastadi yo di mokena ago
(Mt 13.31-32; Mk 4.30-32)

¹⁸Ye ni kaitesi niyo, “Sei di ourefeidenana amena sana bi gokai kana? Beika kana rofu ni kake regida? ¹⁹Ina bi mastadi di yoyava kana. Amiye yokoi yaku moisi ini murori variyo ma tora nisi yabo niyo ri erena yaku ini tetekari nui riyadi.”

Yeast di mokena ago
(Mt 13.33)

²⁰Dubusa ni kaitesi niyo, “Sei di ourefeidenana amena sana bi beika kana rofu ni kake regida? ²¹Ina bi yeast kana: ye rema yokoi yaku moisi farava siua tora regodeⁱ sa moi fui reyo mamo mina yeast yaku farava moi uruyo.”

Iduara vena kakaita
(Mt 7.13-14, 21-23)

²²Iesu bi rautu ma taoni yokoi yokoiri amiye oteimasi Jerusalem rofu bogamo. ²³Amiye yokoi yaku ni kaitesi niyo, “Varika Amiye, moi vegu rigedi vene bi tau ba be yaku maka?”

^h 13.14 Ex 20.9-10; Deut 5.13-14 ⁱ 13.21 farava siua tora regode Mina bi farava 21 kilogramme kana.

Iesu yaku ina vene ni kabai resi niyo, ²⁴“Nana rei yeiva resi iduara kakaitari dui refa, adina ya nida amiye tau tora ini mokenari bi dui regika idu anua regedi. ²⁵Yava amiye yaku dadisi yava iduara kebi rigo ma ya bi etofarori are resi fidi fidi resi nigedi, ‘Varika Amiye e, iduara una rofu moi eke!’ Idu ni kabai resi nigo, ‘Na na toto ya goinari gutuna okiyadi!’ ²⁶Kamini ni kabai resi nigedi, ‘Vakoi iruku irigamafa, ma ya bi uni taoni di idari oteimagasa digamo!’ ²⁷Idu dubusa nigo, ‘Na na toto ya goinari gutuna okiyadi. Ya mokena rorobo de rededi vene tau na rofu etagae ri difa!’^j ²⁸Etofaroro ya maku negedi ri, bi esika dudu isaka nigasa gade aki gigi rebigedi; Abraham, Issac, Jacob ma Sei di ago niyadi vene tau vegedi ri, bi Sei di ourefeidenana amena sanari ameibigedi!^{k l} ²⁹Gagani gagani meda dadido eta rofu ma meda nedo eta rofu, ma meda baido enana eta rofu ma meda baido rama eta rofu, vene okisi Sei di ourefeidenana amena sana ameinu resi irakuna irigedi. ³⁰Mironari mamokaere gabi vene bi ouregedi ma gua kaere ourededi vene bi gabi nigedi.”^m

Iesu di uka mana Jerusalem vene rofu

(Mt 23.37-39)

³¹Mina medari Pharisee vene be Iesu rofu baisi niyadi, “Ya mina sanari feresi sana be yokoiri diyaine, adina bi Herod yaku ya umuyegedi mokena moido.”

³²Iesu yaku mina vene kabai resi niyo, “Bosi mina sufa auna mina nifa: ‘Na bi gua ma agiya bi vima no umeki rei feidesi gauka vene moi buni regida ma aineka mamona moimai koina nigo.’ ³³Idu gua, agiya ma aineka nai boida sana bogida, adina bi rorobo de iniye Sei di ago nido amiye kono yokoiri umuyegedi, bi Jerusalem ri maka bi rorobo iniye!

³⁴“Jerusalem taoni vene o! Ya vene yaku Sei di ago niyadi vene umuyesi Sei ya rofu ni feideyo vene fore dudu uyadi. Uru gokaisanu yimida mida egogo regi ura regamaka, kokoro kosini yaku ini mida ini eta gabireri bou rido kana, idu ya vene bi na gedu magamadi! ³⁵Ye yi sana autu feresi digo. Kamini ya nida, de na vegedi bogo meda yokoi okigo ri mamonigedi, ‘Varika Amiye di rokari baido amiye buni tora gade maraine.’ⁿ”

Iesu yaku gauka amiye moi buni riyona

14 ¹Sabati meda yokoiri Iesu Pharisee amiye tora yokoi di yavari iruku irigi boyo. Kamini minari amededi vene tau yaku Iesu vei mona regamadi beika rego mina. ²Yuka vana uruyo amiye yokoi bi Iesu di nemokori baisi are reyo. ³Kamini Iesu yaku ago gira oteimana vene

^j 13.27 Ps 6.8 ^k 13.28 Mt 22.13; 25.30 ^l 13.28-29 Mt 8.11-12 ^m 13.30 Mt 19.30; 20.16; Mk 10.31 ⁿ 13.35 Ps 118.26; Jer 22.5

ma Pharisee vene rofu ni kaitesi niyo, “Ago gira rofu gauka vene Sabati medari moi buni rigifa ba ide?”

⁴Idu de ni kabai reyadi. Kamini Iesu yaku mina gauka amiye moisi moi buni resi ni feideyo. ⁵Ye ina vene rofu niyo, “Ya kaere yi mida o yi boromakau nufa kono rubari keto rei nego vo nisi, bi evade Sabati medari moi yakogu ba ide?”^o

⁶Idu ina vene bi Iesu ni kabai rena anua reyadi ini mina agori.

Ave nina ma gaba rena di vegu

⁷Iesu yaku raka niyadi vene be veyo, amena sana burefe maina regamadi, dada mina mokena ago ina vene rofu niyo: ⁸“Rema mena irakuna regi vo nisi amiye yokoi yaku ya raka nigo ri, bi amena sana burefe minari ga ame, mina amena sana bi raka niyadi amiye tora iniye yokoi di amena sana baebu.”^p ⁹Resi bi ya roada raka niyo amiye yaku ya rofu baisi nigo, ‘Dadi kumo ini amena sanari ka ameyainedi.’ Ye ya bi kamini maena resi nesi egonari amegiya. ¹⁰Idu ya raka nigedi ri, bi bosu egona sanari ame. Kamini ya raka niyo amiye baisi ya nigo, ‘Dubu, dadi baisi yomina amena sana burefe minari ame.’ Mina vegu yaku ya raka niyadi vene tau di nemokori bi mokegedi amiye tora yokoi vo nigedi. ¹¹Adina bi kaere iniye moi odoro rigo bi Sei yaku moi ave nigi rigo. Ma kaere iniye ave nigo bi Sei yaku moi odoro rigo.”^q

¹²Kamini Iesu yaku amiye bedakai rofu niyo, “Yi uriyenau o urusa irukuri, yi asiyaka o usika ourena o gugura tau vene ga raka ni — makai regiya ri, bi ina ka dairi ya raka nigedi, ye yi beika reyo kana bi dairi ya magedi mini. ¹³Irakuna regiya ri, bi irava vene, rovaita bero niyadi vene, yuka no vene ma ne taufa vene mina raka ni. ¹⁴Minari bi buni tora gade baku regiya, adina ina vene bi anua dairi ya magedi. Sei yaku mokena rorobo amiye dadi rae rego medari, dairi ya mago.”

Irakuna tora di mokena ago

(Mt 22.1-10)

¹⁵Amededi sanari amiye yokoi yaku mina sina neideyo ri, bi Iesu rofu niyo, “Sei di ourefeidenana amena sanari amesi irakuna irigedi vene tau bi buni tora gade moigedi!”

¹⁶Ma ina rofu niyo, “Amiye yokoi yaku irakuna tora resi amiye tau raka niyo. ¹⁷Resi mina irakuna meda okiyo ri, bi ini moimai rei tavoi redo amiye ni feideyo omaro vene nigedi, ‘Ya baifa, iruku tau amededi!’ ¹⁸Idu ina tau noibanu bi dadisi deda sina kamini niyadi. Yokoi yaku niyo, ‘Muro regi kono tu yokoi voi reyaka ye vegi digida, dada yi amiye tora ka bosu ni gubuyo ga reyaine.’ ¹⁹Ma yokoi yaku

^o 14.5 Mt 12.11 ^p 14.8-10 Prov 25.6-7 ^q 14.11 Mt 23.12; Lk 18.14

niyo, 'Na bi boromakau vana ufo voi reyaka ye vei mona regi digida, dada yi amiye tora ka bosu ni gubuyo ga reyaine.' ²⁰Ma yokoi yaku niyo, 'Na bi ruika rema meyaka, dada baina anua reida.'

²¹"Kamini mina moimai rei tavoi redo amiye dairi bosu mina sina tau niyadi ini amiye tora rofu ni oteimaro. Mina amiye tora gubuyo resi niyo, 'Evade digasa taoni di ida tora ma ida keika tauri resi irava vene, rovaita bero niyadi vene, ne taufa vene, ma yuka no vene minari afei bae.' ²²Doba de bi mina moimai rei tavoi redo amiye yaku niyo, 'Amiye tora, yi niyo kana bi reyaka, idu yi yava bi vata baina kode.' ²³Dada niyo, 'Bogiya gagani ma muro di idari ni yeiva re kumo amiye afei dui regiya ma nai yava vata baiyaine. ²⁴Ya nida mirona vene tau raka niyaka mina, nai irakuna reyaka mina de irigedi!' "

Usi dina amiye di mokei mona rena

(Mt 10.37-38)

²⁵Amiye tau tora Iesu sa bogamadi ri, ne kero resi ina vene rofu niyo, ²⁶"Amiye yokoi nai usi dina amiye mokego vo nisi bi na rofu uka tora mago ma ini baba, ini nono, ini rema, ini mida, ini usika ourena ma iniye rofu ka uka de mago.' ²⁷Kaere amiye ini satauro iniye de uakaisi na usi baigo bi nai usi dina amiye bi anua rego.^s

²⁸"Ya amiye yokoi ini mokenari bi yava doba akugo vo nisi, bi ina bi siko ameinu resi fore gokaisanu moimai koina nigi bi ina nufa vego. ²⁹Mina siko de rego ri, bi ini yava dadigo sana bi rigo, idu de moi koina rigo ri, bi amiye tau yaku mina vesi bi ni ninika regedi ina rofu. ³⁰Resi nigedi, 'Mina amiye bi yava rigi kora reyo idu de ri vau reyo!'

³¹"Gagani yokoi di kini ini iya rededi vene bi 10,000 moisi ruda bogo gagani kini yokoi sa kaere bi ini iya rededi vene bi 20,000 vo nisi, bi ina bi siko ameinu resi mamu vego mirona gagani di kini u vau rego ba ide mina. ³²Ini mokena mina bosu toe nigo ri, bi ago ni feidego mirona gagani kini rofu ruda okina koderi uka yokoi maka reyaganedi vo nisi. ³³Mina kana dada, ya kaere na usi dina amiye mokeisa vo nisi bi yi beika tau bi fere.

Mami de ramena

(Mt 5.13; Mk 9.50)

³⁴"Ramena bi buni; idu ramena di safi ka koina nigo vo nisi, bi gokai dudu moi safi rigiya? ³⁵Mina bi moi makuna maka; ini buni yokoi de. Amiye ini neidego vo nisi, bi neideyaine!"

r 14.26 Mt 10.37 s 14.27 Mt 10.38; 16.24; Mk 8.34; Lk 9.23

Mamoe forovai reyo*(Mt 18.12-14)*

15 ¹Meda yokoiri fore butu rededi vene tau gade ma vegu no rededi vene be bi Iesu di sina neidegedi vo nisi ina rofu baiyadi ri,^t

²Pharisee vene ma ago gira oteimana vene bi ago tau nisi niyadi, “Mina amiye bi vegu no rededi vene faiva nisi ina vene sa kumo iruku irido!”

³Dada Iesu yaku mina mokena ago ina vene rofu niyo:

⁴“Ya tau vakoiri amiye yokoi bi yi mamoe 100 nufa ma yokoi maka bi kamini boyo rego ri, bi mina mamoe 99 nomu ini tavara rededi sanari feresi disi mina yokoi maka boyo reyo maina resi mamu baku rego.

⁵Baku rego ri, bi ada iniye nisi ini megea fafau aisi ⁶uakaisi rauturi okigo. Mina resi bi ini asiyaka vene ma ina atafu amededi vene raka ni egogo resi nigo, ‘Na bi nai boyo reyo mamoe mina baku reyaka dada na sa ada renadi!’ ⁷Makai ya nida omari amededi vene ada regedi amiye yokoi maka ini vegu no feresi moi etagae riyo dada. Idu mokena rorobo vene 99 bi ini vegu no de feresi moi etagae de riyadi dada omari amededi vene ada de regedi.”

Fore forovai reyo

⁸“O goina rema ini siriva fore bi vana ufo, idu yokoi maka bi moi boyo rego vo nisi, ina bi ramefa ori katusi yava guda resi maina rei bogo ma baku rego ba? ⁹Baku rego ri, bi ini asiyaka ma ina atafu amededi vene raka ni egogo resi nigo, ‘Na bi nai siriva fore boyo reyo mina baku reyaka dada na sa ada renadi!’ ¹⁰Mina kana ida dudu ya nida, Sei di ini naivo naivo vima bi ada regedi amiye yokoi maka ini vegu no feresi moi etagae rido dada.”

Mida forovai reyo

¹¹Resi Iesu yaku niyo, “Amiye yokoi bi ini rumana mida remanu. ¹²Usika mida yaku dadisi ini baba niyo, ‘Baba, muyegiya ri beika gugura tau bi nai vo nisi gua na ma.’ Dada mina amiye yaku ini mida remanu di ini beika gugura muyesi ferego kana bi kamini rau reyo. ¹³Meda be koina niyo ri, mina usika mida yaku ini gugura tau moisi ini rautu ferei dadi diyo. Gagani maike tora yokoiri disi ini fore tau ini uka di mokena rofu maku vau reyo. ¹⁴Ina sa beika amedo kana maku vau reyo ma mina gaganiri adabo tora yokoi are reyo ri, bi iniye sa bi beika buni irigi yokoi de. ¹⁵Dada disi moimai reyo mina gaganani amiye yokoi sa. Ina bi ini murori ni feideyo ma ini dona nari rei mago. ¹⁶Ini mokenari bi dona iruku vana magamo iniye ini uka rauna mina moi amuta rigo, idu yokoi

^t 15.1-2 Lk 5.29-30

yaku kana beika yokoi mina mana de irigamo. ¹⁷Gabi mamu ini mokena ina rofu dairi baiyo ri, bi dadisi niyo, ‘Nai baba di moimai rededi vene tau bi ini iruku bi tora gade iridedi ma na bi yomini rauna dudu muyegi reida! ¹⁸Dadisi bogida nai baba rofu nigida, Baba, na bi Sei rofu ma ya rofu vegu no reyaka. ¹⁹Na bi yi mida vo ga na ni; yi moimai amiye yokoi kana na nari re.’ ²⁰Resi bi dadisi ini baba rofu dairiyo.

“Ina bi yava okina koderi, ini baba yaku maikeri gutuna vesi ina rofu iriyeduka resi raga rei bosu ini mida buda aisi fuka reyo. ²¹Ini mida yaku niyo, ‘Baba, na bi Sei rofu ma ya rofu vegu no reyaka, na bi yi mida vo ga ni.’ ²²Idu ini baba yaku raka nisi ini moimai rei tavoi rededi vene rofu niyo, ‘Evade varuka burefe iniye moi desi ae mafa. Ini vanari rini yokoi ae masi ini yukari tamaka ae mafa. ²³Mina resi bosu boromakau mida vana resifa mina ufa ma irakuna tora resi ada renadi! ²⁴Adina nai mida mina bi muyeyo, idu gua bi vegu niyo; eva niyo idu disi dairiyo ma baku reyafa.’ Kamini irakuna ekeyadi.

²⁵“Mina medari ini ourena mida bi murori ameyo. Dairi baiyo ri yava adinari bi gita kukuroka ma adena udedi mina neideyo. ²⁶Dada naivo amiye yokoi raka nisi ni kaitesi niyo, ‘Mina bi beika rededi?’ ²⁷Mina naivo amiye yaku ni kabai resi niyo, ‘Yi dubuini dairi okiyo dada yi baba yaku boromakau mida vana masifa mina usi irakuna rededi, adina yi baba yaku buni dudu dairi moiyo dada.’

²⁸“Mina ourena mida bi gubuyo resi yava ideri de dui rei boyo; dada ini baba yaku desi ni guba reyo dui reyaine vo nisi. ²⁹Idu ni kabai resi niyo, ‘Ve kumo yomina lagani tau na yi moimai reyaka yi naivo amiye kana, resi yi ago gira mina de neidei kora regamaka. Idu ya bi gouti mida nai asiyaka vene sa irakuna regi ka de na maro! ³⁰Idu yi mina mida bi yi gugura fore tau koa rededi rema vene rofu maka rau rei vau resi yavari dairiyo ri, ya bi boromakau mida vana resifa mina rofu uyo!’ ³¹Ini baba yaku ni kabai resi niyo, ‘Nai mida, ya bi ari neinei na sa dada beika tau nai bi yi. ³²Idu buni bi ada resi irakuna renadi, adina yi dubuini bi muyeyo, idu gua bi vegu niyo; disi forovai reyo, idu, gua baku reyafa.’ ”

Gugura fore nari redo amiye mokena buni nufa

16 ¹Iesu ka ini usi dina vene rofu niyo, “Gugura fore tau amiye yokoi ini gugura nari redo amiye yokoi nufa amegamo. Mina gugura fore tau amiye ni oteimaradi bi ini gugura nari redo amiye yaku ini fore iri vau regamo. ²Dada raka nisi niyo, ‘Na bi mina sina nidedi neideida. Nai fore gokai makusa mina bi buni na oteimagiya, adina ya bi nai gugura tau moi ourefeidesa bi moi dairigida.’ ³Mina naivo amiye yaku iniye kamini niyo, ‘Nai amiye tora bi nai moimairi kamini na moi etagae rigo ma na bi kono goenari yeiva de ma amiye rofu ni guba renari ka maena reida; dada na bi beika regida? ⁴Idu ida yokoi amedo bi na

na diba; nai moimairi nai moi etagae rigo ri, nai asiyaka vene yaku ini javari na moi afei dui regedi.’

⁵“Kamini kaere ini amiye tora rofu ini beika moiyadi rofu gabi mago vene raka ni vau resi amiye yokoi siko rofu ni kaiteyo, ‘Ya bi nai amiye tora rofu bi gokaisanu magiya?’ ⁶‘Olive oira botoro 100^u magida,’ vo niyo. Ma yaku niyo, ‘Yi moiyo kana fefa bi mini, moisi ameinu resi evade 50 bura ri.’ ⁷Resi yokoi ni kaiteyo, ‘Ma ya bi gokaisanu magiya?’ Ina yaku niyo, ‘Witi fuse 100.’” Kamini ina rofu niyo, ‘Yi moiyo kana fefa bi mini, moisi 80 bura ri.’

⁸“Gabi ini amiye tora yaku makai reyo ma neideyo dada ini roka ni odoro reyo, adina bi mokena buni dudu ini moimai reyo; dada mina kono vene diba mokena buni dudu ini moimai rededi, idu vabara vene ini diba bi keika mokena buni dudu ini moimai rededi.”

⁹Ma Iesu ka niyo, “Mina dada ya vene rofu nida: yi kono di gugura dudu vegu rau regasa auta refa, ye mina gugura koina nigo ri Sei yaku ini toga toga amedo sanari ya afei dui regedi dada. ¹⁰Kaere amiye yaku beika keika keika rofu nari rei mona rego, ina bi beika tora ka nari rei mona rego. Idu beika keika keika de ofa ofa dudu nari rego amiye bi beika tora rofu ka ofa ofa dudu de nari rego. ¹¹Ya kono di gugura de nari rei mona reyadi vo nisi, ya yaku gugura rama^w dudu ka de nari rei mona regedi. ¹²Resi ya bi amiye be di gugura nari rei mona de reyo vo nisi, bi kaere yaku yi gugura rama ya mago?

¹³“Moimai rei tavoi redo amiye yokoi yaku amiye tora remanu di moimai de rego. Adina bi yokoi rofu bi gubuyo resi yokoi rofu bi uka mago; o ina bi yokoi di ago neidesi yokoi rofu bi mokei itu rego. Ya bi Sei ma fore ka di moimai rei tavoi rededi vene anua moimai regedi.”^x

Iesu di ini sina be

(Mt 11.12-13; 5.31-32; Mk 10.11-12)

¹⁴Pharisee vene yaku mina sina neideyadi ri, bi Iesu ni ninika reyadi, adina ina vene bi fore mokei tora rededi. ¹⁵Idu Iesu yaku ina vene rofu niyo, “Ya vene yaku amiye di nemokori ya kaya yi vegu bi rorobo moi ofa ofa ago vo nigasa rededi, idu Sei bi ina diba yi uka mokena; adina beika gugura bi buni iniye amiye di mokenari mina bi Sei di nemokori no iniye kino nufa.

¹⁶“Moses di ago gira ma Sei di ago niyadi vene di ago bura reyadi bi ni odoro regamadi ma John Baptist di okina ariri baiyo. Mina ariri gutuna Sei di ourefeidenana amena sana di sina buni bi ni ogau rededi mini ma amiye tau bi ini yeiva tau dudu dui regika rededi.”^y ¹⁷Idu oma ma kono

^u 16.6 Mina bi 3,000 litre kana. ^v 16.7 Mina bi 21,000 kilogramme kana. ^w 16.11 Mina bi oma di gugura mini. ^x 16.13 Mt 6.24 ^y 16.16 Mt 11.12-13

bi ini ida nufa roro nigedi, idu ago girari bura reyadi mina di tuta yokoi kava de roro nigo.^z

¹⁸“Kaere amiye ini rema feresi rema bouna mego, bi koa rego; ma mina amiye kaere bi rema mego, ka bi koa rego.”^a

Gugura tau amiye ma Lazarus

¹⁹“Gugura tau amiye yokoi amegamo; ina bi varuka burefe iniye mina risi ada regasa iruku buni ari neinei irigamo. ²⁰Ina yava ida nefauri bi irava amiye ini roka Lazarus mina bae amegamo. Ini rovaita mina bi ara yaku ni vai rena iniye reyo. ²¹Ini ukari mokegamo bi mina gugura tau amiye di iruku bubudo ini teiborori yareyadi mina irigo. Auna yaku ka bosu ini ara uaka regamadi.

²²“Mina irava amiye muyeyo ri, bi Sei di naivo naivo amiye yaku Abraham atafu afei boyadi. Kamini gugura tau amiye ka muyeyo ma guri aiyadi. ²³Muyena sanari^b esika moiga ameyo ri, bi ini nemoko maku boyo ri, bi maikeri gutuna Abraham veyo ma Lazarus bi ina atafu ameyo. ²⁴Dada raka niyo, ‘Abraham, nai baba, na iriyeduka re! Lazarus ni feidegiya ma ini vana metona dudu koruri bi risi nai afiye moi amuta reyaine, adina na bi esika tora iniye mina ita ideri moida!’

²⁵“Idu Abraham yaku niyo, ‘Nai mida, moke, yi vegu amegamo ri, gugura buni moigamo ma Lazarus bi no mina moiyo. Idu ya esika moisa ri, ina bi minari gua ada redo. ²⁶Ma yomakai, una remanu uni utari bi kono ruba tora gade amedo, dada kaere minari gutuna ugasa bae nego vo nigo bi rena anua rego ma mirona eta rofu ugasa baina ka rena anua rego.’ ²⁷Kamini mina gugura tau amiye yaku niyo, ‘Makai vo nisi bi ya ni guba reida, baba Abraham, Lazarus nai baba di yavari ni feide. ²⁸Mironari bi nai dubuiyaka vana berou autu. Ni feidegiya kumo nesi ni oteimago mina esika sanari ina ka ga baiyagane.’

²⁹“Idu Abraham yaku niyo, ‘Moses ma Sei di ago nidedi vene di ini ago bi ina vene sa; ina rofu maka ago neideyagane.’ ³⁰Idu mina gugura tau amiye yaku niyo, ‘Baba Abraham, mina bi buni de! Amiye yokoi muyenari gutuna ina vene rofu dadisi boi nego ri vo nisi, bi ini vegu no feresi moi etagae rigedi.’ ³¹Idu Abraham yaku niyo, ‘Moses ma Sei di ago nidedi vene di ago de neidegedi vo nisi, bi muyena amiye dadigo rofu yaku ka ini uka de moi kero regedi.’ ”

Vegu no

(Mt 18.6-7, 21-22; Mk 9.42)

17 ¹Iesu yaku ini usi dina vene rofu niyo, “Vegu no fafau uka maina rena vegu bi rama iniye vata nigo, idu mina vegu no fafau uka

^z 16.17 Mt 5.18 ^a 16.18 Mt 5.32; 1 Cor 7.10-11 ^b 16.23 ita moka sana: Muyena sana.

maina redo amiye bi ina rofu bi gokai no iniye iniye! ²Amiye yokoi yaku mina mida keika keika yokoi ourefeidego vo nisi ma vegu no rego bi kaunava tora moigo. Bi buni bi witi utei rina di fore tora ini kuriri ukita resi davarari makugo. ³Mokena dudu ya kaya nari re!^c

“Yi usika ourena vegu no rego ri vo nisi, bi ni kumo ga reyaine; ini vegu no feresi moi etagae rigo ri vo nisi, ini vegu no toto ni. ⁴Ya rofu vegu no mina meda yokoi makari uru viro vara reibigo rofu baigasa ya uru viro vara nibigo, ‘Na bi vegu no feresi moi etagae riyo,’ vo nibigo ri, bi ya bi ini vegu no reyo mina toto ni.”

Uka vari gira mana

⁵Varika Amiye di ni feidena vene yaku ina rofu niyadi, “Uni mokena vari gira aina ya rofu moi tora ri.”

⁶Ma Varika Amiye ni kabai reyo, “Yi mokena vari gira aina bi mastadi di yo kana vo nisi, bi yabo tora rofu nigedi, ‘Ya kaya daru noibanu rae resi koru moka torari vari!’ vo nigedi ri, yi ago neidego.

Naivonaivo amiye di moimai

⁷“Ya yokoi minari yaku yi moimai rei tavoi redo amiye bi murori moimai reibigo, o mamoe vana rei vau resi yavari okigo ri, bi ina rofu nigiya, ‘Baisi amesi iruku iri,’ de vo nigiya. ⁸Ide mada! Ya bi nigiya, ‘Nai iruku feidesi varuka burefe risi nai ita koru naivo regiya bogo nai koru ma iruku iri vau regida mamoe; gabi yi koru ma iruku irigiya.’ ⁹Mina moimai rei tavoi redo amiye yi ago neideyo, idu ina ni buni tora gade de magiya. ¹⁰Mina dada, ya vene ka, niyadi kana rei vau regedi ri, bi nigiya, ‘Una bi ka moimai rei tavoi rededi vene itafu; mina bi uni moimai maka reyafa.’ ”

Iesu yaku amiye vana ufo moi buni riyo

¹¹Iesu Jerusalem seira risi bogamo ri, bi Samaria ma Galilee taoni di kono utari boyo. ¹²Rautu yokoi dui reyo ri, refera vene vana ufo baku reyadi kaere bi maikeri are resi ¹³raka niyadi, “Iesu, Varika Amiye, una iriyeduka re!”

¹⁴Iesu yaku ina vene vesi niyo, “Bofa kumo Sei ma amiye utari naivo vene ya veyagane.”^d

Idauri boyadi ri, bi ini rovaita moi ruaka rido.^e ¹⁵Kamini amiye yokoi maka yaku ini rovaita moi buni riyo mina veyo ri, bi dairi baisi goroka tora dudu Sei di roka moi odoro resi ¹⁶Iesu di yuka adinari kero resi buni tora gade niyo. Mina amiye bi Samaria amiye. ¹⁷Kamini Iesu yaku niyo, “Amiye bi vana ufo moi ruaka riyaka. Ma mina amiye vana berou autu

^c 17.3 Mt 18.15 ^d 17.14 Lev 14.1-32 ^e 17.14 *moi ruaka rido*: 5.12 baku re.

vana raro bi goini? ¹⁸Beika resi mina Israel de amiye yaku maka dairiyo Sei di roka moi odoro regi ba?” ¹⁹Kamini Iesu yaku ina rofu niyo, “Dadisi bo. Yi mokena vari gira aina yaku ya moi buni riyu.”

Sei di ourefeidenana amena sana gokai dego

(Mt 24.23-28, 37-41)

²⁰Pharisee vene be yaku Iesu ni kaitesi niyadi, “Sei di ourefeidenana amena sana goivaka ogau nigo?” Ina vene rofu ni kabai resi niyo, “Sei di ourefeidenana amena sana gokai dego bi ini rebe de vegiya. ²¹Yokoi yaku ka de nigo, ‘Vefa, ina bi yomini!’ o, ‘Ina bi yoroni!’; adina bi Sei yaku yi ideri ourefeidesi amedo.”

²²Kamini Iesu yaku ini usi dina vene rofu niyo, “Amiye di Mida di ini meda baigedi ma ya yaku mina meda vegi ura regedi vo nigedi, idu de vegedi. ²³Be vene yaku ya rofu nigedi, ‘Mironari nei rei vefa!’ o ‘Minari nei rei vefa!’ Idu bosu maina ga refa, ²⁴adina bi ayena yaku kamanika redo ri oma berou eta rofu vabara ni bodo berou rofu moido kana Amiye di Mida di ini dena ari bi mina kana rego. ²⁵Mina vata nina koderi, bi esika tau tora siko moigo ma mina ari vene yaku ina rofu gedu magedi kumo. ²⁶Kamini Noah di medari reyadi kana, Amiye di Mida dena medari ka makai regedi.^f ²⁷Ina vene bi iruku ma koru irigasa rumana ma rema megasa rei bogamadi boyo ini mina medari Noah sisima ideri dui reyo mamo, bi abata yaku desi ina vene ukero vau reyo.^g ²⁸Lot di medari ka kana ina vene tau bi iruku ma koru irigasa voi voi regasa muro regasa yava regasa rei bogamadi ri.^h ²⁹Lot yaku Sodom ferei yakuyo medari, Sei yaku fore ita omari gutuna miya kana moi feidesi ina vene ukero vau reyo. ³⁰Amiye di Mida ogau nigo medari ka mina kana vegu vata nigo.

³¹“Mina medari yava tebo odorori amiye bi ga neyaine ini yavari gugura fore ga moi yakuyaine; ma murori amedo amiye ka, ga dairiyaine.ⁱ ³²Lot di ini rema beika vegu rofu vata niyo ina mokefa!^j ³³Kaere ini vegu moigi maina rego, bi ini vegu de moigo, idu kaere ini vegu you feidego, bi ini vegu moigo.^k ³⁴Ya rofu nida, mina urusari, amiye remanu bi ekama yokoi makari varebigedi. Yokoi bi moi etagae risi nokoi bi ferego. ³⁵Rema remanu vakoi fore dudu witi utei rebigedi ri, yokoi bi moi etagae risi nokoi bi ferego.” ³⁶^l

³⁷Kamini ini usi dina vene yaku ni kaiteyadi, “Varika Amiye, mina vegu bi goinari vata nigo?”

Ye ni kabai reyo, “Muyena rovaita amedo sanari bi gayo bora ka mina sanari eogo regedi.”

^f 17.26 Gen 6.5-8 ^g 17.27 Gen 7.6-24 ^h 17.28-29 Gen 18.20–19.25

ⁱ 17.31 Mt 24.17-18; Mk 13.15-16 ^j 17.32 Gen 19.26 ^k 17.33 Mt 10.39; 16.25; Mk 8.35; Lk 9.24; Jn 12.25 ^l 17.36 Bura bedakai nanaka 36 nufa: *Amiye remanu vakoi gogo murori moimai rebigedi ri yokoi bi moi etagae risi yokoi bi ferego* (Mt 24.40 baku re).

Rema obu ma kota neidena amiye di mokena ago

18 ¹Kamini Iesu yaku mokena ago yokoi ina rofu nisi oteimasi ari neinei usa usa niyaganedi, ma kosika bi ga reyagane vo nisi. ²“Taoni yokoiri kota neidena amiye yokoi amegamo, kaere bi Sei rofu ori de resi amiye rofu moi kikifa de regamo. ³Minari ka obu yokoi amegamo. Ina bi ari neinei baigasa nigamo, ‘Ya bi nai tuma vene rofu na moi rama rigiya bi buni!’ ⁴Mina kota neidena amiye bi meda be ini ago bi ni gedu magamo, idu gabi iniye rofu kamini niyo, ‘Na ka bi Sei rofu ori de resi amiye rofu ka moi kikifa de reida, ⁵idu mina obu yaku ago tau nido dada, ini kota rina usa nido kana bi regida, bi dairisi ada esika na mago baebu!’”

⁶Resi Varika Amiye yaku niyo, “Mina mokena rorobo de kota neidena amiye yaku niyo mina neidefa. ⁷Sei yaku gua ini abidi resi moiyo vene kaere uru ari ina rofu isaka nidedi bi ini ago neidesi ini vegu moi rama rigo, ba ide? Kiya kiya aedego ba? ⁸Ya vene rofu nida, evade ini ago neidesi ini vegu moi rama rigo. Idu Amiye di Mida ini dego ri, bi mina kono tora noibanuri mokena vari gira aina baku rego ba ide?”

Pharisee amiye ma fore butu redo amiye di mokena ago

⁹Iesu yaku ka amiye be rofu mina mokena ago niyo. Mina vene yaku ini mokeyadi bi, ina bi mokena rorobo nufa vene ma be vene rofu mokeyadi bi vegu no rededi vene. ¹⁰“Ari yokoiri, amiye remanu yaku Sei vakena yavari usa usa nig boyadi; amiye yokoi bi Pharisee amiye ma yokoi bi fore butu redo amiye.

¹¹“Pharisee amiye yaku gaimari etae resi are resi usa usa niyo,^m ‘Sei, ya rofu buni tora gade nida, na bi be kana de: ofa ofa dudu duma duma rededi vene, vegu no rededi vene, o koa rededi vene. Na ka mina fore butu redo amiye kana de; ¹²fura yokoi makari meda remanuri, bi iruku oyo resi nai gugurari beika vana ufo amedo ri, bi yokoi maka bi ya rofu maida.’

¹³“Idu mina fore butu redo amiye bi gaimari are resi ini kuri agu risi ini vana ini kokobari aisi niyo, ‘Sei, na iriyeduka re; na bi vegu no amiye!’ ¹⁴Resi Iesu yaku niyo, “Ya nida, mina amiye remanu ini yavari dairiyadi ri, bi Sei yaku fore butu redo amiye rofu niyo ini vegu bi rorobo, idu mina Pharisee amiye bi de. Kaere iniye moi odoro rigo, bi Sei yaku moi ave nig rigo; ma kaere iniye ave nigo, bi Sei yaku moi odoro rigo.”ⁿ

Iesu mida keika keika buni tora gade maro

(Mt 19.13-15; Mk 10.13-16)

¹⁵Kamini be vene yaku ka ina rofu kakua afei baigamadi bi avaka moyainedi, idu ini usi dina vene yaku mina vesi ni vai reyadi. ¹⁶Idu Iesu

^m **18.11** *gaimari etae resi are resi usa usa niyo; bura bedakai are resi inaike usa usa niyo nufa.* ⁿ **18.14** Mt 23.12; Lk 14.11

yaku mida keika keika rofu raka nisi niyo, “Mida keika keika bi ferefo kumo na rofu baiyagane; ga meki refo, adina Sei di ourefeidenana amena sana bi mina kana vene di. ¹⁷Rama ya nida, kaere amiye yaku Sei di ourefeidenana amena sana mida keika kana de moigo vo nisi, bi de iniye iniye dui rego.”

Amiye gugura tau nufa
(Mt 19.16-30; Mk 10.17-31)

¹⁸Kamini ourefeidenana amiye yokoi yaku ni kaiteyo, “Oteimana amiye buni, beika regida bi toga toga ameibobina vegu moigida?”

¹⁹Ma Iesu yaku niyo, “Beika resi na rofu bi buni vo nisa? Amiye yokoi bi buni de, Sei iniye maka bi buni. ²⁰Ya ya diba ago gira di ago bi: ‘Mena vene koa ga re; amiye umuyena ga re; duma duma ga re; amiye di vegu fafau ofa ofa ago ga ni; yi nono baba di ago neide’ ”^o

²¹Ye mina amiye yaku niyo, “Na keikari gutuna mina kana vegu ago tau vakoi moi gira rei baida.”

²²Ma Iesu yaku mina neideyo ri, bi niyo, “Nokoi maka bi yaku de reyo. Yi gugura tau mina sero resi ini fore irava vene masi yi gugura buni bi omari baku resi na usi bae.” ²³Idu mina neidesi ini uka yarena iniye reyo, adina ina bi gugura tau gade amiye.

²⁴Iesu yaku ina vesi niyo, “Gugura tau gade nufa vene yaku Sei di ourefeidenana amena sanari dui rena bi gira iniye! ²⁵Kamelo^p yaku niduru nemokori dui rego bi aita, idu gugura tau gade nufa amiye yaku Sei di ourefeidenana amena sanari dui rena bi gira iniye.”

²⁶Ye mina ago neideyadi vene yaku niyadi, “Kamini kaere moi vegu rigo?”

²⁷Ma Iesu niyo, “Amiye beika baika yaku anua regedi, Sei yaku mina rego bi aita iniye.”

²⁸Kamini Peter yaku niyo, “Ve kumo, uni beika baika feresi ya usi diyafa.”

²⁹Ma ina vene rofu niyo, “Rama ya nida, amiye yokoi yaku ini yava, o rema, o usika ourena, o nono baba, o mida, Sei di ourefeidenana amena sana rofu fereyo bi, ³⁰mina veguri, bi tora gade iniye moigo. Ma gabi mina meda baigo ri, toga toga ameibobina vegu moigo.”

Iesu dubusa uru regode ini muyena ni okuyo
(Mt 20.17-19; Mk 10.32-34)

³¹Kamini ini amiye tuero moi gaima risi niyo, “Neidefa, una bi Jerusalem bogifa, Sei di ago niyadi vene yaku Amiye di Mida rofu

^o 18.20 Ex 20.12-16; Deut 5.16-20 ^p 18.25 kamelo bi hosi kana; gagani autu sanari amiye di gugura fare moi didedi.

vata nigo vegu bura reyadi mina rama aigo. ³²Tutubena idana vene di vanari aigedi; ina rofu ni kurusi ni no resi ayaka su resi ³³buburu resi umuyegedi. Idu gabi meda regoderi, dubusa dadi rae rego.”

³⁴Idu ini usi dina vene bi mina sina niyo ri, bi ini adari ufatena de reyo. Mina sina di ini rama bi ina vene di mokenari sui niyo ma ini beika nigamo bi ina vene ka ina toto.

Iesu yaku usa usa nina amiye ne taufa nufa moi buni riyo

(Mt 20.29-34; Mk 10.46-52)

³⁵Iesu Jericho negau okiyo ri, bi ne taufa amiye yokoi ida negau amegasa usa nigamo. ³⁶Amiye tau gade bae bogamadi mina neidegamo ri, bi ni kaitesi niyo, “Mina bi beika?”

³⁷Kamini niyadi, “Iesu Nazareth amiye bi bae boyo dada.”

³⁸Kamini raka nisi niyo, “Iesu, David di tutubena, na iriyeduka re!”

³⁹Ourei boyadi vene yaku emaradi babo niyaine vo niyadi, idu besa raka niyo, “David di tutubena, na iriyeduka re!”

⁴⁰Ye Iesu are resi ago gira dudu ina rofu moi baiyaganedi vo niyo. Atafu baiyo ri, bi ni kaiteyo, ⁴¹“Ya ura reisa bi beika ya rofu regida?”

Ni kabai resi niyo, “Varika Amiye, na ura reida bi dubusa vegida.”

⁴²Iesu yaku niyo, “Ve kumo! Yi mokena vari gira aina yaku ya moi buni riyo.”

⁴³Ma evade maka ini ne dubusa areyadi ma Iesu usi bosu Sei di roka moi odoro regamo. Amiye tau yaku mina veyadi ri, bi ina vene ka Sei di roka ni odoro reyadi.

Iesu ma Zacchaeus

19 ¹Iesu Jericho dui resi ebu rei bogamo. ²Minari bi amiye roka Zacchaeus, kaere bi fore butu redo vene di amiye tora. Iniye ka bi gugura tau amiye. ³Ini ura bi Iesu vego, idu ina bi amiye tumu dada, vena anua regamo, amiye ka berou bi tau tora iniye dada. ⁴Mina dada ouresi raga bosu yabo tora yokoi firu boyo, Iesu vegi. Ina bi mina dakai baigo dada. ⁵Iesu yaku mina sana okiyo ri, bi ne odoro resi ina rofu niyo, “Zacchaeus, evade soka rei degiya, adina na bi gua yi yavari amegida.”

⁶Dada evade soka resi ini yavari ada dudu moi dui reyo. ⁷Amiye tau yaku mina veyadi ri, bi ni mumugu regi kora regasa nigamadi, “Ina bi vegu no redo amiye yokoi di yavari iruku irigi dui reyo.”

⁸Zacchaeus are resi Varika Amiye rofu niyo, “Varika Amiye, nai gugura tauri berou afona moisi bi irava vene rofu magida. Resi amiye ofa dudu ini gugura fore moyaka vo nisi, bi dubusa uru vana raro besa dairi magida.”

⁹Iesu yaku ina rofu niyo, “Gua medari moi vegu rina bi mina yavari dui reyo, adina bi mina amiye ka Abraham di mida. ¹⁰Amiye di Mida deyo bi boyo reyadi vene maina rei baku resi moi vegu rigo.”^q

Goro fore di mokena ago

(Mt 25.14-30)

¹¹Mina sina neidegamadi ri, bi yavoi resi mokena ago niyo, adina ina bi Jerusalem atafu okiyo, ma amiye yaku mokegamadi bi Sei di ourefeidenana amena sana bi minari evade maka ogau nigo. ¹²Mina usi niyo, “Amiye yokoi, kaere bi varika amiye kana, dadisi gaganai maika yokoiri diyo iniye kini rigedi ma dairigo. ¹³Dada ouresi ini moimai rei tavoi redevi vene tau vakoi vana ufo raka nisi goro fore’ yokoi yokoi masi niyo, ‘Mina fore fafau moimai refa bogo dairi okigida kumo.’ ¹⁴Idu ini gaganai vene yaku bi ini ura de iniye regamadi, dada naivo vene ago ni feideyadi ma usi disi niyadi, ‘Una ura de resifa mina amiye yaku uni kini niyaine.’

¹⁵“Kini nisi ini gaganiri dairiyo. Mina usi bi ago ni feideyo ini moimai rei tavoi redevi vene rofu fore maro fafau moimai reyadi ri beika be reyadi mina ini nemokori vego vo nisi. ¹⁶Ourena amiye yaku baisi niyo, ‘Varika amiye, yi goro fore fafau dubusa vana ufo riyaka.’ ¹⁷Ma ina rofu niyo, ‘Rei mona reyo; ya bi nai moimai rei tavoi reisa amiye buni! Beika keika ya maraka bi nari rei mona reyo dada, taoni vana ufo bi nari regiya.’ ¹⁸Ina usi naivo amiye yaku baisi niyo, ‘Varika amiye e, yi goro fore fafau bi dubusa vana berou autu riyaka.’ ¹⁹Ma ina rofu ka niyo, ‘Taoni vana berou autu bi nari regiya.’

²⁰“Kamini naivo amiye yokoi yaku baisi niyo, ‘Varika amiye e, yi goro fore bi yomini. Moko yokoiri aisi moi sui reyaka. ²¹Ya rofu ori reyaka, adina ya bi amiye gira. Banikari de aiyu mina moisa ma varina de reyo mina goe goe reisa.’ ²²Ini varika amiye ni kabai reyo, ‘Ya kaya yi sina niyo dudu ya kota regida. Ya bi amei tavoi resi moimai rei tavoi reisa amiye no! Ya diba niyo na bi amiye gira, beika banikari de aiyaka bi moida ma beika de variyaka bi goesi moida. ²³Beika resi nai fore bi banikari de moi aiyu? Kamini na dairi baiyagadu ri, bi dubusa bae moi yagadu, banika yaku fore keika fafau aiyagadu mina sa.’

²⁴“Resi atafu are redevi vene rofu niyo, ‘Ini goro fore yokoi maka moisi vana ufo nufa amiye rofu mafa.’ ²⁵Idu niyadi, ‘Varika amiye, ina bi ka ini goro fore bi vana ufo!’ ²⁶Ni kabai resi niyo, ‘Ya rofu nida, amiye kaere ini beika baika nufa bi moi tanu mago. Idu kaere ina bi de iniye iniye nufa, ka ina rofu keika iniye amedo bi moi dairigo.’^s ²⁷Idu nai tuma vene kaere yaku ura de reyadi na kini nigida vo niyadi, bi afei baisi minari nai nemokori u vau refa!’ ”

^q 19.10 Mt 18.10 ^r 19.13 *goro fore*: Goro fore yokoi maka bi rautu amiye di moimai meda 100 ri di ini davana kana. ^s 19.26 Mt 13.12; Mk 4.25; Lk 8.18

Iesu kini kana Jerusalem ri dui reyo
(Mt 21.1-11; Mk 11.1-11; Jn 12.12-19)

²⁸Iesu yaku mina sina ni vau reyo ri, dadisi Jerusalem ri ourei boyo. ²⁹Kamini Bethphage ma Bethany taoni keika, omuna di roka Olive yabo adinari bae ekaira regasa ini usi dina amiye remanu ni feidesi ³⁰niyo, “Rautu yokoi yi budari rofu bogedi. Mina sanari boi okigedi ri, bi donkey di mida ukita riyadi baku regedi; ina bi keu rina kode. Younesi moi baifa. ³¹Ye amiye yokoi yaku ya ni kaitego beika resi ini maena younededi vo nigo vo nisi, bi nifa, ‘Varika Amiye^t yaku ura redo dada.’ ”

³²Ye ni feideyo vene feresi baku reyadi, ini niyo kana. ³³Donkey di mida di maena younei deyadi ri, bi ini nari rededi vene yaku ni kaiteyadi, “Beika resi ini maena younededi?”

³⁴Ni kabai resi niyadi, “Varika Amiye^u yaku ura redo dada.” ³⁵Resi Iesu rofu moi baisi ini bou varuka fafau yousi Iesu odorori aiyadi. ³⁶Keu risi bogamo ri, bi amiye yaku ini fafau varuka moisi idau ibu regamadi.

³⁷Jerusalem atafu, Olive yabo di omuna ika di ida dena sanari deyo ri, bi ini usi dina vene tau gade yaku goroka tora dudu Sei ni odoro rigi kora regamadi, mokena vegu tau veyadi dada. ³⁸Yomakai nigamadi, “Sei buni tora gade mado kini kaere Varika Amiye di rokari baido! Uka amuta ma Sei di vabara oma odoro iniyeri ameyaine!”^v

³⁹Kamini Pharisee vene be mina amiye tau fogori yaku ina rofu niyadi, “Oteimana amiye, yi usi dina vene emasi nivo makai ga niyagane!”

⁴⁰Ni kabai resi niyo, “Ya nida, bere nigedi vo nisi, bi fore iniye raka nigedi.”

Iesu yaku Jerusalem rofu isaka niyo

⁴¹Jerusalem kaira resi ne rei veyo ri, bi iriyeduka resi isaka niyo.

⁴²Resi niyo, “Gokai uka amuta nina di vegu gua medari ya diba niyagadu! Idu gua bi de veifategedi! ⁴³Ari yokoi baigo mironi ri, bi yi tuma vene yaku ya rofu kotari ya buru resi kafu tau mina biri rigedi.

⁴⁴Resi yi amiye tau sa, yi kota ideri ya ukero vau vau regedi. Fore yokoi maka de feregedi ma are regasa ameibigo. Ini adina bi, Sei ya rofu baiyo ari bi de vei mama reyadi!”

Iesu bi Sei ni vakena yavari boyo
(Mt 21.12-17; Mk 11.15-19; Jn 2.13-22)

⁴⁵Kamini bi Sei vakena yavari dui resi sero rena vene umeki rei feidegi kora resi ⁴⁶niyo, “Sena bura reyo, ‘Nai yava bi usa usa nina yava,’ idu ya vene yaku duma duma vene di sui nina yava kana reyadi!”^w

^t 19.31 Varika Amiye; o ini biyaguna. ^u 19.34 Varika Amiye; o ini biyaguna.

^v 19.38 Ps 118.26 ^w 19.46 Is 56.7; Jer 7.11

⁴⁷Meda neinei Sei vakena yavari amiye oteimagamo, idu Sei ma amiye utari naivo vene di varika vene, ago gira oteimana vene, ma amiye di ini tora vene be yaku bi umuyegedi vo nigamadi.* ⁴⁸Ida de baku reyadi gokai regedi, mina adina amiye tau tora bi ini ago moi gira reyadi.

Iesu di vava mina ni kaiteyadi

(Mt 21.23-27; Mk 11.27-33)

20 ¹Meda yokoiri, Sei vakena yava ideri, amiye oteimasi ago buni ni rausi regamo ri, bi Sei ma amiye utari naivo vene di varika vene, ago gira oteimana vene, ma tora vene ina rofu bosu are regasa ²ni kaiteyadi, “Una ni, beika vava dudu mina vegu reisa? Ma kaere yaku mina vava ya maro?”

³Ma ni kabai resi niyo, “Nai ni kaitena ka bi yokoi maka. Na nifa, ⁴John di babatiso rena di vava bi oma gutuna ba amiye gutuna deyo?”

⁵Ye iniye iniye ni dodu resi niyadi, “Bema nigifa, ‘Oma gutuna,’ ina yaku ni kaitego, ‘Ma beika resi ina rofu mokena vari gira de aiyadi?’

⁶Idu bema nigifa, ‘Amiye gutuna,’ mina amiye tau yaku fore dudu una umuyegedi, adina ini ukari mokededi bi John bi Sei di ago niyo amiye yokoi.” ⁷Ye ni kabai reyadi, “Una una toto bi goinari gutuna deyo.”

⁸Ma Iesu yaku niyo, “Na yaku ka makai de ya nigida na bi beika vava dudu mina vegu reida bi.”

Waini meko di muro nari vene di mokena ago

(Mt 21.33-46; Mk 12.1-12)

⁹Kamini amiye rofu mina mokena ago nigi kora reyo: “Amiye yokoi waini meko di muro varisi muro nari rena vene be ini nanaka moigika ni masi yava ika oto diyo.” ¹⁰Mina usi butu rena di meda okiyo ri, bi ini moimai rei tavoi redo amiye yokoi muro nari rena vene rofu ni feideyo ma waini meko vareyo mina bi butu reyainedi. Idu bi mina moimai rei tavoi redo amiye ubobo resi vana notoka ni feideyadi. ¹¹Kamini dubusa ini moimai rei tavoi redo amiye yokoi ina vene rofu ni feideyo, idu mina vene yaku ka ubobo resi ni moi maena resi vana notoka ni feideyadi. ¹²Dubusa yokoi ni feideyo, mina bi uru regode niyo mini. Mina ka ubobo resi etofaro makuyadi. ¹³Ye waini meko di muro di biyaguna amiye yaku niyo, ‘Beika bi regida? Nai mida ni feidegida, kaere bi nai uka maida mida; ina vegedi ri, bi rama matagini regedi!’ ¹⁴Idu muro nari rededi vene yaku vesi iniye iniye ni dodu resi niyadi, ‘Mina bi muro biyaguna nigo. Baifo kumo umuyenadi, ma beika baika ini baba ferego bi uni nigo!’ ¹⁵Ye waini meko di muro etofarori meki resi umuyeyadi.

“Ye waini meko di muro biyaguna amiye bi ina vene rofu gokai beika be rego? ¹⁶Ina bi baisi muro nari rededi vene umuyesi muro bi bouna vene mago.”

* 19.47 Lk 21.37 † 20.9 Is 5.1

Amiye yaku mina sina neideyadi ri, bi niyadi, “Makai bi ga ogau niyaine!”

¹⁷Idu ina vene vesi niyo, “Ye mina bura riyo bi beika?”

‘Yava akuna vene moi kekevata uyadi fore
bi yava moi gira redo fore iniye niyo.’

¹⁸Mina fore amiye tau vakoi kaere fafau keto rego bi rei vau uratokugo, ma mina fore kaere fafau yarego bi mina amiye foyoma rego ma budoka nigo.”

Fore butu resi mana di ni kaitena ago

(Mt 22.15-22; Mk 12.13-17)

¹⁹Ma mina meda nemoko makari ago gira oteimana vene ma Sei ma amiye utari naivo vene di varika vene yaku ina moi gira regika ida maina reyadi, adina diba niyadi mina mokena ago ina vene fafau niyo. Idu amiye rofu ori resi ²⁰Resi Iesu vei mona resi ini ura bi Rome vene di gavana di ourefeidenana ma vava gabireri aigedi. Dada amiye be fore masi ni feideyadi, kaere bi sina buni buni kana dudu niyagane. Idu rama iniye bi, Iesu ini ago nigo ri ni eru regedi. ²¹Ye baisi Iesu rofu niyadi, “Oteimana amiye, una una diba ya bi sina rama maka nisa amiye. Ya bi amiye gokai kana bi de mokeisa, idu sina rama dudu maka Sei di ida oteimaisa. ²²Una ni, Caesar rofu takesi fore fei rena bi uni ago gira rofu rorobo ba ide?”

²³Idu Iesu bi sena ini eru rena vegu vei mama resi niyo, ²⁴“Siriva fore yokoi na oteimafa. Mina bi kaere di vima ma roka?”

Ye ni kabai reyadi, “Caesar di.”

²⁵Kamini ina vene rofu niyo, “Beika Caesar di, bi Caesar mafa, ma beika Sei di, bi Sei mafa.”

²⁶Beika ago niyo rofu amiye di nemokori eru regika anua reyadi; ini ago dairi maro rofu tururu reyadi, dada bere niyadi.

Muyenari dadi rae rena di ini ni kaitena ago

(Mt 22.23-33; Mk 12.18-27)

²⁷Kamini Sadducee vene be Iesu rofu baiyadi, kaere bi muyena gutuna dadi rae rena bi egere de vo nidedi vene.^a ²⁸Ina yaku niyadi, “Oteimana amiye, Moses yaku una rofu bura reyo bi: ‘Amiye kaere ini rema feresi muyego, mida de ma natu bi ini dubuini yaku mina obu mego ma ina rofu ini dubuini di mida mago.’^b ²⁹Yokaru bi dubuiyaka viro vara amegamadi. Ourena bi rema meyo, idu muyeyo, mida yokoi de. ³⁰Ina usi vata niyo amiye ka makai ³¹ma mina usi amiye ka makai meyo. Mina vegu yokoi maka mina dubuiyaka viro vara tau noibanu

^z 20.17 Ps 118.22 ^a 20.27 Acts 23.8 ^b 20.28 Deut 25.5

rofu vata niyo — ina tau noibanu mida de muyeyadi. ³²Gabi bi mina rema ka muyeyo. ³³Ye muyena gutuna dadi rae renari, ina bi kaere di rema nigo, adina bi amiye viro vara tau noibanu yaku meyadi?”

³⁴Ma Iesu yaku ni kabai reyo, “Gua ariri amededi rema ma rumana bi mededi, ³⁵idu kaere vene Sei yaku niyo bi buni mina meda baigo ri ameyaine, muyena gutuna dadi rae regedi ri, bi iniye iniye de megedi. ³⁶Ina vene bi naivo naivo vima kana nigedi, de muyegedi. Ina vene bi Sei di mida nidedi, adina bi muyenari gutuna dadiyadi. ³⁷Idu mirona imiye yabo orina agori bi Moses yaku ka una oteimaro, amiye bi muyena gutuna dadi rae regedi, adina bi Varika Amiye rofu niyo bi ‘Abraham di Sei, Isaac di Sei ma Jacob di Sei’ vo niyo.^c ³⁸Ina bi vegu ameibobina di Sei, diya muyena di Sei. Ini mokenari ina tau noibanu bi vegu amededi.”

³⁹Ago gira oteimana vene be yaku ni kabai resi niyadi, “Oteimana amiye, ni kabai rei mona reyo!” ⁴⁰Adina dubusa ni kaitegika de regamadi.

Keriso di ini ni kaitena ago

(Mt 22.41-46; Mk 12.35-37)

⁴¹Kamini Iesu ni kaitesi niyo, “Gokai dada nidedi Keriso bi David di tutubena? ⁴²Adina David iniye yaku Psalms bukari bura riyo,^d

‘Varika Amiye yaku nai Varika Amiye rofu niyo:

Nai vana rama rofu ameinu re

⁴³ kumo na yaku yi tuma vene yi yuka aina sana rigida.’

⁴⁴Mina dada David yaku ‘Varika Amiye,’ vo niyo, ye gokai ida dudu ina bi ini tutubena?”

Iesu yaku ago gira oteimana vene di vegu ni diba reyo

(Mt 23.1-36; Mk 12.38-40)

⁴⁵Amiye tau yaku neidegamadi ri, ini usi dina vene rofu niyo, ⁴⁶“Vei mona refo ago gira oteimana vene rofu, kaere varuka doba dudu nana regika ma maketiri amiye yaku ago buni dudu matagini reyagane ma usa usa yavari ma irakuna sanari amena sana ka buni torari ura rededi. ⁴⁷Ina vene yaku obu vene di gugura ka duma resi ofa dudu usa usa doba nidedi. Mina kana vene, ini kaunava moigedi bi toe tora iniye!”

Obu di ini fore maro

(Mk 12.41-44)

21 ¹Iesu yaku ne odoro resi bi gugura tau vene yaku Sei ni vakena yava di fore aina mauari ini fore aigamadi mina vegamo. ²Resi minari ka obu irava veyo kaere bi fore keika keika remanu aiyo. ³Resi niyo, “Ya nida, mina obu gugura de nufa bi tora iniye aiyo ma mina

^c 20.37 Ex 3.6 ^d 20.42-43 Ps 110.1

amiye tau yaku aiyadi bi ebu reyo. ⁴Adina mina vene yaku fore tora tora bi ini gugura tau fafau aiyadi, idu mina rema ini gugura nufa de bi, ini tora noibanu aiy; mina bi ini fafau ameibobigo gugura.”

Iesu yaku Sei ni vakena yava di tumuda rigo di ago niyo

(Mt 24.1-2; Mk 13.1-2)

⁵Kamini ini usi dina vene be yaku Sei vakena yava fore buni buni dudu risi Sei rofu moi aigedi gugura buni tau reyadi ni dodi regamadi ri, Iesu yaku bi kamini niyo, ⁶“Gua beika tau vededi — bi ini ari yokoi baigo mironi, mina fore fafau fafau yokoi de amegedi; mina tau gade varadagedi.”

Toe ma esika esika

(Mt 24.3-14; Mk 13.3-13)

⁷Kamini ni kaiteyadi, “Oteimana amiye, mina bi goivaka vata nigedi? Ma ini rebe bi gokai mina vata nigedi?”

⁸Ma ina vene rofu niyo, “Nari rei mona refa; nokoi yaku ya eru ga reyaine. Ini adina amiye tau gade nai roka dudu baisi iniye ni kake regedi, ‘Na bi Keriso!’ ma ‘Ari rama bi bae okiyo mini!’ Ina vene usi ga difa. ⁹Idu iya rena ma gavmani fafau ruda rena ago neidegedi ri, mina yaku yi uka ga dadiyaine. Adina mina kana bi ouresi vata niyaine, idu ari metona bi evade baina kode.”

¹⁰Resi bi ka niyo, “Gagani tora iniye iniye ma ourefeidenana vene iniye iniye ruda regedi.” ¹¹Gagani bedakairi, bi kono yagayaga regedi ma adabo ma orefadedi gauka ogau nigedi; ma ori rena beika baika ma rebe tora tora omari ka ogau nigedi. ¹²Mina beika tau vata nina koderi, bi ya vene moisi esika esika ya masi usa usa yavari ma diburari ya kota reyainedi kini ma gavana di nemokori nai roka dada moi erokoko rei bogedi. ¹³Mina medari, bi yi ari buni mini amiye di nemokori nai ago nigedi: na sa amei digamo ri, gokai kana vegu veyo mina. ¹⁴Gokai ina vene di ini ago dairi magedi ya rofu mokena bi moina ga refa,^e ¹⁵adina bi na yaku ago ma mokena tora ya vene rofu magida. Ye yi tuma vene tau bi yi ago kebi rina anua regedi. ¹⁶Yi nono baba, ma yi dubuiyaka, ma yi usika ourena, ma yi asiyaka yaku ka ya muyena rofu siri regedi. ¹⁷Ma amiye tau gade yaku nai roka dada ya gubuyo regedi. ¹⁸Idu yi ada iye yokoi maka kava mina ka de rerevaida ni digo. ¹⁹Uka vari gira mana toga rebigedi mina dudu ya kaya moi vegu rigedi.

Iesu yaku Jerusalem ukero vau rigedi di ago niyo

(Mt 24.15-21; Mk 13.14-19)

²⁰“Iya rededi vene yaku Jerusalem baisi buru ri deyo regedi vegedi ri, bi mokefa mina taoni bi evade ukero vau regedi. ²¹Mina ariri bi ya kaere Judea gaganiri bi omuna rofu ori difa, ma kaere taoni ideri bi feresi ori

^e 21.14-15 Lk 12.11-12

difa, ma ya kaere taoni etofaro bi ga dui refa. ²²Adina mina meda bi 'Kaunava vata nigo Meda', ye vegu tau rofu bura reyadi baisi rama aigedi.^f ²³Mirona ituari mina vegu no vata nigo ri, nono kaere bi rivo nufa ma nono ini mida susu irido ina fafau bi no iniye iniye! Adina bi esika esika tora gade iniye mina kono fafau vata nigo ma Sei di kaunava mina vene fafau yarei dego. ²⁴Be vene bi bainasi dudu umuyegedi, ma be bi vegu moisi gagani gagani tauri moi digedi. Tutubena dava bouna vene be yaku Jerusalem ri okisi ina vene rofu itei rigedi bogo ini ari bae koina nigo.

Amiye di Mida di dego sina

(Mt 24.29-31; Mk 13.24-27)

²⁵"Ye meda, eo ma iya rofu bi de vena rebe mina ogau nigedi. Ma davara ini koru yeiva odoro dadisi kukuroka rebigo mina neidego ri, bi gagani gagani vene tau mina kono tora fafau amededi bi mokena forovai resi ori no iniye nigedi.^g ²⁶Beika vegu mina kono noibanu fafau vata nigedi rofu nari regedi ri, bi amiye yaku ori dudu muyei tamatama regedi. Adina bi omari ini vava amededi mina ka moi tururu regedi. ²⁷Mina usi amiye yaku Amiye di Mida seuyari vava ma vabara tora nufari debigo vegedi.^h ²⁸Mina reremama vata nigi kora rego ri, bi dadi are resi ne odoro rifa, adina Sei ya moi vegu rigo di meda bi baisi negau niyo mini."

Fuka yabo kana di ago

(Mt 24.32-35; Mk 13.28-31)

²⁹Resi mokena ago yokoi niyo: "Fuka yabo ma yabo tau vesi mokefa. ³⁰Ini iye imu rego ri, ya bi diba nigedi amona bi bae negau nido. ³¹Mina dada, mina ogau nibigedi ma vegedi ri, bi ya ya diba Sei di ourefeidena amena sana di ari bi negau nigi rego.

³²"Rama ya nida, gua ari amededi vene bi muyei vau regedi koderi bogo mina beika baika tau gade vata nigedi mammo. ³³Oma ma kono bi roro nigedi, idu nai ago bi roro de nigedi.

Nari rei mona refa!

³⁴"Ya kaya nari rei mona refa! Iruku ma koru gira rofu dadaga ga refa. Yi vegu di toe di mokena tau yaku ya moi forovai ga reyaine. De bi, mina meda bae evade iruruka rego ri, tururu regedi baebu ya bi ivota ideri ya moi gira rigedi kana. ³⁵Adina mina meda bi kono tora noibanu vene tau rofu baisi ogau nigo. ³⁶Mina dada ari neinei nari regasa usa usa nifa ya bi yeiva moisi beika tau vata nigo mina rofu ebu regi Amiye di Mida di ini nemokori are regedi."

^f 21.22 Hos 9.7 ^g 21.25 Is 13.10; Ezek 32.7; Joel 2.31; Rev 6.12-13 ^h 21.27 Dan 7.13; Rev 1.7

³⁷Ari neinei Iesu bi Sei vakena yavari amiye oteimagamo. Idu urusa nigamo ri, bi dadisi Olive yabo di ikari bosu amegamo.ⁱ ³⁸Ari uevegamo ri, bi amiye tau bosu Sei vakena yavari egogo resi ini ago nigo mina neidegi.

Iesu umuyegedi di sina

(Mt 26.1-5; Mk 14.1-2; Jn 11.45-53)

22 ¹Beredi Yeast de Feidena di Irakuna ari bae kaira niyo. Mina ari di roka bi Passover.^j ²Ma Sei ma amiye utari naivo vene di varika vene ma ago gira oteimana vene bi Iesu moisi umuyegedi di ida maina regamadi, adina bi amiye rofu ori reyadi.

Judas yo niyo Iesu tautore regi

(Mt 26.14-16; Mk 14.10-11)

³Minari bi Satani yaku Judas, kaere bi roka Iscariot vo nigamadi, di ukari dui reyo. Ina ka bi Iesu di usi dina amiye tuero yokoi. ⁴Kamini ina bi dadisi Sei ma amiye utari naivo vene di varika vene ma Sei ni vakena yava di iya rena ourefeidenena vene rofu bosu sina sina niyo gokai ida dudu Iesu tautore rego mina. ⁵Bi ada tora gade resi Judas rofu ni tore reyadi fore magedi vo niyadi. ⁶Judas bi mina vene sa ini uka moi yokoi maka risi gokai tautore rego di ida maina regi kora reyo ma amiye tau bi ga ameyaganedi.

Iesu yaku Passover di iruku ini usi dina vene sa iriyadi

(Mt 26.17-25; Mk 14.12-21; Jn 13.21-30)

⁷Ourena meda baiyo ri, Beredi Yeast de Feidena di Irakunari, Passover di mamoe di mida ori sisika regi. ⁸Iesu yaku Peter ma John ni feidesi yomakai niyo: “Bosu Passover di iruku irigifa mina dogo refa.”

⁹Kamini ni kaitesi niyadi, “Yi ura bi goidu dogo regifa?”

¹⁰Ma ni kabai reyo, “Taoni ideri bogedi ri, bi mironari amiye nokoi koru urena adodisi ya baku regedi. Goina yavari dui rego bi usi ka dui resi ¹¹yava biyaguna amiye ni oteimafo, ‘Oteimana amiye yaku ya rofu niyo, Goina daiyutu bi nai usi dina vene sa Passover di iruku irigifa?’ ¹²Mina yava amiye yaku odorori daiyutu tora ya oteimago. Mina bi sena veika reyadi. Mironari uni iruku dogo refo.”

¹³Ma ina remanu bi feresi bi gokai ago niyo kana mina veitao resi Passover di iruku dogo reyadi.

Varika Amiye di iri iri

(Mt 26.26-30; Mk 14.22-26; 1 Cor 11.23-25)

¹⁴Kamini ini iruku irina meda nemoko moiyo ri, Iesu bi ini ni feidena vene sa iruku irina sanari ameinu reyadi. ¹⁵Resi bi ina vene rofu niyo,

ⁱ 21.37 Lk 19.47 ^j 22.1 Ex 12.1-27

“Nai mokena tora bi vakoi gogo amesi mina Passover iruku irigifa, esika esika moina di budari! ¹⁶Adina ya vene ya nida, na bi mina iruku dubusa de irigida bogo ini rama iniye Sei di ini ourefeidenana amena sanari ogau nigo.”

¹⁷Resi Iesu yaku biyo moisi Sei rofu buni tora gade masi niyo, “Mina biyo moisi ya kaya ka rau refa. ¹⁸Adina ya nida, na bi gua rofu ida noki kana mina waini di meko de irigida bogo Sei di ourefeidenana amena sana okigo mamō.”

¹⁹Kamini bi beredi be moisi Sei rofu buni tora gade masi uroki resi ina vene magasa niyo, “Mina bi nai rovaita, ya dada ya maida. Makai resi na rofu mokefa.” ²⁰Iri vau reyadi ri, Iesu bi mina ida dudu biyo moisi niyo, “Mina biyo bi nai dava Sei di uka ago ruaka regi ya vene rofu rausi reyaka.^k

²¹“Idu na tautore rego amiye di vana bi na sa mina teiboro fafau!^l ²²Adina Sei yaku niyo kana Amiye di Mida muyego, idu mina amiye rofu bi iriyeduka no iniye, kaere bi Amiye di Mida tautore rego.”

²³Kamini iniye iniye ni kaitegasa nigi kora reyadi, ‘Mina bi kaere amiye uniye yaku mina vegu rego?’

Kaere bi tora iniye di kayamo rena

²⁴Ma ini usi dina vene iniye kayamo reyadi kaere bi ini mokenari tora iniye.^m ²⁵Ma Iesu yaku niyo, “Gagani gagani vene di kini yaku ini vene fafau ini vava moi raga resi ini vava dudu beika vegu rigedi amiye ini gabireri rofu ago gira nisi iniye nigi ‘una bi uni vene di mokei vava amiye’ vo nidedi.” ²⁶Ye yi fogori bi makai de, idu kaere yi fogori bi amiye tora iniye bi keika iniye niyaine, ma yi ourefeidenana amiye bi naivo naivo amiye kana niyaine.^o ²⁷Adina kaere bi tora iniye, amesi iruku irido amiye ba naivo redo amiye? Amesi iruku irido amiye bi tora ba? Idu, na bi yi fogori naivo amiye kana.^p

²⁸“Nai uka maina regamo ri, bi ya vene bi na sa amegamadi. ²⁹Mina dada, nai Baba yaku na moi varika riyo kana, na ka ya vene moi varika rida. ³⁰Makai reyaka dada, ya bi nai teiboro nai ourefeidenana amena sanari amesi na sa iruku ma koru irisi ya ka ourefeidenana amena fata ameinu resi Israel vene di rubu tuero kota regedi.^q

Iesu yaku Peter ina rofu ni sui rena ogau niyo

(Mt 26.31-35; Mk 14.27-31; Jn 13.36-38)

³¹Kamini Iesu yaku Peter rofu niyo, “Simon, na neide! Satani yaku Sei rofu usa niyo ina yaku ya vene di uka maina rego vo nisi, ini mokena yaku yi vene di uka

^k 22.20 Jer 31.31-34 ^l 22.21 Ps 41.9 ^m 22.24 Mt 18.1; Mk 9.34; Lk 9.46

ⁿ 22.25-26 Mt 20.25-27; Mk 10.42-44 ^o 22.26 Mt 23.11; Mk 9.35 ^p 22.27 Jn 13.12-15

^q 22.30 Mt 19.28

mokena gira moi yaregedi, niyo. ³²Idu ya dada usa niyaka yi mokena vari gira aina mina ga keto reyaine, ye na rofu dairigiya ri, bi yi asiyaka vene egira re.”

³³Idu Peter ina rofu niyo, “Varika Amiye, na bi ya sa ka dibura sanari bosu vakoi muyegifa!”

³⁴Idu ni kabai reyo, “Peter, ya rofu nida, kokoro gua raka nina koderi, bi uru regode ya ya toto nigina na ni sui regiya.”

Fuse, dura ma bainasi

³⁵Resi Iesu yaku ina vene rofu niyo, “Fuse de, dura de, ma tamaka de ya ni feideyaka ri, bi beika besa be moigedi vo nisi mokeyadi?”

Ina ni kabai regasa niyadi, “Ide mada.”

³⁶Resi ina vene rofu niyo, “Gua bi kaere fore fuse o dura nufa bi moi; ma kaere bainasi de, bi ini varuka bou mina sero risi yokoi voi re. ³⁷Makai ya nida bi Sei di ago ideri beika bura reyadi mina baisi vata niyainedi. Bi yomakai bura riyo, ‘Ina bi vegu no rededi vene sa ni kake reyadi,’ adina beika na dada bura reyadi bi baisi rama aigo.”^s

³⁸Ina vene yaku kamini niyadi, “Varika Amiye, ve kumo, bainasi remanu mini!”

Iesu yaku niyo, “Kaini!”

Iesu Olive yabo di ikari usa usa niyo

(Mt 26.36-46; Mk 14.32-42)

³⁹Kamini Iesu yaku ini rei baigamo kana dadisi taoniri feresi Olive yabo di ikari boyo. Ini usi dina vene ka ina sa boyadi. ⁴⁰Mina gaganiri okigasa ina vene rofu niyo, “Usa usa nifa yi uka maina regi keto rego baebu.”

⁴¹Kamini inaike etagae risi boyo, fore moisi makugedi di maike kana, resi efuka odesi usa usa nigasa ⁴²niyo, “Baba, ya ura reisa vo nisi, bi mina esika esika di biyo na rofu moi etagae rigiya. Idu, ya yaku yi beika mokeisa mina resi nai mokena dudu bi ga regiya. ⁴³Kamini naivo naivo vima yokoi omari gutuna desi ina rofu ogau nisi egira reyo. ⁴⁴Ma Iesu ini uka bi esika yaku vata baiyo dada usa usa ni yeiva regamo ri, bi ini mofa bi dava kana kono fafauri yaregamadi.^t

⁴⁵Usausa nigamo mina feresi dadisi ini usi dina vene rofu dairiyo. Iriyeduka yaku no niyo ma varegamadi ri nesi baku reyo. ⁴⁶Resi ina vene rofu niyo, “Beika resi varededi? Dadisi usa usa nifa yi uka maina rego baebu.”

Iesu moi gira reyadi

(Mt 26.47-56; Mk 14.43-50; Jn 18.3-11)

⁴⁷Iesu ago nigamo ri, bi amiye tau gade okiyadi ma Judas, kaere bi amiye tuerori yokoi, bi amiye tau gade ourefeidei baisi Iesu fuka regi ina

^r 22.35 Mt 10.9-10; Mk 6.8-9; Lk 9.3; 10.4 ^s 22.37 Is 53.12 ^t 22.44 Bura bedakai nanaka 43–44 nufa de.

atafu are reyo. ⁴⁸Ye Iesu yaku ni kabai reyo, “Judas, ya bi Amiye di Mida fuka resi tautore reisa ba?”

⁴⁹Kamini amiye kaere bi ina atafu beika vata nigo mina veyadi ri, bi ina rofu niyadi, “Varika Amiye, uni bainasi dudu ruda regifa ba?” ⁵⁰Ma yokoi yaku Sei ma amiye utari naivo amiye tora di moimai rei tavoi redo amiye di anema rama kuaita resi nugai feideyo.

⁵¹Idu Iesu yaku niyo, “Mina kana vegu bi kaini!” Resi mina naivo amiye di anema avaka moiyo ri, bi buni niyo.

⁵²Kamini Iesu yaku Sei ma amiye utari naivo vene di varika vene ma Sei vakena yava di iya rena ourefeidenena vene ma tora vene, kaere bi moigika okiyadi, ina vene rofu niyo, “Ya vene bi duma duma amiye yokoi kana bainasi ma gai moisi baiyadi ba? ⁵³Ari neinei ya sa Sei vakena yavari amegamafa ri, bi de na moi gira reyadi. Idu gua bi yi ari – mukuna di vava ari.”^u

Peter Iesu ni moi sui riyo

(Mt 26.57-58, 69-75; Mk 14.53-54, 66-72; Jn 18.12-18, 25-27)

⁵⁴Kamini moi gira resi Sei ma amiye utari naivo amiye tora di yava ideri afei boyadi. Ma Peter bi egaima risi usi digamo. ⁵⁵Be vene yaku yava ida nefau di tobori ita orisi amei buru riyadi. Peter ka ina vene di fogori baisi ameinu reyo. ⁵⁶Kamini naivo naivo rema yokoi Peter ita atafuri ameinu resi mina vei mona resi niyo, “Mina amiye ka bi ina sa digamo amiye yokoi mini!”

⁵⁷Idu ni sui resi niyo, “Rema, na na toto ina!”

⁵⁸Ma doba de bi amiye yokoi vesi niyo, “Ya ka bi ini asini yokoi!” Idu Peter yaku niyo, “Ide, diya na.”

⁵⁹Ye meda nemoko yokoi kana di fufutari, amiye yokoi yaku ni gira regi kora regasa niyo, “Rama iniye mina amiye ka bi ina sa, adina ina ka bi Galilee amiye!”

⁶⁰Idu Peter yaku niyo, “Na na toto ya beika nisa bi!”

Mina niyo ri, evade bi kokoro raka niyo. ⁶¹Ma Varika Amiye ne kero resi Peter vei mona reyo. Ye Peter minari bi kamini Iesu beika vata nigo di ago niyo mina mokeyo, “Kokoro gua raka nina koderi, bi uru regode na ni sui regiya.” ⁶²Kamini etofaro yakusi isaka no iniye iniye niyo.

Iesu ni kurusi ubobo reyadi

(Mt 26.67-68; Mk 14.65)

⁶³Ma Iesu moi gira reyadi vene yaku ni kurusi ubobo resi ⁶⁴ini nemoko fafa risi ni kaitesi nigamadi, “Ya bi Sei di ago nido amiye vo nisi, beika vata una ni; kaere amiye yaku ya ugo ini roka ni.” ⁶⁵Ago no tora gade ina rofu nisi ini roka moi no rigamadi.

^u 22.53 Lk 19.47; 21.37

Iesu bi kanisoro vene di nemokori afei boyadi*(Mt 26.59-66; Mk 14.55-64; Jn 18.19-24)*

⁶⁶Ari uveyo ri, bi amiye di kanisoro tora vene, ma Sei ma amiye utari naivo vene di varika vene, ma ago gira oteimana vene egogo resi kota rena sanari Iesu afei bosi kota resi ⁶⁷niyadi, “Ya bi Keriso vo nisi, bi una ni.”

Idu ina vene rofu niyo, “Ya vene rofu nigida vo nisi, bi ida nokoi dudu mokena vari gira de aigedi; ⁶⁸ma ya ni kaitegida vo nisi, bi ida nokoi dudu de na ni kabai regedi. ⁶⁹Idu gua ari gutuna Amiye di Mida bi Sei Vava Iniye di vana ramari amego.”

⁷⁰Ma ina tau vakoi yaku niyadi, “Ye ya bi Sei di Mida ba?”

Ma Iesu yaku ina vene rofu niyo, “Ya yaku nidedi mina bi na.”

⁷¹Ma ina vene yaku niyadi, “Beika resi nisi una bi mina ago di adina besa ni maina resifa? Uniye ini vena ago bi neideyafa mini.”

Iesu bi Pilate di nemokori aiyadi*(Mt 27.1-2, 11-14; Mk 15.1-5; Jn 18.28-38)*

23 ¹Kamini egogo reyadi vene tau gade dadisi Pilate rofu Iesu afei bosi ²ina rofu ni tourage resi kora resi niyadi: “Mina amiye vei tau reyafa bi uni vene di uka moisi Caesar rofu takesi mana ga rena vo nigamo. Resi iniye nigika ina bi Keriso, kini yokoi.”

³Kamini Pilate yaku ni kaitegasa niyo, “Ya bi Jew vene di kini ba?”

Ma ni kabai reyo, “Ya bi mina niyo.”

⁴Ma Pilate yaku Sei ma amiye utari naivo vene di varika vene ma amiye tau rofu niyo, “Mina amiye rofu no yokoi baku rena de reida.”

⁵Idu ina vene yaku bi ago ni gira resi niyadi, “Ina bi amiye tau Judea gaganiri oteimasi di uka moi odoro rido. Galilee ri siko ago ni oteima disi bi gua minari baiyo.”

Iesu Herod rofu ni feideyadi

⁶Pilate yaku mina neideyo ri, bi ni kaitesi niyo, “Mina amiye bi Galilee amiye ba?” ⁷Resi bi diba niyo ina bi Herod di ini vava gabireri ri, bi Herod rofu ni feideyo, kaere mina ariri iniye ka bi Jerusalem ri. ⁸Herod yaku Iesu veyo ri, bi ada iniye reyo, adina ini sina neidesi meda torari ini ura bi vego vo nisi. Ini mokenari bi rebe be rego ma vego. ⁹Herod yaku ago tau gade dudu ni kaitegasa nigamo, idu bi ago yokoi be ni kabai de reyo. ¹⁰Ma Sei ma amiye utari naivo vene di varika vene ma ago gira oteimana vene yaku ina rofu gubuyo resi ni tourage regamadi. ¹¹Herod ini iya rededi vene sa ni ninika resi ni kurugamadi. Resi bi kamini varuka burefe aku masi Pilate rofu dairi feideyadi. ¹²Mina medari maka Herod ma Pilate dubusa uka yokoi maka niyadi. Sena bi ina remanu bi de auta regamadi.

Iesu di umuyena ago

(Mt 27.15-26; Mk 15.6-15; Jn 18.39–19.16)

¹³Kamini Pilate yaku Sei ma amiye utari naivo vene di varika vene ma ourefeidenena vene ma amiye tau ni egogo resi ¹⁴ina vene rofu niyo, “Ya vene yaku mina amiye na rofu moi baisi ni tourage reyadi nidedi bi ina bi amiye di uka moigamo. Yi nemokori ni kaitegasa vaigasa reyaka. No yokoi de baku reyaka gua ya vene yaku nidedi kana. ¹⁵Herod yaku ka no yokoi de baku reyo, dada dairi ni feideyo. Mina amiye bi no yokoi reyo dada muyeyaine. ¹⁶Ye na maka buburu resi moi feidego.” ¹⁷v

¹⁸Idu ina tau vakoi imuna niyadi, “Mina amiye afei bo, idu Barabbas bi una rofu erufu!” ¹⁹(Barabbas bi amiye yokoi amiye di fogori kaere bi taoni ruda rena yokoi moi vata riyo ma amiye be umuyeyo ma dibura yava ideri afei boyadi.)

²⁰Ye Pilate dubusa ina vene rofu ago niyo. Ini ukari mokena moigamo bi Iesu erufugo, ²¹idu imuna nigamadi, “Satauro ikoko re, satauro ikoko re!”

²²Pilate yaku uru regode kamini ina vene rofu niyo, “Beika resi, ina bi beika vegu no be reyo? Vegu no muyeyaine vo nisi di ini adina bi de baku reyaka! Mina dada na maka bururu resi moi feidegida.”

²³Idu ina vene yaku ago gira resi goroka tora dudu ni tona tona niyadi, “Satauro ikoko re!” Ina vene di ago yaku vava niyo. ²⁴Dada Pilate ini mokena bi Iesu rofu regi mina vene di usa niyadi kana. ²⁵Mina amiye ruda resi amiye umuyeyo ma dibura yavari afei boyadi bi kamini erufuyo, kaere bi usa nigamadi. Idu bi Iesu ini vanari aiyo, ini mokeyadi kana reyanedi vo nisi.

Iesu satauro ikoko reyadi

(Mt 27.32-44; Mk 15.21-32; Jn 19.17-27)

²⁶Iya rededi vene Iesu afei bogamadi ri, bi Cyrene gagani amiye yokoi roka Simon, kaere bi taoni etofaro gutuna digamo ri, bi moi gira resi satauro ina fafauri aiyo ma uakaigasa Iesu usi boyo.

²⁷Amiye tora gade iniye ina usi boyadi. Mina amiye tau fogori bi rema vene be iriyeduka resi ina dada isaka nigamadi. ²⁸Idu Iesu yaku ina vene rofu kero resi niyo, “Jerusalem rema vene, na dada isaka ga nifa, idu ya kaya ma yi mida dada isaka nifa. ²⁹Adina bi, ini ari baigedi bi amiye yaku nigedi, ‘Mida de rema vene, ma natu rema vene, kaere bi susu de maro, bi buni tora gade regedi!’ ³⁰Mina ariri bi amiye yaku omuna rofu nigedi,

v 23.17 Bura bedakai ka nanaka 17 nufa: *Passover irakuna neineiri Pilate di vegu ina rofu bi dibura sanari amedo amiye yokoi moi feidego* (Mk 15.6 baku re).

‘Una fafau yare!’ resi ika keika keika rofu bi, ‘Una moi sui refa!’^w ³¹Adina bi yabo veguri bi makai regedi vo nisi, ma yabo abiye nigo ri, bi gokai?”^x

³²Amiye remanu, kaere bi vegu no reyadi vene, ka Iesu sa vakoi umuyegi afei boyadi. ³³Gagani roka “Ada Girika” ri bae okiyadi ri, bi kamini satauro ikoko reyadi, ina vegu no reyadi amiye remanu sa. Yokoi bi ini vana rama rofu ma yokoi bi ini vana enana rofu. ³⁴Ma Iesu yaku niyo, “Baba, ini vegu no koite maku; adina ina vene bi ina toto dada makai rededi.”^{y z}

Iya rededi vene yaku laki dudu isira resi ini varuka ina yokoi yokoi moiyadi. ³⁵Amiye tau yaku are resi vegamadi ri, bi Jew vene di ourefeidenena vene bi Iesu ni ninika regasa nigamadi: “Amiye be bi moi vegu riyo; ina bi Keriso kaere Sei yaku abidi reyo amiye vo nisi, bi iniye moi vegu riyaine!”^a

³⁶Iya rededi vene ka ni fafana resi ina rofu baisi waini safi de ru mina magasa^b ³⁷nigamadi, “Ya bi Jew vene di kini vo nisi, bi ya kaya moi vegu ri!”

³⁸Ini satauro yabo odorori ka bi yomakai bura reyadi: “Mina bi Jew vene di kini.”

³⁹Ma vegu no reyo amiye yokoi satauro ikoko reyadi mina yaku Iesu ni kurugasa niyo, “Ya bi Keriso ba? Ya kaya moi vegu risi una ka moi vegu ri!”

⁴⁰Idu yokoi ere yaku emagasa niyo, “Ya bi Sei rofu ori reisa ba ide? Ini adina yi kaunava bi ini kaunava kana. ⁴¹Una beika moisifa bi una vegu reyafa kana; rama moisifa mini. Idu yomina amiye bi vegu no yokoi rena de.” ⁴²Resi niyo, “Iesu, yi ourefeidenena amena sana moigiya ri, bi na na moke!”

⁴³Ma Iesu yaku ina rofu niyo, “Gua ya ni tore reida mini, mina medari ya bi na sa ada rena sanari amegiya.”

Iesu di muyena

(Mt 27.45-56; Mk 15.33-41; Jn 19.28-30)

⁴⁴Meda nemoko tobo niyo ri, bi gagani tora noibanu bi mukuna yaku fono reyo bogo meda nemoko regodenu koina niyo mamo,^c ⁴⁵ye mukuna yaku meda bou riyo ma Sei vakena yava ideri biri rina varuka doba bi utama uvesi rei neyo. ⁴⁶Kamini Iesu goroka tora dudu raka nigasa niyo, “Baba, yi vanari nai vima fereida!” Mina nisi asa you feideyo.^d

^w 23.30 Hos 10.8; Rev 6.16 ^x 23.31 O Na bi yabo vegu kana, ye mina vegu na rofu ogau niyadi, idu ya yabo abiye kana ya rofu beika ogau niyadi? ^y 23.34 Bura bedakai Ma Iesu yaku niyo, “Baba, ini vegu no koite maku; adina ina vene bi ina toto dada makai rededi nufa de. ^z 23.34 Ps 22.18 ^a 23.35 Ps 22.7 ^b 23.36 Ps 69.21 ^c 23.45 Ex 26.31-33
^d 23.46 Ps 31.5

⁴⁷Ma iya rededi vene di ourefeidenana amiye tora yaku beika vata niyo mina vegasa Sei di roka moi odoro regasa niyo, “Rama iniye mina amiye bi mokena rorobo amiye!”

⁴⁸Amiye tau gade iniye mina vata nigamo vegi egogo reyadi. Beika vata niyo mina veyadi ri, bi iriyeduka tora gade resi ini rautu rofu dairiyadi. ⁴⁹Ma Iesu di asiyaka tau gade ma rema bedakai, kaere Galilee gutuna usi baigamadi, bi gaima gutuna are resi mina vegu vegamadi.^e

Iesu guri aiyadi

(Mt 27.57-61; Mk 15.42-47; Jn 19.38-42)

⁵⁰Kamini kanisoro amiye yokoi ini roka bi Joseph, bi buni ma mokena rorobo amiye. ⁵¹Ina bi Arimathea, Judea gagani di taoni yokoi amiye, idu kanisoro vene yaku egogo resi ini sina ago ma rremama regamadi ri, bi de dui reyo. Kamini ina ka Sei di ourefeidenana amena sana baigo mina tua regamo. ⁵²Mina amiye yaku bosu Pilate rofu Iesu di rovaita moigi usa niyo. ⁵³Resi bi ini rovaita moi sokau resi varuka buni dudu kumu risi kono guri fore ideri goeyadi bi ini rovaita mina ideri aiyo. Mina kono guri bi rua; muyena rovaita yokoi mina ideri aina kode. ⁵⁴Mina bi Sabati dogo rena di meda, adina Sabati meda bi kaira niyo.

⁵⁵Ma Iesu sa vakoi Galilee gutuna baiyadi rema vene bi Joseph usi bosu ini rovaita gokai kono guri ideri aiyo veyadi. ⁵⁶Resi bi sisika buni be dogo regika rauturi dairiyadi.^f

Sabati medari, bi tarutaru reyadi, adina bi ago gira yaku bi makai niyo dada.

Iesu dubusa dadi rae reyo

(Mt 28.1-10; Mk 16.1-8; Jn 20.1-10)

24 ¹Idu ari uveyo ri uruyaku gorogoro iniye fura di ourena medari, rema vene dadisi guri sanari sisika buni muramura dogo reyadi mina moi boyadi. ²Resi bi veyadi bi mina guri di ida venari fore bi sena moi kurevai rei etagae riyadi. ³Idu dui reyadi ri, bi Iesu Varika Amiye di rovaita de baku reyadi. ⁴Mina yaku ina vene di mokena forovai reyo ri, bi amiye remanu atafu are reyadi, kaere ini varuka bi kama kama iniye. ⁵Ori resi ini seira kono rofu agu riyadi ri, bi mina amiye remanu yaku ni kabai reyadi, “Beika resi vegu amedo amiye bi muyena amededi vene di fogori maina rededi? ⁶Ina bi minari de amedo; ina bi dadi rae reyo. Galilee ri amegasa beika sina ya nigamo bi mokededi ba ide?^g ⁷Yomakai niyo, ‘Amiye di Mida bi vegu no rededi vene di vanari aisi satauro ikoko regedi, idu meda regode koina nigo fufutari bi dadi rae rego.’ ”

^e 23.49 Lk 8.2-3 ^f 23.56 Ex 20.10; Deut 5.14 ^g 24.6-7 Mt 16.21; 17.22-23; 20.18-19; Mk 8.31; 9.31; 10.33-34; Lk 9.22; 18.31-33

⁸Ini ago kamini mokesi ⁹guri sanari gutuna dairisi bi beika vata niyo tau vakoi mina amiye eleven ma ini usi dina vene be rofu ni oteimaradi. ¹⁰Mina rema bi Mary Magdalene, Joanna ma Mary, kaere bi James di nono; ma rema be ina vene sa yaku mina vegu ni feidena vene rofu niyo. ¹¹Idu ni feidena vene yaku mokeyadi mina rema di ago bi tavoi reyadi, ye mokena vari gira de aiyadi dada. ¹²Idu Peter bi dadisi raga bosu guri sanari ideri agu risi dui reyo ri, bi varuka buni maka veyo. Kamini beika vata niyo mina tururu regasa ini yavari dairiyo.^h

Emmaus rautu rofu nana rena
(Mk 16.12-13)

¹³Mina medari, Iesu di ini usi dina amiye remanu bi rautu roka Emmaus ri bogamadi, Jerusalem gutuna ini maike bi 11 kilometreⁱ kana. ¹⁴Ina remanu bi mina beika tau vata niyo mina ni dodu regamadi. ¹⁵Mina sina nigasa ni dodu regamadi ri, bi Iesu iniye bi ina vene atafu nisi kamini vakoi bogamadi. ¹⁶Vegamadi mini, idu de vei mama regamadi ina bi Iesu. ¹⁷Kamini ina vene rofu niyo, “Ya vene bi beika sina nigasa didedi?”

Kamini ini ne uruma bi iriyeduka dudu are reyadi. ¹⁸Ina remanuri, bi yokoi di roka bi Cleopas, ina yaku kamini ni kabai resi niyo, “Ya bi Jerusalem ri odi okiyo amiye maka baeko, dada ya toto mina meda be koina niyo ri beika vata niyadi bi?”

¹⁹Kamini bi ina vene rofu niyo, “Beika vata niyo?”

Ma ina rofu niyadi, “Iesu Nazareth amiye rofu nisifa, kaere bi Sei di ago nido amiye. Ina bi ini ago ma ini reremama bi yeiva iniye Sei ma amiye di nemokori. ²⁰Ma uni Sei ma amiye utari naivo vene di varika vene ma uni ourefeidenena vene yaku gokai iniye ini vanari moisi muyena ida risi satauro ikoko reyadi. ²¹Idu uni uka mokena regamafa bi ina bi Israel erufugo amiye! Mina beika vata niyo bi meda regode koina niyo mini. ²²Idu gua uni rema vene be yaku una moi tururu reyadi. Uruyaku gorogoro guri sanari bosu ²³bi ini rovaita de baku resi dairi baisi niyadi bi yaduka kana naivo naivo vima ka veyadi. Mina naivo naivo vima yaku ni oteimaradi bi ina bi vegu niyo. ²⁴Be vene una sa bi kamini dadi guri sanari boyadi ri, bi rema vene yaku niyadi kana makai baku reyadi, idu Iesu bi de veyadi.”

²⁵Kamini Iesu yaku ina vene rofu niyo, “Ya vene bi ada de iniye; yi mokena bi mukuna tora. Sei di ago nidedi vene di ago tau bi mokena vari gira de aidedi! ²⁶Ba rorobo ide, Keriso bi mina kana esika moisi ini vabara moigo?” ²⁷Kamini Moses gutuna Sei di ago nidedi vene tau rofu ago buni tau gaderi ina dada bura reyadi sina di ini rama mina ni itara reyo.

^h 24.12 Bura bedakai bi nanaka 12 nufa de. ⁱ 24.13 Greek agori mina bi 60 stadia.

²⁸Kamini bogamadi ri, bi rautu ekaira reyadi, idu Iesu bi ebu rei digo kana dudu nana reyo. ²⁹Idu ni guyaguya reyadi, “Una sa amevo; uriyenau kamini niyo ma doba de urusa nigo.” Dada ina vene sa amegi dui rei boyo. ³⁰Ina regode iruku irigi ameinu reyadi ri, bi Iesu yaku beredi moisi ni buni resi bi okusi ina remanu maro. ³¹Minari ini nemoko bi ne are reyadi bi vei mama reyadi ina bi kaere, ma ina vene di neri roro nisi diyo. ³²Iniyeyine rofu niyadi, “Uni uka ita kana vaido, idau baigamafa, ago nigasa Sei di ini ago di ini adina mina ni itara regamo ri ba?”

³³Minari maka dadisi Jerusalem ri dairiyadi. Iesu ini usi dina amiye eleven ma amiye be ina sa bi minari egogo ameyadi baku reyadi. ³⁴Ina vene yaku ka niyadi, “Rama Varika Amiye bi dadi rae risi Simon rofu ogau niyo!”

³⁵Ina remanu yaku ida beika vata nigi kora reyo ma gokai vei mama reyadi beredi okuyo ri ni itara reyadi.

Iesu yaku ini usi dina vene rofu ogau niyo
(Mt 28.16-20; Mk 16.14-18; Jn 20.19-23; Acts 1.6-8)

³⁶Mina nigamadi ri, bi Iesu iniye ini fogori are resi rofu niyo, “Uka amuta bi ya sa.”^j

³⁷Idu ina vene bi ori yaku no iniye iniye nisi ini mokenari bi muyena vima yokoi vegamadi. ³⁸Idu Iesu yaku niyo, “Beika resi yi mokena forovai redo ma yi uka deda ni kaitena ago mina baidedi? ³⁹Nai yuka vana vefa, mina bi na mini; na avaka moisi vefa. Adina vima bi musa nena koina ma vededi na bi nai musa nena nufa.”

⁴⁰Mina ni vau resi bi ini vana ma yuka oteimaro.^k ⁴¹Idu tururu resi ada yaku no iniye niyadi rofu, mina bi ofa ba rama moi mokena forovai reyadi, dada Iesu yaku niyo, “Iruku keika be amedo ba, ide?” ⁴²Ina vene yaku oyena kiro reyadi di ini tu yokoi maradi ⁴³ma ini nemokori bi moisi iriyo.

⁴⁴Resi bi ina vene rofu niyo, “Mina bi nai ago ya sa amegasa nigamaka: na dada beika tau bura reyadi Moses di ago girari, Sei di ago nidedi vene di burari ma psalms bukari. Mina tau bi baisi rama aiyaiane.”

⁴⁵Dada ini mokena moi vabara reyo Sei di agori beika bura reyadi vei mama reyaganedi, ⁴⁶resi niyo, “Yomakai bura reyo: Keriso bi mina kana esika moigo ma meda regode koina nigo ri, bi muyena sanari gutuna dadi rae rigo. ⁴⁷Dada Keriso di roka dudu vegu no feresi moi etagae rina vegu no koite makuna rofu di ago ouresi Jerusalem gutuna gagani gagani vene tauri disi ni rausi rei diga bogasa reyaine. ⁴⁸Ya vene yaku mina vegu tau bi yi nemokori veyadi rofu oteimagedi. Mina dada ya vene yaku ni oku

^j 24.36 Bura bedakai bi *resi rofu niyo*, “Uka amuta bi ya sa” nufa de. ^k 24.40 Bura bedakai be nanaka 40 nufa de.

rausi regedi. ⁴⁹Dada, nai Baba yaku ya mago ni tore reyo mina, bi na yaku ya vene fafau ni feidei degida. Ya bi taoni ideri tua reyaine mamoma mina vava yaku ya fafau ni vai rego.”^l

Iesu bi omari afei boyo
(*Mk 16.19-20; Acts 1.9-11*)

⁵⁰Kamini Iesu yaku ina vene taoni gutuna afei boyo Bethany atafu, ini vana moi odoro resi ni buni tora gade maro.^m ⁵¹Mina ni buni tora gade magamo ri, bi ina vene rofu etagae riyo ma oma odoro afei boyo.ⁿ ⁵²Ina vene yaku ni vakesi ada tora iniye dudu Jerusalem rofu dairiyadi. ⁵³Kamini Sei vakena yavari ari neinei Sei rofu buni tora gade magamadi.

^l 24.49 Acts 1.4 ^m 24.50-51 Acts 1.9-11 ⁿ 24.51 Bura bedakai bi *ma oma odoro afei boyo* nufa de.